


CIKONDO CYÀ

ÈKÈLEEZIYÀ WA PEEGÀMÒ

 Èyo. Mpindyewu, bwà bwànyì mèmè, bìvwa bifwànyìne kwikala bimpè bwà kucijima. Eyo.

² Tudi ne disànkà dyàbúngì bwà kwikala cyàkàbìdì kaaba aka dilòòlò edi ku mudimu wà Mukalenge. Nènku makèèlèlè dilòòlò awu mvwa mudyúmvwè ànu menemene bu ne Bukalenge bwà bidimu cinunu mbulwe's. Nènku mpindyewu tudi ne ndambù wa, ngeela meeji ndambù wa nkonko kaaba aka, nènku nényèlè mu mpaaya bwà...Ngeela—ngeela meeji ne eci ndisambila...bwà kucisambidila. Nènku tudi...Nènku nênteetè bwà kwandamuna mwànyì pàànyì mwònsò mûndiku—mûndiku mwà kwandamuna amu.

³ Amba túng, nwênù mwà kwambila Doc ní ùdikù mwà “kujimà ewu,” bwà ne...ùdi ùnkenkesha bulùdi mwab'ewu, bwà ne, ncìikadi mwinshì mwà mwéndù wà cimunyi ewu to. Nudi bamanye's, ncyèna—ncyèna umwe wa ku bayiishi bàtù baswè kwikala mwinshì mwà mwéndù wa cimunyi aba to. Pa nàнку nebiikale bitámbe bwímpè wòwò kawúyiku to, ngeela meeji. Wà ndekeelu... .

⁴ Mèmè nguwwa mucilómbe, Doc. Ndi nyingalala, ndi—ndi nyingalala, nudi numòna's. Kaa, kaa, udi wenza cinyì...? Bikèngela ùjime ùdi kuulu wàwa ne ujaalamije ewu anyì? [Mwanèètù Branham ùdi ùyiikila ne mwanààbo wa balùme, Doc—Muf.] Kaa, èè, bilekèlè ànu nàнку's. Èyowà. Èè, bilekèlè ànu nàнку's. Kaa, to! Mpindyewu, kùwùmacìshì to. Èyo. Mpindyewu ndi mutámbe kunanga nàнку. Misangu mikwàbò...Nènku mèmè ncìtu munange bukènkè kampànda bwà bùkukenkeshila bulùdi mwìsù abu to, nudi bamanye's. Nènku—nènku bùdi bukenkesha butangile panshì mùshindù ewu lwà mwaba ùndì mwà kumòna bímpe bitámbe. Ndi nkwelelè twasàkidila, mukalenge. Neáfute bwà bwalu abu.

⁵ Nudi bamanye's, kanwèna mwà kujikija bikondo byà èkèleeziyà ebi to. Nènku leelù ewu pàmvwà munkacì mwà kulonga eci nùнку, mèmè kwambila mukàjàànyì, kwamba ne: “Kaa, ekèlekèlè! Ndi—ndi ne mifùndù búngì bukùmbane mwà kuyiisha pa cyòcì eci mayiisha makumi ataanu.” Nwamònu anyì? Nènku bìdì ànu...kakwèna mùshindù wà kucyèna to ànu kulenga myaba minène, nènku pàmwàpa patwàfùnda mukànda awu dìbà adi netùteete bwà kutámbe kubìvudija.

⁶ Ncìvwa mukumòne mwaba ewu to, mwanèètù. Udi munyì, Mwanèètù West? Ndi mfuma ku dyumvwa luumu lwímpè, lwà

ne wa ndekeelu wa mu dîkù dyà Mwanèètù Daulton mmubwele, mwâna mukwàbò wa balùme...wa bakàji mukwàbò awu. Ndikumi's, mmwômò anyi? Citèèmà. Nudi bavùluke ne aci cìvwa mmu mudimu wa bwambi mupyamùpyà awu pàvwa Mukalenge mumwambile mwaba awu ne...dîkù dyèndè divwa ne cyà kusùngidiibwa. Mvwa munkaci mwà kubàsambidila, mwimane mwaba awu ncìyì mumanye cìmvwà ngàmba to, Nyumà Mwîmpè kwamba ne: "Ndi nkupèèsha dîkù dyèbè." Nwamònu anyi? Uhuh. Kàdi's ki dyòdi adi, muntu ne muntu wa kùdìbò. Nudi numòna mwenzenzà Mukalenge anyi? Nwamònu's, mèyì Èndè mmapwàngàne, ôwò kacya, kacya kaàtukù apangila to. Èè, katwèna bàswè kufika ku luseke lwà dyondopa dyà kùdi Nzambi to, tudi tuteeta bwà kushààla mu ntàntà yònsò...eci citùpà, ku luseke lwà cipròfetà.

⁷ Mpindyewu, dilòlò edì nènteetè ànu bwà kwakula, nènku mèmè ne mùshindù, nènku netùfike too ne ku bitùpà byà maalumalonda byà cikondo cinène cyà èkèleeziyà eci, byà ciibìdi... anyi cikondo ciisàtù cyà èkèleeziyà citùdìpu dilòlò edì aci. Nudi nusànka naaci anyi? Mbilenga byà dikema's. Ndi ànu ngeela meeji ne mbilenga byà dikema mùdi Mukalenge Yesù mutùbèneèhè ne mutùpe bintu ebi, nènku tudi twanyisha ciine aci ne mwoyi wètù wònsò, ùtùlekela tumanya kumpàla kwà dîbà ciikalà mwà kwenzeka mu matùkù àcilwalwà. Yèyè's mmumanye ndekeelu kacya ànu ku cibangidilu, ne pa nàнку tudi ne disànka dîngì bwà bwalu abu. Nàнку awu tudi tweyemena Mukalenge bwà kutùbènesha.

⁸ Nènku nuvwaku bamòne, makèlèlèlè dilòlò awu ne, Nyumà Mwîmpè mmutùpèèshe (paanyimà pàà disangisha dimane kujika) mikenji yisàtù ne misùùkà yisàtù's. Ànu menemene. Nènku pàvwa Nyumà wàkula, dîbà adi kwalukilaci ku dyumvwija dyà ndekeelu, cyambulula, cyàmba ne: "Cidì Nyumà wàmabila maèkèleeziyà..." Kaa: "Èwu udi ne dicitù, ùmvwè cidì Nyumà wàmabila maèkèleeziyà." Ànu...Ne Nyumà wàmabila ku mapà à èkèleeziyà. Kaa, èkèleeziyà akwateku aci mu kaneemu mpindyewu, nwamònu's, nucilame ànu mu kaneemu. Nwàtapa ntààla nwadimuka; Sàtaanà neàlwe, uteeta bwà kunùlalula kuya kule ne bulelèlè. Ikalaayi batwishibwe ne n'Nyumà Mwîmpè musangu wònsò. Nènku cyòcì ciikalè Nyumà Mwîmpè, Yèyè neàkwile buludi bwà cintu kampànda cidì munkaci mwà kwenzeka. Mbwa dikolesha dyà èkèleeziyà. Nwamònu anyi? Nènku dîbà adi nwènù biikalè ne kaneemu ne byòbì abi, dîbà adi Nzambi neànùpèèsheku kàbidì bipite apu. Nwamònu's, ùtùngunuka ànu ne kusàkidila bikwàbò. Nènku bu...

⁹ Mpindyewu, muntu kampànda ùvwa munkaci mwà kubùkila ne kwebeja...bantu bàbùkila leelù ewu ne bèèbeja dîbà dùikalaku masangisha à lwondapu. Mpindyewu, pàdi ànu masangisha aa ne àjiki èè, dyàlumingu didì dilonda

dilòòlò, nêngǎnji kupèngamaku bwà matùkù makesè, bwà kwikishishaku ndambù diminu dyànyì edi, nènku dyàlumingu didì dilonda adi, Mukalenge mwà kwanyisha, netwikale ne disangisha dyà lwondapu, mu dindà dyà dyàlumingu dilwalwà. Aci's neciikale... ncyèna ànu mumanye ne neciikale ditùkù kaayi to, kàdi neciikale lumingu lujimà kuumukila ku... Dyà 18, dyàlumingu mu dind-... Mbikùmbane nàнку anyì, Mwanèètù Neville? Uhm? [Mwanèètù Neville ùdi wàndamuna ne: "Èyowà's, mukalenge."—Muf.] Mu dindà dyà dyàlumingu, dyà matùkù 18, kusambidila babèèdi.

¹⁰ Nènku mu cyòci eci, mpaasàtà wetù ewu, ncyèna mupete mpùngà wa kutàmba kwakulaku bwèndè to, kàdi ndi muswe bwà nwènù bònsò, nuteetè bwà kutwilangana ne mpaasàtà wetù. Ncyà bushùwà ne yèyè m—mwanèètù wa bushùwà mu Kilstò. Tudi ne disànkà dyà kwikalaku ne mwanèètù wa balùme udi... mukolèle mu nshindameenu wa ba-Méthodistes ne cijila. Ne twètù bònsò tudi bamanye Orman Neville, muntu ne muntu mwab'ewu mmumanye. Kakwèna muntu nànsha umwe udi mwà kumubanda ne bwalu mu nsòmbelu wèndè to. Ndi mufwanyine... Yèyè kàtu musweku bwà mèmè kwamba nàнку to, kàdi nànsha nàнку mbipìciibwe ne mèmè kumwela kaacilòngo kakesè menemene mpindyewu, pamutù pàà dikusa dijimà paanyimà pàà yèyè mumane kufwà. Nwamònu anyì? Nènku mpindyewu s'ki dībà ndyòdi adi.

¹¹ Dilòòlò kampànda mvwa ngenda mpatuka mu èkèleeziyà ke muntu kampànda kwambaye ne: "Kaa, Mwanèètù Branham, ncyà bushùwà ne mvwa ngànyisha diyiisha adi."

Ki mèmè kwamba ne: "Twasàkidila."

¹² Nènku muntu kampànda mwimane ku ciibi aku, (kukaadi bidimu byàbùngì, lwà muneemu mu tabernacle emu) mwambi kampànda, kwambaye ne: "Èè, Nzambi àbèneshiibwe, mèmè ncitu muswè muntu nànsha umwe ungambila aci to." Nwamònu anyì? Yèyè ne: "Ndi muswè butùmbi bwònsò buye kùdi Nzambi."

Mèmè ne: "Èè, bìdi nàнку's." Nwamònu anyì? Ki mèmè ne: "Èè, mèmè's ntu munange aci, mèmè mwine." Mèmè ne: "Ncyà bushùwà ne mèmè ntu mucinange be." Ki mèmè ne: "Bikèngela ngambe bulelèlà."

Ki yèyè ne, kwambaye ne: "Èè, ncitu muswè bwà bantu kwikalabo bàngamba nàнку mèmè to, Nzambi àbèneshiibwè!"

Mèmè ne: "Kudi dishiilangana ànu dimwèpelè pankaci pàànyì mèmè ne wèwè: Mèmè ndi ne meeji matòòke pa bwalu abu, kàdi wèwè kwèna ne meeji matòòke to."

¹³ Muntu kanà yònsò ewu ùtu muswè... Wèwè mwangate mwànà mukèsè, umutwà makùmbu, yèyè's neènzè mudimu mutàmbe bwìmpè. Nwamònu anyì? Ncyà bushùwà. Nwamònu anyì? Nènku Nzambi, misangu yònsò, Ùtu muswè kwambila bàna Bèndè pàdìbo benza maalu mu mùshindù mujaalàme.

Nutu banange kubambila pàdibo benza bibi, nàнку awu mbwà cinyi kubenga kubàmbila pàdibo benza maalu mu mùshindù mujaalàme? Nwamònu anyi?

¹⁴ Pa nàнку ncyà bushùwà ne ndi nsàkidila Nzambi bwà mùdi Mwanèètù Neville mwikale mpaasàtà wa cisumbu cyà mikòòkò eci mu tabernacle emu. Ne pa kumòna muntu awu, wa mu nshindameenu wa ba-Méthodiste, ne lujòòkò bwà. . . Mòna's, mbyenze ànu bu muswè kudìila mu cilaminyi cyà nyama cyà cyanàànà. Pa nàнку. . .kàdi kujandula ku—ku Nyumà Mwìmpè munène, nènku mpindyewu kubwela mu mapà awu; ne mùshindù musheemàkàne ùdi Nyumà Mwìmpè ùkwàta nendè mudimu pàdiye kacyi ùkwàta mudimu ne meeji èndè yèyè mwine to. Tàngilàayi dyumvwija adi dilwa ànu ne cyona cìmwècìmwè, ne dibanda dipweka bìmwèbìmwè, bu mukàbà ne cilàmbà, ne bikwàbò, ne kucyàndamuna buludi cyàkàbìdi.

¹⁵ Nènku mwanèètù wa balùme mutekète ewu, ncyèna ngeela meeji ne ùdi. . .Junior Jackson. Èè, nènshaalè ànu mupùwe, Junie. Ndi nsàkidila Nzambi bwà Junie Jackson, ncyà bushùwà ne mwanèètù ewu ùdi ne dipà dinène dyà kùdi Mukalenge.

¹⁶ Nènku ikalaayi ànu misangu yònsò bashààle badipwekeshi. Mpindyewu, muntu ne muntu mu èkèleeziyà ùdi ne cintu kampànda cyà dyanza; kàdi kucikòkedi ku luseke bwà kwenza cikwàbò cintu to, cilekele cinwàngane ne bikwàbò byà mu èkèleeziyà abi. Mbwà Nzambi, bintu byònsò abi. Nwamònu anyi? Nwamònu anyi? Muntu yònsò kàjingi bwà kwakula mu myakulu to, muntu yònsò kàjingi bwà kwandamuna to.

¹⁷ Teetà bwà kwenza cintu kampànda cìmpè ne tũngunuka ànu ne kwikala mwìmpè; kwikadi ne lukinu to, kanwikadi ne lukuna to, kanulekediku bululu mu nwenù to. Muntu nànsha yèyè mubi wa bìshi ne nànsha wàkula bibi bwèbè bìshi, kumwelediku meeji mabi mu mwoyi wèbè to; bwalu ànu apu's dyabùlù neàdifye, ne kwenza cintu kampànda ànu mwab'awu. Cibwikidijaayi cyònsò ne dinanga dyà Nzambi, ditonda, ne dyakaja dyà maalu, ne dyenzela bàdi bakwenzela bibi abu maalu mìmpè. "Panwikala nwenzela maalu mìmpè ànu aba bàdi banwenzela bìmpè, mòna's," mwàkamba Yesù, "bampùblikànò kabàtu benza byà mwomùmwè anyi?" Nwamònu anyi? Bangènzàmpèkààtù, muntu kanà yònsò ewu's ùdi mwà kwenza maalu mìmpè kùdi aba bàdi bamwenzela maalu mìmpè abu. Kàdi ikalaayi bìmpè kùdi aba bàdi kabayi bìmpè kunùdi, enzàayi cintu kampànda bwà aba bàdi kabayi bafwànyine kunwenzela cintu nànsha cìmwè to. Amba dīyī dīmpè bwà muntu udi mufwànyine kwakula bibi bwèbè awu, nènku mu mùshindù awu udi upatula bululu bwònsò mu mwoyi wèbè; nènku misangu yònsò udi ànu mu dinanga ne bantu bònsò dībà adi, paùdi ànu kacya wàshààla mu dinanga.

¹⁸ Mpindyewu wèwè udi wamba ne: "Èè, bòbò's bààkenza. . ." Twètù katwèna nzuji to, Nzambi ke Mulumbulwishi. Kàdi

kwàkuswa bwà muntu mukwàte ne byà luse awu ipaciibwè nànsha, s' mmwòmò's? Ncyà bushùwà ne kî mmwòmò to, nànsha bôbò biikale banganyi. Kanwàkuswa aci to, pa nàнку teeta kwikala ne musàngeelu kùdìbo. "Ne dinanga dîtu disokoka musumbà wà mpèkaatù." Uh-huh. Eyowà's, mukalenge. Dinanga, ànu Dinanga dîmpè, dyà bwena Kilistò, dyà difwànà dyà Nzambi adi.

¹⁹ Muntu yêyè mulwe mukubiikile ne "munsantu mubunguluki wa mu malaba" ne mênà à mîshindù yônsò, mpindyewu—mpindyewu kwikadi wenza maalu bu cyôci aci to, wamònu's, pawikala kùyì mwà kwenza maalu mîshindù awu to, kwàta njila umùka ànu uye. Kàdi munda mwà mwoyi wèbe, bìvwa bìkèngela wêwè kufika mu mùshindù wà wamba ne: "Èè, cidi. . . mpindyewu, pàmwápa, mwanèètù, bu wêwè muumvwe, mu mùshindù wúndi mêmè muumvwe ewu, udi mufwànyîne kudyumvwa ànu bu mùndi dyumvwa emu's." Nwamònu anyi? Nènku ikala wêwè ànu nendè ne kalolo kàà menemene's, ne utùngùnuka ànu mùshindù awu. Kàdi nànsha twètù bafwànyîne kushiilangana ànu bu mùdi esètè mushiilàngàne ne wesètè, aci kaciyèna ne cìdici cishintulula to.

²⁰ Ànu mùmvwà ngamba dilòlò adi amu, ndi ne mwanèètù wa balùme kampànda utu. . . mmuntu wa mpolondo, Melvin; mmule, wa nsuki yà mitòòkoloke. Mpindyewu, katwèna bafwànàngane to byenze ànu bu katùyì ne bulongo nànsha bukesè to. Ne nzala yètù—yètù mmishiilàngàne, ne majinga ètu mmashiilàngàne; kàdi nànsha nàнку mamwéndè's mmamwǎnyì, tatwéndè's ntatwǎnyì, yêyè mmwanèètù. Nwamònu anyi? Bwalu tudi balediibwe mu dikù dimwè.

²¹ Mpindyewu, tudi bashiilàngàne. Melvin kî mmwena Kilistò to, ne yêyè mmunange ndundu, manayì à mbilu yà tubalu, ne bintu byà mùshindù awu. Nènku ndi—ndi ngeela meeji ne ùtu munange dyàmpà dyela bimuma ne shòkòlà, pa nàнку ndi mutwishiiibwe ne bwà apu kaayi tudi bashiilàngàne's. Nènku mêmè—mêmè ncitu munange manayì à mbilu yà tubalu anyi ndundu to, ntu munange kuloba ne kulemba. Nwamònu anyi? Nènku yêyè kèna mufwànyîne kulenga cyèndè cyanza ku abi to, ne mêmè ncyèna mufwànyîne kulenga cyànyì cyanza ku abi to. Pa nàнку, nwamònu's, kàdi's yêyè ùtu munange dyàmpà dyela bimuma ne shòkòlà kàdi mêmè ntu munange dyàmpà dyela cèrise. Nènku dîbà adi. . .

²² Mpindyewu, ncyèna munkaci mwà kulomba to, nwamònu's. Kàdi ngákamba cyôci aci musangu kampànda mu disangisha mwaba kampànda, ne mvwa munange dyàmpà dyela bimuma ne chocolat, nènku dilòlò dyàkalonda mêmè kudisangana ne màmpana ataanu meela shòkòlà. . . anyi màmpana meela cèrise, ne mêmè kudisangana ne màmpana anaayi anyi ataanu à meela cèrise àvwa bânà bèètù bàà bakàji benze ne bantwàdile. Ekèlekèle! Kàdi ke twètù kutwà cyanga mu cibambalu cyànyì amu's!

Kàdi, mêmè—mêmè ncyêna nswa kucyàmba mu meeji awu to. Nwamònu anyi?

²³ Pa nàнку ndi musweè ànu bwà kunuleeja dishiilangana, nudi numòna's. Kàdi nànsha yêyè mwikàle wa bìshi, mêmè ndi mumunange, yêyè mmwanèètù. Ne pa nàнку yêyè kí mmwena Kilistò to bwalu ùdi ùmwènena bintu mu bukênkè bukwbò, mêmè ndi mmwènena bintu mu Bukênkè bwà Kilistò; kàdi nànsha nàнку ncyêna mwà kwamba ne kí mmwanèètù to, bwalu tudi bânà bàà muntu balediibwe mu dîkù dimwè.

²⁴ Mpindyewu, dilòlò dishàale, mwawa mwakule diyì kampànda ku ndekeelu. Nènku vùlukàayi mpindyewu ne, mukenji wà kumpàla wàkalwa mu èkèleeziyà paanyimà pàà eyi yinùdi bamanye, pa kuumusha wà mu Kentucky mwàmwa, civwa ne nekwikale bintu byà kabiyì byumvwika mu disangisha edi biikalà mwà kupapula bàabúngì. Nudi bavùluka aci anyi? Cidi pa mukàbà wà méyì, mpindyewu. Nwamònu anyi? Makèlèlè dilòlò cimwè cyà ku byòbì cyàkabuuludiibwa. Pa nàнку kwenzaci bu ciimane ànu bwà katanci cyanààna, kàdi ndi mutwishibwe ne nudi bacyùmvwe; bwalu Nyumà Mwimpè wàkatwala, aci civwa ne cyà kwikala cyà ne: “iferno wa Cyendèlèlè, cintu bu nàнку kacituku mu Bible to.”

²⁵ Kakùtu iferno wa Cyendèlèlè nànsha umwe to. Wèwè ne wa Cyendèlèlè. . . Wèwè mwòshèke mu iferno bwà Cyendèlèlè, dîbà adi's bìdi bikèngela bwà wèwè kwikala ne Mwoyi wà Cyendèlèlè bwà wèwè kwikalamu, pawikalà ne mwoyi. Ne kùdi mùshindù wa Mwoyi wa Cyendèlèlè ànu umwèpelè, mwinawu n'Nzambi! Nwamònu anyi? Pa nàнку, ne dîbà adi Bible kèna ulongesha iferno wa *Cyendèlèlè* to, ùdi ulongesha yêyè iferno “wa kashidi.” Aci ncifwànyine kwikala munda mwà bidimu mìllyò binunu dikumi, ncyêna mumanye to, kàdi cidi ne cyà kujika.

²⁶ Bwalu bivwa bikèngela bwà mêmè kuCibwejamu. Ndi nCilama kule ne maèkèleeziyà ne bikwbò mu mùshindù wà ne ndi. . . bwalu abu mbuntangile bwà mêmè kuBwàmba. Ne pashìshe kùdi bintu byàbúngì mwab'ewu bìdi binkumbanyine bwà mêmè kuByàmba, nènku pashìshe dilòlò dyònsò tudi tubìpeta.

²⁷ Kàdi mpindyewu, kubangila ànu dilòlò edi, nùbangàayi kutèeka ngelèlù wenù wa meeji wa nyumà, nudi numòna's, lekèlaayi Nyumà Mwimpè aCibweje ànu bikolè. Nènku dîbà adi wèwè mutèeleje kàdi kùyì upetangana naaCi to, kwata ànu njila uye wamba ne: “Mukwàcikwètù Mwanèètù Branham mwenze ne luse ewu, ncyà bushùwà ne yêyè—yêyè kèna mumanye to. Mêmè nèmumusambidilè.” Nènku udi wenza nàнку, ne pashìshe nèngìkalè. . . Mukalenge neàmmanyshe cidi Bulelèlè dîbà adi, kàdi nguumvwila wèwè ànu luse, ne kù—kùngiimanshiku to. Pa nàнку aci ncifwànyine kwikala cyà bushùwà, kabidi, kàdi,

kaa, mêmè's ndi mpicila mu cikondo cîmpè be pândi ncyelela meeji mu mûshindù ewu. Pa nàнку cidi ànu cyenza ne ndekeelu ne ndekeelu yitwilangane. Nènku mêmè, kaa, ndi—ndi mwà kwikala mutùpàkàne; kàdi kùdi mwà kwikala cilema mwaba kampànda awu cîndi nciyi mumanye to, nàнку pàmwàpa wêwè udi mumanye, kàdi nsambidileku bwà Mukalenge àcindeeja.

²⁸ Nènku mpindyewu, ne kumutù kwà byònsò, tùngùnukàayi ne kusambidilangana muntu ne mukwèndè ne kanulekedi dyabùlù uleeja bululu nànsha bùmwe ní mpenyi ní mpenyi to. Nwamònu anyi? Lamàayi misùukà yènù mikezùke mu dîbà edi, bwalu tukaadi mu mēbà à ndekeelu à maalu-malonda à buloba ebu. Nwamònu anyi? Tukaadi ku ndekeelu, balunda bàanyi, kakuyi mpatà nànsha mikesè to.

²⁹ Patùdi twenda tupweka ne bikondo byà èkèleeziyà ebi apa, netwikale mwà kujandula ànu mu katanci emu, ne pàmwàpa byàbùngi menemene byà cyôci aci dilòòlò edi. Tudi mu mûshindù kampànda tutwà mpànda bwà kupeta nshindameenu mwaba ùdi ùkèngela bwà kucikomeshila, nènku mpindyewu mu dilòòlò emu tudi tubuulula bimwè bintu byà nyumà menemene. Nwavùlukaayi mpindyewu ne, ngàcyàmbi ne, nebikèngele bwà nwènù kulwàta ngeelelu wenù wa meeji wa nyumà awu's. Kàdi tàngilàayi Mifundu, bìdi bikèngela cìkàle *mu* Mifundu, ne bìdi bikèngela bwà kwikalabi *eku ne eku* kwà Mifundu. Nwamònu anyi? Mpindyewu vùlukàayi ne. . . Ànu dimanya dyà Diyì, dyà kwamba ne: “Èè, mêmè ntu muye mu kàlaasà katùmbuke. Mêmè ntu muye ku cilongelu cyà Bible. Mêmè ntu muye ku tulaasà tutùmbuke.” Aci kaciyèna ne cidici cyàmba to. Bàfaalesà bônso ne Basadoka bààkenza cintu cimwècimwè aci, kàdi kupangilabo kumanya Yesù ku miliyò ya kilòmèètà. Nwamònu anyi?

³⁰ Mifundu, dibuulula dyà Mifundu: “mbisokoka ku mèsù à beena meeji ne badimùke, kàdi cisokolwela bânà bakesè bu bàdi baswe kuyiila.” Nàнку awu wêwè ne mêmè twikale bânà bakesè ne tuumushe ànu bujitu bônso mu myoyi yetù, ne twambe ne: “Mukalenge, Wêwè—Wêwè utwambile, ne twètù—twètù tudi tutèeleja.” Ne pashiishe kubakula ngangàcìlù wa mu nyumà. Mpindyewu nwavùlukaayi ne, mèyi ikalà mwà kwambiibwa kubangila dilòòlò edi, nubakule ngangàcìlù wa mu nyumà, bwalu tudi tubwela mu cikondo cyà èkèleeziyà cinène cyà kaciyi cyùmvwika to.

³¹ Mpindyewu, ngeela meeji ne kwajiki. Mpindyewu vùlukàayi ne màalabà dilòòlò, netwàkule pa cikondo cikwàbò cyà èkèleeziyà dilòòlò dyònsò. Nènku ndi mutwishiibwe ne tudi bafwànyine kwikala ne dîbà dyàbùngi màalabà bwà kupicishila ditùkù dijimà pa cyôci eci, ne pashiishe màalabà dilòòlò kàbidi. Kàdi, nwamònu's, bààbùngi bàà kùdìbo nebìikalè benza mudimu nènku nènteetè ànu kufika ku bikùmà mene byà mukenji ewu, kulenga myaba minène yidi myakula mwab'ewu eyi, yinùdi mwà kwangata ùmwè wayi ne kutùngùnuka ànu nawù, kuwàkula

mu mùshindù wà kakùyi mwà kwamba kwàyàwu kashiikila to. Nudi numòna anyi? Kàdi. . . Nènku pashiishe nudi nucilonga kumbelu, nènku nêngiikalè nnusambidila, ne nwênù nwikalè nunsambidila, nènku Nzambi utùbènesha bônso pàmwè bu bânà Bèndè bàdi biitabuuja.

³² Mpindyewu kumpàla kwà twètù kubanga, ndi ndikonka ní kî mbifwànyineku kwikala binùkolèle menemene bu twètù mwà kjuukilaku kuulu.

Kàdi nudi bamanye ne mbwà cinyi mémè ntu muswè kwimana kuulu bwà kusambila anyi? Yesù wàkamba ne: “Panùdì nwimana kuulu, nusambila, sambilaayi ne: ‘Taatu wetù Udi mu Dyulu.’ Nànku fwilanganàayi luse muntu ne mukwèndè.” Nudi numòna anyi? Nènku pashiishe Gidèonà wàkasungula cilwilu cyèndè musangu kampànda ku aba bàvwà biinama ne bakonama bwà kulaka màyi abu, anyi aba bàvwà biimane ne bangata màyi abu. Nudi numòna anyi? Nànku awu aba bàvwà bapona panshi, bàvwà—bàvwà bapona mikookwela bóbò biine kumpàla kwà mpìngù, ne ùvwa mumanye ne kabàvwa bakùmbanyine mwà kuya to. Pa nànku, ewu uvwa wimana ne mèsù èndè atangila díbà dyònsò. Ki mutùtù twenza nànku, twimana kuulu tusambila. Mpindyewu, mémè ntu ngiitabuuja mu ditwà dyà binù ne kusambila, kàbidi; kàdi, kwimana ne kusambila, ngeela meeji ne cidi ne mushinga wàbùngi bwètù twètù, mu mùshindù kampànda anyi kansanga.

Twinyikàayaaku mitù yètù mpindyewu, mwoyi ne mwoyi wònsò mwinyika kàbidi:

³³ Taatu wa mu Dyulu wa ngàsà, patùdì tuseemena mpindyewu apa byà kakùyi tuseku to ku Nkwasa Webè wa bwakàne. Ne katwèna tulwa kuKulòmba bwà kutwènzela cidi cijalame to, bwalu tudi bônso bafwànyine kwoshika, kàdi nyewu tulwa, tusengeleela “Luse, Éyi Mukalenge!” Twicikijile pambidi pèètù, dilòdò edì, Nyumà Webè Mwimpè; kabiyi ne mbwalu tudi bakùmbanyine to, kàdi mbwalu katwena bakùmbanyine to, ne tudi bacimanye ne tucijingulula, ne tulwa kabiyi mu dîna dyètù twètù biine, bwalu kî ndikùmbàne to. Katwèna ne bwakàne, anyi—anyì cintu nànsha cìmwè to, bwètù bwakàne butambidile mbufwànyine kwikala mbondyà yà manyaanù ku mèsù Kwèbè. Pa nànku tudi tulwa ne kudipwekesha kwònsò mu Dîna dyà Mukalenge Yesù, tulwa Nèndè kumpàla kwètù, Mashi à cipungidi Cyèndè, baÀmbule pa myoyi yètù, twamba ne: “Nzambi, ikalaku neetù luse twètù bangènzàmpèkààtù bàdi basengeleela bwà luse mu díbà dyà dikènga.” Ne, dîngà ditùkù dyàyiishiibwa diyiisha dyà ndekeelu, katwèna bamanye ne neciikalè díbà kaayi to; cikondo cyà ndekeelu cyèdiibwa lubila mu mpeepèlè; Bible neàshaale mubwikila pa cyambilu; byà mvità byungwija; ne tungonga twà diimanyika dyà mvità munkaci mwà kudila; díbà nediikale munkaci mwà kubwela.

Éyì Nzambì wa yààya! Pashiishe nsokòkèku, Éyì Lubwebwe lwà Bikondo, mu dîbà adi.

³⁴ Nènku tudi tumòna ne kakwèna kwà kupandukila mpindyewu to, cintu nànsha cimwè ànu ku Wèwè. Tudi tumòna matùnga adi àpanduluka. Tudi tumòna Bible mûle. Tudi tumòna Izàlèèlà utabuluka. Tudi tumòna Mukenji kudi Èkèleeziyà. Ne dîbà dikaadi pabwîpì menemene ne kujika, ku cikondo cyà bintu binène kubuuludiibwabì, ne Bitampi Mwandamutekète bikàngùdiibwe.

³⁵ Nzambì, Nzambì, Éyì Nzambì wa yààya, ikàlàku neetù luse, tudi tulòmba luse. Nènku bu musadidi Webè, ndi ndòmba luse bwà muntu ne muntu udi mu Bwikadi bwà Nzambì dilòlò edi. Nzambì, swàku bwà kakwikadiku muntu nànsha umwe munkaci mwètù udi ne mpèkaatù mu musùkà wèndè to, kàdi swàku bwà yèyè àsukudiibwe ànu mpindyewu ku Mashì à Mukalenge Yesù, bwà twafwànyina bônso kutwìlangana mu mwaba wà disànkà divule awu dyàmwamwa dyà dyulu.

³⁶ Nènku pândi nkalenga Mufùndu ewu dilòlò edi, Taatù, kaa, ncyèna mukùmbane to. Nzambì, kakwèna nànsha umwe wa kutùdi udi mukùmbane to. Twètù tudi twitaba ne katwèna bamanye kantu nànsha kàmwè to, Taatù, kàdi tudi tweyemena kakùyì tuseku to Nyumà Mwîmpè bwà Wàmònaku mwà kutùbuulwilaci. Bu mutùdi tukùtulula ku dimanya dyètù—dyètù dyà mu mutù dyùdi Wèwè mutùpe, maalu-malonda, Nyumà Mwîmpè atùpèku ngàngacilù wa mu nyumà mu myoyi yètù. Enzaku nànkù, Taatù, bwalu tudi baKutàngidile mu Dîna dyà Yesù Mwànà Webè. Amen. Nudi mwà kusòmbaayi.

³⁷ Mu nshapità mwi2 wa Mukàndà wa Bwàkabuulwibwà, ne èkèleeziyà mwibìdì, cikondo ciisàtù cyà èkèleeziyà. Kubangila. . . [Mwanèètù wa bakàjì kampànda ùdi wàkula mu mwakulu mukwàbò—Muf.] Mfwilaayiku luse.

³⁸ Taatù wetù Udi mu Dyulu, Dîna dyèbè dijidiibwè. Bukalenge Bwèbè bulwe, diswa Dyèbè dyènzeke, pa buloba bu mùdidi dyènzeke mu Dyulu. Tudi tuKulòmba bwà wikale neetù, Taatù, ne kutùbènesha, ne kutùkwacishaku bwà kwikala baa lwàpàngànzùbu bàà meeji mu edi dîbà dyà dikènga dinène munkaci mwà bantu. Pàdi cibwejakàjì ne byònsò munkaci mwà kutùngunuka ne kwenjiibwa, utùkwacisheku bwà twètù kwikala batàmbe bwîmpè, Mukalenge, bwà kwikala basadidi Bèèbè mu Dîna dyà Kilistò. Amen.

³⁹ Mpindyewu, ngàmbi aci dyàmbedi ne, bwà nwàmòna mwà kumanya. Nwamònuku ne dyumvwija kî ndilwa ku Dìyì anyì? Mwanèètù wa bakàjì uvwa mulaabiibwè kùdi Nyumà Mwîmpè, kakùyì mpatà to, kàdi yèyè wafidi mukenji paanyimà pàà Dìyì dimane kupatuka, nudi numòna's. Bìvwa ànu ndambù kule ne bulongame bwà cintu aci. Mpindyewu, aci's civwa ànu cîmpè, mwanèètù wa bakàjì munanga, nànsha wèwè mwikale nganyi.

Nyumà Mwîmpè nguvwa pambidi pèèbè, kaa, mbikolè be bwà kudikànda mùshindù awu's, ndi mumanye. Bidi ànu bu... Anyì paùdi wamba cintu kampànda cikwàbò ne... Nwamònu's, kàdi's bìvwa ànu bîmpè; kàdi pàmwäpa uvwa mucyümvwè kumpàla mene kwà twètù kubanga, nudi numòna's. Nènku ki bwà cinyì, nwamònu's, cidi cyàlukila pàdi Nyumà munkaci mwà kukwàta mudimu. Nyumà yà bambi bàà bipròfetà yidi yìkòòkela bapròfetà, nwamònu's. Ki wèwè awu's.

⁴⁰ Mpindyewu, pàmwäpa Nyumà Mwîmpè ùdi ukulaaba cyàkàbìdi, ànu... Ndi ntékemena ne Yèyè neénza nàнку, ànu paanyimà pàà disangisha dimane kujika. Kàdi nutàngila mùdi dyumvwija dilwa, nwamònu's, bwalu bìvwa mwà kwikala mu bulongame díbà adi, nudi numòna's; kàdi tukaadi ànu tuseemena ku Dìyì, nudi numòna's, mwab'ewu. Pa nàнку, mpindyewu, aci cívwa bulelèlè cyà Nzambi, bulelèlè bìvwa nàнку menemene; ndi ncìtabuuja ne ncyumvwa ne mwoyi wanyì wònsò, bwalu mèmè ndi muumvwè cikùmà cyàbu, nudi numòna's. Kàdi Nyumà Mwîmpè... kacívwa díbà to. Yèyè ùdi ne mukenji kùdi mwanèètù wa bakàji bwà èkèleeziyà, kàdi *apa's* ki pàdiYe munkaci mwà kukwacila mudimu ne Mukenji Wèndè mpindyewu. Nudi numòna's, Yèyè kààkuDìbwejakajaku to, Yèyè ùdi utèeka bintu byònsò mu bulongame. Ndi mutwishiiibwe ne muntu yònsò mmuumvwe, nudi numòna's, aci's ncyà bushùwà.

⁴¹ Mpindyewu mu—mu nshapità mwi2 wa Mukàndà wà Bwàkabuulwibwà. Nènku tudi... Tudi tubanga dilòòlò edi ne—ne Cikondo Cyà Pègàmò, nshapità wa 12. Mpindyewu, makèlèlè dilòòlò tuvwa bashiile ku mvensa wa 11:

Ewu udi ne maci, ùmvwè cidi Nyumà wàmbila maèkèleeziyà; Ewu wàcimuna kààkukengeshiibwa kùdi lufù lwibidi to.

⁴² Mpindyewu, mu cikondo cyà kumpàla cyà èkèleeziyà, tudi basangàne ne beena Nikàlàwù bààkabangilamù. Nzambi wàkaDìbuulula bu... Yesù wàkaDìbuulula bu Nzambi wa Bukolè bwònsò: kakùyì mukwàbò to, kakùyì bitùpà, kakùyì bipese byà Nzambi to, Yèyè ùvwa Nzambi nkààyende.

⁴³ Mpindyewu, mu cikondo cyà èkèleeziyà cyà makèlèlè dilòòlò, tudi tusangana ne Yèyè ùvwa mwimane ku ciibi ne Wàkafùndila èkèleeziyà bintu ebi, ne kubambila bwà bupèlè bwàbò. Kàdi Yèyè wàkamba ne bàvwa ku... beena Nikàlàwù aba, ne bikwàbò, bàvwàYe mukìne abu's.

⁴⁴ Makèlèlè dilòòlò awu bàvwa... bàvwàle cifulu cyà butùmbi cyà mufwile diitabuuja. Wàkabàmbila bwà kabiiikadi ne bwòwà, too ne ku lufù, bwà ne Yèyè neikale—Yèyè neikale naabo. Ki pashiise ku ndekeelu aku kwambaYe ne: “Ewu wàcimuna! Ewu wàcimuna kààkukengeshiibwa kùdi lufù lwibidi nànsha.”

⁴⁵ Mpindyewu, piikalaku lufù kampànda, ne tudi balumanye, díbà adi bidi bikèngela kwikale lufù lukwàbò mwaba kampànda;

bwalu lufù lumwèpelè tudi tulùfwa kaaba aka mu mubidi, lufù lwibìdì tudi tulùfwa mu nyumà, mu musùukà. Cìdi ne: “Ne musùukà ùdi wènza mpèkaatù ki wàfwà bulelèlà.” *Kufwa* kùdi ànu ne: “kakùyì mpatà to kuumuka ku bintu byònsò;” nudi numòna’s, udi—udi... *Lufù* mbwena kwamba ne: “kuumushiibwa, cidi—cidi—cidi nkutwàdiibwa kule, kusokokiibwa kule.” Dìbà adi pàtù bananga bèètù bafwa, kabacyènakù kàbìdì to bwà ku dyètù dimanya. Tudi tubiikila aci ne n’lufù.

⁴⁶ Kàdi mwena Kilistò kàtu ùfwa to. Kakwenaku Mufùndu nànsha umwe wà ne mwena Kilistò ùtu ùfwa to, bwalu yèyè ùdi ne Mwoyi wà Cyendèlèèlè. Pàdì ngènzàmpekaatù ùfwa, kwèndè kwàjìkì, ne ndekeelu wa byònsò musùukà wèndè ndekeelu wa byònsò wùdi wùfwa. Kàdi pàdì mwena Kilistò yèyè ùfwa, yèyè mmwindile ànu bwà kwalukila cyàkàbìdì ne Yesù. Kaa, ndi ntèkemena ne nêngiikalè ne dìbà dyà kufika ku cyòci aci kundekeelu kwà cikèènà-kumòna eci dilòòlò edi, kutwàlukilà aku’s; nènku nenùcimòne, mùdici citwala cintu cimwècimwè cyà lufù lwibìdì aci. Nshapitá umweumwe mutùdi dilòòlò edi ewu ùdi utwala cintu cimwècimwè aci, ne dyangaciibwa dilenga dyà kacya mwab’ewu.

⁴⁷ Mpindyewu—mpindyewu, dilòòlò edi, netùbalè mukàndà mumfùndila ewu ne lukàsà lwònsò, bwalu ndi ne àmwè—àmwè mamanyisha à mu maalu-malonda àtùdi tujinga kufikaku dyàmbedi, bwà kuteeta kubenga kunulama ntàntà mupitepite bule. Mpindyewu, ku... paanyimà pàà masangisha aa mamane kujika, dìbà kanà dyònsò dìndì mbala eci lukasalukasa, panwikala baswe kupeta ngangàcilù wa cyòci aci; Mwanèètù Mercier ewu ùdi naaci cyònsò, ndi mmupèesha yèyè tubeji tufùnda; nènku ùdi mwà kwikala naatù bwalu ùdi munkaci mwà kufùnda mukàndà awu, yèyè mmufwànyine kunùpa cintu kanà cyònsò cinùdi bamanye... cinùdi—cinùdi baswepù aci. Aci’s ncifwànyine kwikala cimpè, Mwanèètù Mercier.

⁴⁸ Mvensa wa 12:

Fundila mwanjèlò wa èkèleeziyà wa Peegàmò ne: Mòna maalu àdibo bàmba kùdi ewu udi ne mwele wà mvità mutwisha nseke yìbìdì;

Ndi mumanye byenzedi byèbè, ne mwaba wùdi musòmbèlè, nànsha mene... nkwasà wa Sàtaanà... ne udi mukwàte bikolè dìnà dyànyì, ne kwena muvile diitabuujà dyànyì to, nànsha mu matùkù àwwa Antipas wanyì muvile diitaba awu, wàkashipiibwa munkaci mwènù awu, mùdi Sàtaanà musòmbèlè.

Kàdi mèmè ndi ne ndambù wa maalu àndì nkudyula nawu, bwalu wèwè udi ne aba bàdì bakwàte ku dilongesha dyà Baalàmà, wàkalongesha Balàka bwà kuteeka dibwe dyà cilèndwishi kumpàla kwà bàna bàà

Izàlèlèlà awu, bwà kudyàbo bintu bilambula mpingu, ne bwà kwendabò masandi.

Nàнку wèwè udi kàbìdì ne aba bàdì bakwàte ku dilongesha . . . (cìvwa mbyenzi kale wàwa mu Efeso, mpindyewu cikaadi “dilongesha”) . . . dilongesha dyà beena Nikàlàwù, . . . (Nudi bavùluke ne mvwa munùlondele cyòci aci dilòòlò adi, mùshindù ùvwabi bifike ku cyòci aci anyi? Byenzi mu Efeso, mpindyewu cidi “dilongesha”) . . . ò—dilongesha dyà beena Nikàlàwù, bintu bìndì mèmè mukine. (Uhm!)

Nyingalala; anyi cyanààna néndwè kùdì ne lukàsà lwònsò, ne nembalwishè . . . (kaciyi Èkèleeziyà mulelèlà to) . . . bòbò ne mwelè wà mvità wa mukana mwànyi.

Ewu udi ne macì, ùmwè cidi Nyumà wàmbila maèkèleeziyà; Kùdì ewu wàcimuna nèmmpèeshe bwà kudyà manà masokoka, ne nempupèeshe (yèyè) dibwe ditòòke, ne mu dibwe amu dìnà dipyadìpyà difunda, didì muntu nànsha umwe kàyi mumanye to ànu ewu udi udyàkidila awu.

Mpindyewu Mukalenge àsakidileku mabènesha Èndè ku Cyòci eci, ne àtukwacisheku mpindyewu patùdì tuteeta apa.

⁴⁹ Mpindyewu mu nshindameenu wa èkèleeziyà ewu. Ncikondo ciisátù cyà èkèleeziyà, cìdìbo babiikila ne m’Peegàmò. Ne ma—matùkù àvwa èkèleeziyà ewu mwikalanganeku àvwa nkuumukila ku cidimu cyà 312, 312 paanyimà pàà lufù lwà Kilistò too ne ku 606.

⁵⁰ Cikondo aci cìvwa ne: dilongesha dyà mashimi, Sàtaanà ushima, cishimikidi cyà bukookeshi bwà ciipaapà, ne dibaka dyà èkèleeziyà ne mbulamatadi.

⁵¹ Difutu òvwa ne: manà masokoka, dibwe ditòòke.

⁵² Nènku mùtootò awu, mwanjèlò wa èkèleeziyà ewu, bilondeshile byònsò bìvwa Nyumà Mwìmpè mwà kunganyishila bwà kwenza, ndi mwangate Martin Munsantu. Cìvwa di—dibuulula dimpèesha pa bwalu abu, bwalu ndi mubale bwà bansantu bakwàbò bàà ciine cikondo aci. Mèmè kwangata Munsantu Martin bwalu ùvwa muntu wa difwànà dyà Nzambi, ku dyànyi dimòna yèyè ùvwa mupostòlò misangu dikumi kutàmba mùvwà Patrick Munsantu amu.

⁵³ Mpindyewu, Patrick Munsantu ùvwa mwànà wa balùme wa mwanaabo ne Martin Munsantu; mwanaabo ne Martin Munsantu wa bakàjì ke uvwa mamwéndè wa Patrick Munsantu. Ne Martin Munsantu ùvwa . . . mu bushùwà bwà bwalu, awu ùvwa m’mansèbèndè wa Munsantu Patrick.

⁵⁴ Mpindyewu, mwoyi wèndè ùvwa kubangila ku cidimu cyà 315 too ne ku 399 paanyimà pàà lufù lwà Kilistò. Mpindyewu ki cidi cyenze ne mmwangate pamutù pàà bansantu bakwàbò

bàà ditùkù adi, bwalu bwà mùshindù wàkaditwàlaye. Nènku ku disonsodiibwa dyà Nzambi, mèmè ncyèna ngiitabuuja ne . . .

55 Mpindyewu, èkèleeziyà wa Kàtòlikè kààkamuvwijaku munsantu to, kabààkamujungulula to, nènku ki kabingila kakwàbò kangààkamwangacila. Uh-huh, uh-huh. Nènku aba bônso batùdi tumòna aba, bàvwà ne mudimu wa bwambi wa nyumà abu, èkèleeziyà wa ku cibangidilu wàkabàbenga. Èkèleeziyà wa—wa beena Nikàlàwù wàkabàbenga bwà bintu ebi: bóbò bàvwa bàà nyumà. Nènku anu mungàcizòdi kaaba aka, Èkèleeziyà ùvwa munkaci mwa kufinakajiibwa ne dilongesha dyà beena Nikàlàwù divwa mu—divwà mu ciibúngì; ne Èkèleeziyà mulelèlè ùvwa wa banyààbanyà, ki mùtùbi misangu yònsò.

56 Ne ànu mungàmbi ku cibangidilu amu ne, ùvwa n'Yesù wàkamba ne: “Kanuciinyi to, nwènu kasumbù kakesè kàà mikòòkò, ndiswa dimpè dyà Taatù wenù bwà kunupèesha Bukalenge.” Ki bwà cinyi ndi ngàngata Bukalenge ebu bu Bukalenge bwà nyumà. Nènku tudi . . . tudi ne Bukalenge bwà nyumà, ne tudi ne disànkà dyàbúngì bwà bwalu abu, ne bwà Mfùmù mu Bukalenge ebu's. Vùlukàayi ne, Yèyè ki Mfùmù wa bansantu (*bansantu abu's*), Yèyè's ki wabò Mfùmù udi ubàlombola.

57 Mwoyi wa Martin Munsantu uvwa . . . ng'ewu wà ku nsòmbelu mutàmbe bunène mùle ntèntè ne bishimà wa ní nganyi ní nganyi mu bikondo byà èkèleeziyà. Kuumukila ànu ku Pòlò Munsantu kwaka, ùvwa umwe wa ku bantu bàà batàmbe kwikala bàà nyumà. Ùvwa . . .

58 Cìmwè cyà ku bishimà byèndè byà kumpàla cìvwa . . . Yèyè ùvwa mùsàlaayi, bangabanga, ngeela meeji. Ne pashìshe ditùkù dikwàbò ùpicila mwaba awu nènku kùvwa muntu kampànda . . . Muntu kampànda—kampànda mulàale panshi apu, mukwàte mashika ne ùzakalala, ne bantu bônso bàvwa baswe . . . anyi, kabàvwa baswè to, kàdi bàvwa ne mùshindù wà kukwacisha muntu awu, bàvwa ànu bàmpupita bu mwàkènzabo kùdi mwa—mwakwidi ne beena Lewi mu bwalu bwà *Mwena Sàmaleyà Wà Luse*. Kàdi pààkopicila Martin Munsantu mwab'awu, ujingulula mudimu wèndè bu mwena kwitabuuja mwena Kilistò, ùvwa ne cinkùtu ànu cìmwèpelè, ne cibwikilu pa makaaya èndè, kucikosaye mu bitùpà bibìdi ne mwelè wèndè wà mvità ne kufila citùpà cyàci aci kùdi mulòmbi wa kààpaluse awu, kwangataye cikwàbò citùpà aci. Nènku bufùku abu ki bwàkabangà mudimu wèndè, bwalu, Yesù Kilistò wàkamumwenekela, mu cikèenà-kumòna, mudijìngile mu cinkooci cìmwècìmwè cìvwaye mukose mu bitùpà bibìdi aci's; cyàkakumbaja Mufùndu ne: “Mu cyònsò cinùdi benzèle aba aci, Mèmè ngunùdi bacyenzèle.”

59 Pa nàнку angàtaayi aci bu dileesòna. Cyònsò cyùdi wenzela muntu kampànda, ùdi ucyenzela Kilistò. Vùlukàayi

ànu nànkú's. Mpindyewu nwènú. . . Twǎnjàayi kwamba aci pámwè [Mwanèètù Branham ne disangisha bàdi bààkula cyàpámwè—Muf.]: “Cinùdi nwenzela bakwàbò aci, unùdi benzèle n'Kilistò.” Nànkú nànsha yèyè wela meeji kaayi bwèbè wèwè, cyùdi wèwè wela meeji bwèndè yèyè's ki cidi ne bwalu, wamònu's, aci ncidi cìtwàla dibènesha.

⁶⁰ Aci's ki cìvwa cishimà cyèndè cyà kumpàla ne ntwadijilu wa mudimu wèndè wà bwambi. Kùdi byàbúngi be, ndi—ndi mufwànyine kupangila díbà dyà kubyàmba's. Bwalu ndi muswè bwà nwalukile màalabà dilòòlò ne dilòòlò dyònsò, pa nànkú ncyèna muswè kunùlama ntàntà mupitèpìte bule to.

⁶¹ Èyo, cishimà cidi cìlondà cìndi musungùle bwà kwakulapu dilòòlò edi.

⁶² Kakùyi mpatà to yèyè ùvwa muditwe mu kushimbula cimpàngaanù, ne ùvwa ulwishangana bikolè menemene ne èkèleeziyà wa Loomò. Kakùyi mpatà to yèyè kàvwa upetangana ne bèepiskòpò bònsò bàà èkèleeziyà wa kumpàla wa Loomò abu, yèyè. . . bàvwa benda babwela mu maalú a buloba ne bikwàbò byà mùshindù awu, kàdi yèyè kubàkandameena. Ncyà bushùwà ne yèyè kàvwa upetangana naabò to. Cìvwa ncishimà mwàkikalaye mene ne mwoyi mu bikondo byà mùshindù awu abi's. Mpindyewu. . .

⁶³ Kàdi díngà ditùkù ùvwa munkaci mwà kushimbula mwaba wà micì yà cimpàngaanù, ne ubumbula cyoshelu cyà cimpàngaanù, nènku kùvwa mucì munsantu ku mpengà kwà cyoshelu cyà cimpàngaanù aci. Ke yèyè awu munkaci mwà kushimbula mucì awu, kàdi bààbúngi bàvwa biimane mwab'awu bàvwa bàcìkandameena. Yèyè ne: “Pìikalabi ne mèmè ndi muntu wa Nzambi. . . Nswìkilaayi ku luseke lùdi mucì awu mweyèmene kàdi nulekele mucì awu ùngupùkilebi. Pìikalabi ne mèmè ndi muntu wa Nzambi. . . Mèmè nciyi muntu wa Nzambi to, mucì awu newùnshipè. Mèmè mwikale muntu wa Nzambi, Nzambi wanyi ùdi mwà kukònyangaja mucì awu kuwùtuma luseke lukwàbò.” Kadyòmbò keètù kàà menemene aka's wè! Ki kubangabo kukosa mucì awu; nènku mucì mmwenze ànu ubanga kudishinda, kukùdimukawù ne kushipa musùmbà wà babandidi abu. Nzambi kuwùkonyangaja kuwùtàngija ku kakùnà. Cishimà's! Kaa, díbà dyònsò kùvwa bishimà mu masangisha èndè.

⁶⁴ Cishimà cikwàbò cìmvwà mwele meeji bwà kwakulapu, cìvwa mmwànà wa mu dibòko mufwè wakalààdilaye awu. Ki kubùikaye ne kwalukila ku mwoyi cyàkàbìdi, paanyimà pàà yèyè mumane kusambidila mwànà awu bwà katanci kampànda.

⁶⁵ Cìkwàbò cidi cimpìcile mèmè's, cìvwa cyà mfùmù wa bumfùmù bwalàbàle awu. Nènku ùvwa ne cyà kushipa bàmwè bàà ku bantu bàà Nzambi bàvwa bùle tètè ne Nyumà Mwìmpè. Nènku mu bushùwà bwà bwalu yèyè nguvwa dibòkò dyà

bukolè dyà—dyà mwèpiskòpò wa èkèleeziyà wa kumpàla wa Loomo, mwine musangu awu, ne yêyè ke uvwa bushùwà paapà bangabanga ne kubùikidiibwayè paapà. Dìna dyèndè ùvwa D-a-m-a-s-u-r, ne ùvwa ushipa beena Kilistò bônso bavwaye mwà kutwà byanza bwà kushipa abu's. Nènku—nènku mukàji wa mfùmù wa bumfùmù bwalabale ewu, ùvwa mumpàngaanù, ne mîdimà mibwikidije mwoyi wèndè yêyè mwine.

⁶⁶ Nènku pàakalwà Martin Munsantu wa cijila ewu bwà kwakwilangana, mukàjèndè kudyànjilaye kumudimwija ne yêyè ùvwa mufwànyine kuteeta kwakwila beena Kilistò aba bwà kabàbàshipi nànsha. Mu bushùwà bwà bwalu, ndekeelu wa byónso mmwenze ufika kudiye aku, kabyàkenza bwalu nànsha bùmwe to, bwalu yêyè ùvwa dibòkò dyà bukolè dyà paapà ewu's; mu mîshindù yónso ki kushebeyaye beena Kilistò bàvwa bùle tètè ne Nyumà Mwîmpè abu.

⁶⁷ Kàdi Martin Munsantu kujingaye muyiiki wà bàbìdi nendè, ki balami abu kumwimanyikabò ku ciibi cyà lupangu. Èè, Martin Munsantu kuponaye mpàla panshi ne kulààlaye panshi mwab'awu kàdi kusambilaye too ne pàakamuleeja Nzambì bwà kubwelaye. Mmwenze ànu ulandapuka mwab'awu, kuyaye tamàkàtamàkà ne ku biibi bìvwa bikanga abi kàdi kuunzulukabi nkaayabi, kubwelaye.

⁶⁸ Mpindyewu, ebu's mbwalu-bulonda, kabyena ànu muntu kampànda mufunde bwà bwalu bwèndè, ne ànu ndambù bu . . . Bu kòkù cintu cyà kaciyi mu cyòci, nùnkù's mbafwànyine kwikala bafunde bamulwisha, bu cyòci mwà kwikala èkèleeziyà kampànda wàkula; anyi, ndi mufwànyine kwamba ne, bóbò kabàyi benza nànkù, nangananga èkèleeziyà wa ciipaapà, kî mbafwànyine kuteela bintu abi to. Kàdi, nwamònu's, maalumalonda àdi àmba bulelèlè. Nwamònu anyi?

⁶⁹ Ki muntu ewu kuseemenayè buludi, Martin Munsantu, ne kupitayè ànu ku mulami yónso, ne bikwàbò byónso, ànu buludi ne mwísù menemene mwà mfùmù wa bukalenge bwalàbale awu. Kàdi mfùmù wa bukalenge bwalàbale awu kàvwa muswè kuneemeka musadidi wa Nzambì to. Nudi bamanye's, aci—aci kî—aci kî mbùkàlànga to. Pa nànkù yêyè kutangija mutù ku luseke ne kàyi nànsha mwà kumuneemeka to. Nudi bamanye cyàkenzà Nzambì anyi? Wàkateeta kuyiikilangana nendè kàdi yêyè kushààlaye ànu kacya wàtuma mutù ku luseke, kàdi Nzambì ùvwa ne cyà kwenzeja mumpàngaanù ewu bwà kufilaye kaneemu kùdì musadidi Wendè. Kì Yêyè kulakusha cilùmýànà kapyà, ne kumwoshaku kulandapuja mu nkwasà wendè awu, kumujuula kuulu, kumwimanyika kuulu.

⁷⁰ Mpindyewu aci—mpindyewu aci's mbwalu-bulonda bwà Bible, *Nsangilu wa Nicée*. Byàkakèngela bwà kuneemekaye musadidi wa Nzambì; kumwimanyikaYe kuulu's. Kàakwosha mene ne nkwasà uvwaye musòmbè awu; kapyà kumutangalaka

pambidi ne kwoshaku ne mwinshi mwà nkwasu awu, nènku byàkakèngela bwà yèyè kutupika mwaba awu. Nzambi ùtu ne mùshindù wà dyanza maalu, nudi bamanye's. Uh-hum. "Nzambi ùdi ne bukolè bwà kujuudila Abraham bânà ku mabwe aa." Nènku nudi bavùluke ne, Nzambi umweumwè awu mmusòmbèle munkaci mwètù dilòdòlò edi. N'Nzambi umweumwe awu. Èyo.

⁷¹ Ne pashiishe cikwàbò cìndi munange, ne pashiishe nèngiimanyikè. Ndi ne bikwàbò ndambù kaaba aka, kàdi ndi mpeta...Mpindyewu eci ke cìmvwè cìmvwà munange bikolè, pàvwaye ditùkù kampànda mwindile cisàmbà cyèndè, munkaci mwà kusambila mu bìrò byèndè.

⁷² Nènku yèyè—yèyè ùvwa muntu munène, ne yèyè ùvwa ne Èkèleeziyà mùle tètè ne Nyumà Mwimpè ewu, ne kusùnsulwilaye...Kaa, yèyè ùvwa...ùvwa naabò bwònsò bùle tètè ne Nyumà, disangisha dyèndè dyònsò. Ne bwònsò mu ditùnga dijimà, beena Kilistò bààkenza bishimà ne bimanyinu ne byàkukèma.

⁷³ Nwamònu's, Nzambi ùtu wàkula ne mùsànjeela Wendè, mùsànjeela wàkula ne beena kwitabuuja. Nènku díbà adi s'ki cìdì cyenzeka aci, nudi numòna's, Yèyè—Yèyè ùtu ulama beena kwitabuuja ne yèyè kàbìdi mu Nzambi; nudi numòna's, Nyumà Mwimpè ùdi upongolokela mu cisumbù cyà bóbò abu.

⁷⁴ Misangu mivulè pàvwàbò bàbàshipeela diitaba, bàvwa bàtèeka ne mwambi munkaci mwàbò amu (mùshindù awu) ne bàbàshipa bònsò musangu ùmwè awu. Kàdi cikisu kaayi civwàbò benzela bantu abu's wè! Bàvwa bàbwòsha. Bàvwa bàngata bantu balume ne bàbàpoopela ne misonso...pa micì apu, nènku bàbàtùmina mbwa yà lonji, anyi...ne bàyilekela yidiila muntu lwànyimà, yikòka mala èndè kumpàla kwà muntu awu kàyì mwanji kufwà to. Bàngata bakàjì, bàkòsa dibèèle dyàbo dyà dyàbalume, ne bàbàshiya biimane mwaba awu pàdi mwoyi wabò munkaci mwà kutuuta apu, nènku utuuta ànu too ne mùdibo bàkuluka panshì, bafwè, mùshindù awu. Kwàngata bânà bààbò mu mafù à bakàji biimìta ne kubèèlela ngulube ne bikwàbò, kulekela baamaamù abu biimane ne bacìbandila. Ne byà mìshindù yònsò!

⁷⁵ Mpindyewu, kwèna mufwànyine kwela meeji ne bantu bàvwa bajikula bwena Kilistò bàvwa mwà kwenza aci to. Kàdi tèèlejaayi, Bible mmwambe, Yesù wàkamba ne: "Necyènzeke ne nebànùshipe, beela meeji ne bàdi benzela Nzambi mudimu." Nudi bavùluke ne, Yesù umwèumwè wàkamba aci, ku Nyumà umwèumwè awu, wàkadyànjila kucyàmba cyàkàbìdi bwà cikondo cyà nshìikidilu. Necyènzeke. Piikala bintu bikwàbò ebi bikùmbanangana menemene ne Mifùndu, tàngilàayi numònebi ní kabyèna bipetangana menemene ne Mifùndu ne mu maalu-malonda. Nzambi mmwambe ne necyènzeke, bwalu-bulonda mbwòbò ebu bùdi bwàmba ne mbyenzeke bushùwà; Nzambi

mmwambe ne nebyènzeke mwab'ewu, nènku s'ke cyòci eci cyenzèke. Nwamònu's, ànu menemene. Pashiishe citwènza ncinyi patwàfika ku Cikondo cyà Èkèleeziyà wa Laòdikiyà (nwamònu's, kutùdi mpindyewu eku) ne makènga ne bikwàbò byakula bwà kucilwisha?

⁷⁶ Pa nàнку, mpindyewu, dîbà adi eci, yêyè ùvwa mwômò amu ùsambila pàvwà disangisha dyèndè munkaci mwà kwindila apu. Nènku kùlwakù mulòmbyanganyi wa kàà pa luse ku ciibi e kukookola ku ciibi cyèndè, ki kunzululaye ciibi (pèndè's ùvwa ne mudimu), ne kumwambilaye ne ùvwa dijinga ne ci—cilàmbà. Ùvwa butakà ne kàyì cintu nànsha cimwè to, kùvwa mashika, ki kwambaye... Kumutùmàyè bwà kumòngana ne mulami mukùlumpè. Kàdi mulami mukùlumpè kumufìkilaye munda ne kumwipata. Nènku pààkenzaye nàнку, kupatukaye lubilu, kwalukilaye kàbìdi ne kwambilaye Martin Munsantu ne mu—ne mu—mulami ùvwa mumwelè lubilu.

⁷⁷ Nènku ki pashiishe, ànu lwà pa dîbà adi mene, mulami mukùlumpè ewu kubwelaye ne kwakula nendè ne mèyi à àtapa, ne: “Disangisha dyèbè's ndikwindile! Udi mushààle mubàlame kacya bindila!” Kàdi yêyè ùvwa munkaci mwà kusambila. Mbîmpè bwà kushààlaye mu disambila too ne pàvwaye ùdyumvwa mulombòdiibwe kùdi Nzambi bwà kupàtuka.

⁷⁸ Ki mulombyanganyi wa kàà pa luse ewu kwalukilaye ku ciibi. Ki Martin Munsantu kuvùulaye cilàmbà cyèndè yêyè cîmpè aci ne kucipèeshaye mulombyanganyi wa kàà pa luse awu, nènku kukèngelabi bwà—bwà—bwà mulami mukùlumpè aye kamwangacila cikwàbò bwà kumutwadilaci. Nàнку kukèngelabi bwà kupetaye cilàmbà, nànsha bishi, ne kulwàcikaye Martin Munsantu. Nènku kulwàtayè cilàmbà cishàdile bikolè kumpàla kwà bantu pamutù pàà cilàmbà cyèndè cyà cîmpè aci.

⁷⁹ Nwamònu's cidìci ànu cileeja's: kufila cidì citàmbe bwîmpè cyùdi naaci, kufila mwoyi wèbè, kufila dîbà dyèbè, kufila byònsò kùdi Kilistò. Nènku Nyumà umwèumwè uvwa musòmbèle munda mwà Kilistò awu, yêyè mmusòmbèle munda mwèbè, nènku—nènku bwenzeji bwèbè mu nyungulukilu wèbè ne pa bantu baùdi usòmba naabu, neàtambe kwikala mufwànàngane ne Kilistò mu mùshindù wa ne neenze cintu cimwècimwè cyàkenzà Kilistò aci.

⁸⁰ Ndekeelu wa byònsò kwenzekabi ne bantu bàvwà badyàdija mu mindidîmbi bàvwa bondopiibwa. Ncyà—ncyà bushùwà's, ànu bukole bwà dinanga menemene bubànyùngùlukile's. Ki kwambabo ne “Pàvwà Martin Munsantu uyiisha, paanyimà pàà yêyè mumane kupatuka mulwate mùzàbì wa mushààdile ewu, ne disangisha dijimà kumònadi nsèsà kampànda yà Bukénkè bumunyùngùlukile yêyè yònsò.” Uh-huh. Nwamònu anyi? Nwamònu's, bwalu yêyè ùvwa mwenze cintu cijaalàme.

⁸¹ Enza maalu majaanlame misangu yonsò, ndibanza dikwela kùdi Nzambi; ela meeji majaanlame, ndibanza wêwê mudyela; nènku newikale ne cyà kujikije mu mûshindù mujaalame. Ncyà bushùwà, bìdi bikèngela ànu bwà wêwê kwenza nàнку.

⁸² Mpindyewu, tudi baswè kubanga mpindyewu kuteeta bwà kwangacila eci mu nsangilu wa muumvwija, dilòlòlò edi, bwalu Cidi cyamba bwalu ebu mwab'ewu ne cisùmi be.

Mpindyewu, fùndila mwanjèlò wa èkèleeziyà wa Peegàmò ne: Maalu aa ki ambambàbo kùdi ewu udi ne mwelè musakisha yibidi-. . .mwelè wà mvità . . .mwelè wà mvità musakisha nseke yibidi;

⁸³ Mpindyewu ndi muswè bwà nwènù kumòna ne Yèyè ngudi munkaci mwà kuDitèèja cyàkàbidi dilòlòlò edi mu Bunzambi. Èkèleeziyà yonsò ùvwa umwe wa ku ngiikàdilù Wèndè mutùmbishiiibwe: Ewu uvwa ne mitootò dikumi ne yibidi. . . anyi “mitootò mwandamutekète mu cianza Cyèndè, Ewu udi ne mwelè wà mvità musakisha nseke yibidi,” nwamònu's, cintu kampànda cikwàbò: “Ewu udi ne makàsà à cyamu cyà kabanda, mèsù àdi àtwa eku àtwa eku ne. . .ndimì yà kapyà.” Yèyè's ngudi munkaci mwà kuDitèèja mu Bunzambi Bwèndè.

⁸⁴ Mpindyewu wêwê udi wamba ne: “Bunzambi bùdi lwà penyì mu eci cyà ne, ‘Ewu udi ne mwelè wà mvità musakisha nseke yibidi mwikale ùpatuka mukana Mwèndè?’”

⁸⁵ Èè, *mwelè wà mvità's* ùdi “Dìyì.” Ebèlu 4, twètù kuwàngata ku cibangidilu patwàkalonga Bunzambi Bwèndè abu. Mwelè wà mvità, tudi tusangana mu Ebèlu 4:12, ne ùvwa: “Dìyì dyà Nzambi nditwè kutàmba mwelè wà mvità wà nseke yibidi.” Ncyà bushùwà anyi? Aci's cìvwa n'Dìyì dyà Nzambi. Mmwòmò anyi. . .? Mwaba awu, mpindyewu tàngilàayi, nwènù nudi-. . . uumvwàayi dyumvwija edi. Mpindyewu tulondakajàayaaku Dìyì adi, Yone Munsantu 1 ne: “Ku cibangidilu” (kale menemene wàwa) “kùvwa Dìyì dyàkafùka mauulu ne buloba.” Ncyà bushùwà anyà? “Ne Dìyì dyàkadi ne Nzambi, ne Dìyì dyàkadi Bunzambi. Ne Bunzambi bwàkandamuka mubidi ne bwàkasòmba munkaci mwètù.” Ncyà bushùwà anyi? “Dìyì dyàkavwijiibwa mubidi ne dyàkasòmba munkaci mwètù.”

⁸⁶ Nènku's ki Yèyè ewu mwimane kaaba aka, Yèyè wa ku cibangidilu awu ne: “Amba eci kùdi mwanjèlò wa èkèleeziyà wa—wa Peegà-. . .Peegàmò. Mwambile eci ne: ‘Mèmè ndi Dìyì dyà Nzambi.’” Kaa, tudi tuMumòna mu Bwàkabuulwibwà, ùlwa ne cinkùtù Cyèndè cizabika mu mashi, ne cifulu cyà butùmbi pa mutù Wèndè, mubànde pa kabalu katòoke, ne pa cibelu Cyèndè pafùnda ne: “Dìyì dyà Nzambi.” Kaa, mèmè ntu munange aci's. Yèyè ùdi Dìyì, Dìyì dyà Nzambi. Nàнку awu tudi tumòna Bunzambi ebu dîbà adi ku cibangidilu, bwà kuDitèèja, ne Yèyè ùdi Dìyì.

⁸⁷ Mpindyewu, piikalàYe Díyi didi ne mwoyi, díbà adi Edi didi difunda mu Bible edi nciitupà cyà ku Yèyè; díbà adi bu nwènù mwà kwakidila Eci, munda Mwèndè (cìdì ciikàle Díyi), Díyi edi didi dibwela munda mwèbè ku diitabuuja, didi diCìwija ne mwoyi, bwalu kùdì. . . Kaa! Kwataayi Aci's! Díyi didi dibwela munda mwèbè, mwòmò mwikale Nyumà Mwímpè, Didi ne mwoyi ànu pàdìDi dibwela apu, ne mulayi wònsò mmulelèlà. Cintu nànsha cimwè. . . “Ki bwà cinyi, wèwè mwambile mukunà ewu ne ‘Tentemuka,’ ne kùyi wela mpatà mu mwoyi wèbè to.” Bwalu (cinyi?) udi Bunzambi bwikale bwàkula. Nudi nuciitabuuja anyi? Bible ngudi mwambe nànkù. Ne cyònsò cyùdì wamba aci necyènzeke pawikala kùyi wela mpatà to, wèwè mwà kupatula byònsò byà—byà pa buloba mu wèwè amu, kulekela Nyumà Mwímpè ukuvwija mwànà wa balùme anyi wa bakàji mupàyàme wa Nzambi: kakùyi maalu à buloba to, kakùyi dipiila to, kakùyi mpatà to. Ncinyi ciine aci, díbà adi's? Kacicyèna kàbìdì wèwè to, n'Nzambi munda mwèbè. Díbà adi udi wangata Díyi Dyèndè, Dyòdì mmulayi, wamba ne: “Taatu, mmulayi Wèbè.” “Sàtaanà, . . .” Cintu kampànda cìdì ne cyà kutentemuka. Nwamònu anyi? Nwamònu anyi?

⁸⁸ Mpindyewu, kwèna mwà kwenza aci pàdì Nzambi kàyi mukubuulwile díbà adi cìwja cikèngela bwà bwalu abu kwikalabù to. Nwamònu anyi? Díbà adi paùdì mumanye ne bwalu abu bùwja ne cyà kwikala cinyi, díbà adi udi mwà kwamba, bu Yesù. Yèyè *ùwja* Díyi. Ncyà bushùwà anyi? Kàdì nànsha nànkù Yesù, muntu awu, tabernacle, wàkamba ne: “Ncyèna ngenza cintu nànsha cimwè pàdì Taatù kàyi muNdeeje dyàmbedi to.”

⁸⁹ Pa nànkù kì n'Díyi to díbà adi too ne pàdìdì dimwèneshiibwa kùdì. Nudi bacyùmwè anyi? Kabyèna bikèmesha to pàdì bantu bàmba ne “matùkù a bishimà àkaadi mamane kupita,” Díyi kì ndimwèneshiibwe kùdìbo nànsha. Kabyèna bikèmesha pàdìbo kabàyi mwà kwitabuuja Nyumà Mwímpè to, Díyi kì ndimwèneshiibwe kùdìbo nànsha. Kabyèna bikèmesha pàdìbo kabàyi mwà kumòna dibuulula dyà dibatiiza mu Dìna dyà Yesù Kilistò to, Díyi kì ndyanji kumwèneshiibwa kùdìbo nànsha; kàdì nànsha nànkù kabèna ne Mufundu nànsha ùmwè wà kuyakù to, kakwenaku mwaba nànsha ùmwè ukaadiku muntu mubàtìjiibwe mungà mùshindù to.

⁹⁰ Bwà bwalu bwà Nyumà Mwímpè, Bible mmwambe ne “Muntu nànsha umwe kèna mwà kubìkila Yesù ne n'Kilistò to, ànu ku Nyumà Mwímpè,” kàdì bantu díbà adi bàmba mùdìbo kabàyi biitabuuja ne Nyumà Mwímpè ngwa cyà bushùwà. Nwamònu anyi? Nwamònu's, kì mmubènzela to. Yesù wàkamba ne: “Muntu nànsha umwe kèna mwà kulwa kùNdì pàdì Taatù Wanyi kàyi mumukoke dyàmbedi to. Ne bònsò bàdì Taatù” (cikondo cimane kupita) “muMpèeshe nebàlwe kùNdì.” Kaa, aci kì ncilenga anyi! “Bònsò bàdì Taatù muMpèeshe, nebàlwe

kùNdì. Nànsha umwe wa kùdìbo kààkujìminakù to ànu mwànà wa kabùtù, ne Mémè nè. . . (yèyè wàkalediibwa bwà kiipàcila aku), ne Némmbùishè kàbìdì ku lufù ku ditùkù dyà ndekeelu.”

⁹¹ Kaa, ekèlekè! Mwaba awu’s ki ùdì ménà ètù mafùndiibwe mu Mukàndà wà Mwoyi wà Mwànà wa mùkòòkò: kacya ànu ku difùkà dyà dyulu ne buloba. Abi kî mbilenga anyi! Mmuniyì mutùdì bafwànyine kwela mpatà?

⁹² Éyi Nzambi wa yaaya, umushaku mpatà munkaci mwètù, tengùlaku ànu myoyi yètù yà buntu eyi mu mùshindù wà ne kakwàkwikalaku mpatà nànsha mikesè munkaci mwètù to. Ki disambila dyànyì adì’s. Jimijakù ànu mpatà yònsò, Mukalenge. Ngiikaleku ne nsòmbelu wa kalolo, ne kudipwekesha kwònsò, ne ngenda ànu bu—ànu bu mwànà wa mùkòòkò wà Nzambi pa buloba. Lekelaayi—lekelaayi ngèndè mwàkendaYè amu’s. Ngàakuleku mutùYe wàkula. Tulumbilà twànyì twikale bu Twèndè tulumbilà’s. Bakwàbò—bakwàbò. . . Bakwàbò bajandule Yesù mu mémè emu’s. Ndiìjìmineku mémè mwine bwà kudipeta, Mukalenge, mu Wèwè. Ki cyòci aci’s, ndiìjìmineku ànu cyanààna bwà ndisangane mu Wèwè; mubwikidija ànu menemene mu Kilistò mu mùshindù wa ne kakwenaku mwaba bwà mpatà to, ànu cidiYe wàmba aci.

⁹³ Mpindyewu, kanùpatuku pambelu apa bwà kwamba ne: “Butùmbi kùdì Nzambi! Alèluuyàh! Nzambi àtumbe! Nudi numòna cìndì mwà kwenza anyi? Butùmbi kùdì Nzambi’s wè!” Kwenà ànu mwanji kuCìpeta to. Awu kî mmùshindù wàkacyenzaYe to, to, ùtùntumika cyàdì Cyèndè kumpàla wàmba: “Nudi bamòne cìndì mwà kwenza anyi? Èyowà’s, mukalenge. Mémè ndi mwen- . . .” To. Yèyè kàakangata butùmbi bwà cintu nànsha cìmwè to, Wàkabùpèèsha Nzambi ne kwenda mu didipwekesha ne kalolo kwònsò, ne kapeepa mu nyungulukilu Wèndè mu mùshindù wà ne bantu kunangabù bwà kwikala baMunyungulukile. Ànu beena lukuna Bèndè. . . Ne Yèyè wàkabananga bikumbane mu mùshindù wà ne Wàkabàsambidila mene ku musangu ne ku musangu, dìbà dyònsò. Nènku ki ciwà cileejilu cyèbè ncyòci aci, cileejilu cyànyì, bwà kwenzela bakwàbò bu mwàkatwènzèlèYe.

⁹⁴ Mpindyewu, tudi baswè kumòna cyàkàbìdì mwab’ewu mpindyewu, mu mvensa mwi² ne, cidi cifwànyine kwikala mvensa wa 13:

Ndi mumanye byenzedi byèbè, ne—ne mwaba wùdì musòmbèle awu, nànsha mene. . . nkuasa wa Sàtaanà. . . kàdì udi mukwàte bikolè dìnà dyànyì, ne kwena muvile diitabuuja dyànyì to, . . .

⁹⁵ Nwamònu’s, mbasòmbèle mwaba ùdì Sàtaanà musòmbèle awu, kàdì bàcidi ànu balame Dìnà dyà Yesù. Nwamònu’s: “Kàdì kanùyì bavilè diitabuuja Dyànyì to.” Ndiitabuuja dyà mùshindù kaayi dyàkabàpàYe’s? Diitabuuja dyà mpenta, dyà

ku cibangidilu. Bàvwa ne diitabuuja dyà cyena Nikàlàwù kuntwaku, bulongolodi bwà èkèleeziyà, ne bikwàbò, bàvwa munkaci mwà kwibaka, èkèleeziyà mwikàle ùmwènekela ku bulongolodi; kàdi Yéyè kwamba ne: “Udi muye kule ne cyôci aci, udi mucikine, nènku ki mûNdì pàànyi mucikine’s. Kàdi kwèna muvile Dìna Dyànyi to; kwèna muye wenda ulondangana ne tusùmbù twàbò twà kale atu ne bikwàbò to, wèwè udi mushààle ànu buludi mu Dìna Dyànyi. Ne ucìdi ànu ne diitabuuja Dyànyi bu mwàkadìbi ku cibangidilu.” Kaa, mèmè ntu munange aci’s wè!

... kùyi muvile diitabuuja dyànyi, nànsha bu aba bàà mu matùkù mùdì (Ngeela meeji ne nudi nushìndumuna aci ne A-n-t-i-p-s) mùvwa Antipas wanyì mufwile diitaba wa lulamatu, wàkashipiibwa munkaci mwènu, mwaba ùdì Sàtaanà musòmbèle.

⁹⁶ Nèngǎnjì kwimanaku mwaba awu kakesè. “Nkwasa wa Sàtaanà.” Tudi baswè kwikala ànu tudìibidija pa bintu ebi, ndi muswè bwà nwènu kuCibakula. Ikalaayi batwishiibwe ne nudi nwenza nànkù, mpindyewu. “Nkwasa wa disòmba wa Sàtaanà.” Mpindyewu, Nzambì wàkajikula dīyì mu Genèsè mwaba wùvwà nkwasa wa Sàtaanà usanganyiibwa, ne mwine awu úvwa mmu Baabùlònà. Citu misangu yònsò ànu nkwasa wa Sàtaanà, ne mu Bwàkabuulwibwà civwa cintu ànu cimwècimwè aci. Kàdi, bu nwènu mwà kumòna, Baabùlònà wàkadishintulula kuumuka ku *bumpàngaanù* kuya ku “ciipaapa.”

⁹⁷ Nènku mpindyewu mu bidimu byà kumpàla, anyi kumpàla menemene kwà cyôci eci kwenzekaci (ndambù wa bidimu), Nkwasa wa Sàtaanà mwibaka munène...Ngeela meeji ne nudi bafwànyine kumubiikila ne mwakwi...mwakwidi-mfùmù wa beena Kasàdà. Bulondyanganyi bwà Baabùlònà bwàkashintulula nkwasa wabù pàvwa beena Peelààsà balumbatangana naabu, ke kulekelabo Baabùlònà. Dìna dyèndè uvwa A-t-t-a-l-u-s, Attalus, mwakwidi-mfùmù wa Baabùlònà. Pààkabwela beena Peelààsà ne kwangatabò Baabùlònà ku bukòòkeshi, kwipatabò beena Kasàdà; Attalus, mwakwidi-mfùmù wabò awu, kudyela lubilu ne kuya ne nkwasa wendè ku Peegàmò. “*Nkwasa wa Sàtaanà* awu ùdì mwaba wùdì ushikamina awu.” Nwacyùmvù anyi?

⁹⁸ Mpindyewu, ki bwà cinyi ndi ngàalukila bwà kwangata bwalu-bulonda ebu mu maalu-malonda à èkèleeziyà, kupeta mwaba...wà cyàkenzekà pààkambàYe ne: “Wèwè udi musòmbèle mwaba wùdì nkwasa wa Sàtaanà ùsanganyiibwa.”

⁹⁹ Mèmè kudyàmbidila ne: “Èè, aci ncifwànyine kwikala mwaba kaayi, cintu kampànda cyà ne: ‘Nkwasa wa Sàtaanà?’” Pashiishe mèmè kujandula ne mfùmù munène ewu, paanyimà pàà mumane kunyeema beena Peelààsà bacìmunyi bààkakòokeshi abu (bilondèshile cikèènà-kumòna cyà Danyèlè),

yêyè wàkalwa mu cimenga eci cyà Peegàmò, ku Loomo, nènku ki kwasaye ciimamwëndè wa bukalenge cyèndè aci kunwaku. Sàtaanà kutentemunaye ciimamwëndè wa bukalenge cyèndè aci kucyumusha ku Baabùlònà kuya naaci ku Peegàmò, mwaba (mu cikondo cicilwalwà) uwayne mufwànyine kubanga Baabùlònà mupyamùpyà. Kaa, ekèlekèle! Mpindyewu nudi nupeta bishimikidi byà patùdi tusanganyiibwa. Èyo.

¹⁰⁰ Mpindyewu, kwôkò aku nkwakashipilabo mwanèètù wa dikèma ewu bwà diitaba, wàkashipiibwa kuntwaku, Antipas.

¹⁰¹ Pashiishe ùkùdimuna ngenzèlu wèndè wa maalu. Kumpàla yêyè ùvwa mukèngeshi wa beena Kilistò. Kaa, mùshindù mwine ùvwaye mukìne beena Kilistò's wè! Nènku yêyè mene's ke ùvwa mwakwidi-mfùmù, mumpàngaanù wa ku muji ne mu byenzedi. Pashiishe kushintululaye lwídi lwèndè ne kudiswika pàmwè ne Constantin.

¹⁰² Constantin ùvwa misangu yònsò ànu ùbadiibwa (ne ùdi nànkù ku ciipaapa leelù ewu) ne ki nkambwa wa Babàndi bàà pa tubalu bàà Colomb, mpindyewu, ewu wàkateeka mucipù wà mashi awu. Kàdi Constantin (ndi ngàmba bwalu ebu ne kaneemu ne diciìna), bwà wànyì mùshindù wà kucibala mu maalu-malonda, kacya kàvwakù mukudimune mucìma to.

¹⁰³ Mpindyewu, wàkalòòta cilòòta bufùku kampàndà, bwà ne bu yêyè. . . kumònaye nkùruse, ke kwambaye ne ku cyòci eci yêyè neàcimune mvità ayi; nènku kùdì. . . bwà bwalu abu ùvwa mulaye bwà kulekelela beena Kilistò, bwà wamòna mwà kwikala mwena Kilistò, bu bôbò mwà kumusambidila bwà kucimunaye mvità ayi. Ngakiimana lwà ku cilamba aku, cyà mwaba uwayne. . . dyàmwamwa dyà cilamba cyàbò aci, mulààle, ne kulòòtaye cilòòtá aci; ki kutabuluka, ne kufundaye nkùruse mutòòke pa ngabu yèndè ne pa yònsò yà balwanganyi bèndè bàà mvità. Nènku's ki mwaba wàkenjiibwa Babàndi bàà pa tubalù bàà Colomb bàdi mu bukòòkeshi bwà Kàtòlikè kàà cyena Loomo. Kàdi kacya yêyè kàtukù mwenze cintu nànsha cimwè cyà butèndeledi to; cintu cimwèpelè cívwayeku mwenze cívwa cífundiibwe mu maalu-malonda, bu mündiku pàànyì mumòne, cívwa ne, yêyè wàkaasa nkùruse ku musàkà wà Èkèleeziyà wà Sophie Munsantu. (Huh!) Kàdi yêyè's ùvwa mwena cidìidi, nènku pàcívwaye mfùmù wa bukalenge bwalabàle bwà Loomo mwine musangu awu, yêyè ne mwakwidi wa cimpàngaanù ewu, bònsò pàmwè, kudiswikabò ne kubwejabo mu èkèleeziyà wa cívumvù ùvwa ubùikidiibwa ne beena Nikàlàwù diine dîbà adi's. Bwena Kilistò, bùvwà bweyèmene bunsacerdòòsè kampànda abu, ne kubùjingabo mu èkèleeziyà wabò, mutwàkabumòna mu malonga acilwalwà à èkèleeziyà wa Efeso, ne bikwàbò, ne—ne wa Seemùnà; beena Nikàlàwù abu.

¹⁰⁴ Mpindyewu beena Nikàlàwù bàvwa balwè. . . kaciyi “byenzedi” bu muvwàbi kale wàwa ku cibangidilu *eku* to,

kàdi *apa's* didi “dilongesha.” *Apa's* cìvwa “byenzi,” bàvwa bàteeta ànu bwà kudibwejamu; kàdi *apa* lwà mu cikondo ciisâtù cyà èkèleeziyà kulwaci “dilongesha,” baakwidi banène, balùmyànà banène. Kabàvwa banji kubàbiikila ne mbaapaapà to, mpindyewu; kàdi bàvwa bàbiikidiibwa, bu mùdi, bèèpiskòpo, bantu banène, nudi bamanye's, bàà luumù. Ne dilongesha dyàbò òvwa, òvwa, òvwa dyà mmwenekelu wa kwìsùkwìsù.

¹⁰⁵ Bàkaavwa baya kule ne Èkèleeziyà mùle tètè ne Nyumà, mulombola kùdi Nyumà Mwímpè awu. Bàakabalekela bashààla banyàabanyà ne kubàbiikila ne “baabuludyanganyi,” bwalu kabàvwa baswè kupetangana naabo ku mèyi bwà kwikala ne mangumba manène aa to. Kàdi Èkèleeziyà ùvwa muswè kushààla mudishikàmìne ku butangidi, ku bukòòkeshi bwà Nyumà Mwímpè bu mwàkabàlayà Kilistò; Ùvwa mwà kwikala naabò, ne ùvwa m'Mfùmù wabò. Kaa! Wabò Mfùmù's wè!

¹⁰⁶ Èkèleeziyà mulelèlè kì mmushintululeku lwìdi lwèndè nànsha, kì mbwà kwikalaye mulombòdiibwe kùdi kasumbù kampànda kàà—kàà. . . Ncyèna mumanye munùtù nubàbiikila pambelu apu to, baakardinale, ne bèèpiiskòpò, ne baapaapà, bàdi kabàyi mwà kupangila abu's. Tudi twitabuuja ne kùdi Kampànda umwèpelè udi kàyì mwà kupangila to, Yèyè ki wetù Mfùmù, Yèyè's ki Yesù Kilistò udi neetu mpindyewu mu mmwènekelu wa Nyumà Mwímpè; Nzambì munda mwètù, musòmbèle munkaci mwètù, ùtùludika ne ùtùlombola ku màyi à Mwoyi, ùDimanyisha; ùleeja, bu mwàkenzaYe munkaci mwà bansantu bàà ku cibangidilu abu ne bàakafwilà diitabuuja abu, ne Yèyè nguvwa Mukalenge Nzambì wa bufùki, wondopa babèedi, ubiisha bafwè, utureja bikeènà-kumòna, wipata badémòns.

¹⁰⁷ Kakwèna musangu nànsha ùmwè ùndiku mwà kupumbulula cintu nànsha cimwè, ku bèèpiskòpò bònsò bàà mu èkèleeziyà wa beena Nikàlàwù wàkenza bulondyanganyi bwà Loomo awu, paapà awu; musangu nànsha ùmwè mu maalu-malonda katwènaku ne bujaadiki bwà nànsha umwe wa ku bèèpiskòpò abu mujuulekù bafwè, anyi ní ncinyi cyà mùshindù awu, bwalu Kilistò (dibiikà dyà ku lufù) kàvwa mu myoyi yàbò to. Bàakadiswika ne kwenza dingumba, kusumbishabo bwànààbutà bwàbò. Kàdi Èkèleeziyà wa Nzambì udi ne mwoyi nguvwa ne bukòlè bwà Kilistò, èkèleeziyà mukwàbò ùvwa yèyè ne bantu bàà myànzu mitumbùke mu yèyè amu; kàdi Èkèleeziyà mulelèlè yèyè wàkashààla ne Nyumà. Nudi nuumvwa anyi? Èyo.

¹⁰⁸ Mpindyewu ewu nùnkù. . . Ki Constantin, bwà kupungisha bukalenge bwèndè pàmwè, s'ki cyàkenzaye eci's. Wàkangata beena Nikàlàwù abu, ne wàkaya kùdìbo (cìvwa ciikàle mmwènekelu wa bwena Kilistò). Nudi nucyùm vwa bitòòke anyi? Bàvwa beena Kilistò, bàà ku dìnà; beena Kilistò bàà bàdyàmba, kabàyi ne Nyumà Mwímpè to. Kaa, ndi njinga

ne aci cinùbwelèku bwà kanùlu kucilekelakù cinubafuka to. Nwamònu anyi? Bàvwa beena Kilistò, beena Kilistò bàà cyena mangumba, kabàyi ne Nyumà Mwímpè to. Bàvwa beena Kilistò ku dîna, bàvwa beena Kilistò ku didisangisha dyàbò, bàvwa bangata mèèsà à Mukalenge, ne bààkalama mèyi matùma; kàdi, bààkadyombola bulombodi bwà Nyumà Mwímpè. Kabàvwa ne bimanyinu ne maalu à kukema munkaci mwàbò to, bàvwa bàmba ne bintu abi bìvwa bimane kupita; ne bìvwa bìkèngela bwà kujuulabo èkèleeziyà bwà kukòokasha. Netùfikeku mu katanci emu, ku mùshindù wà bukòokeshi abu's. Nwamònu anyi?

109 Mpindyewu, nàнку awu bìvwa bìkèngela bwà Èkèleeziyà wa Nyumà Mwímpè kuDilamayè kule ne bintu byà mùshindù awu. Kàdi, mu Pègàmò, uvwabo bàmbila cyònsò aci's m'*mwanjèlò* wa èkèleeziyà wa Pègàmò. Nwamònu anyi? Bwalu Cìvwa mbujitu bumoomekela mpindyewu bwà kwenza nàнку.

110 Kàdi Constantin yèyè bwena Kilistò kàbùvwa ne cìvwabu bumwambila to, yèyè ùvwa muswè kutwàla bankambwa bèndè bàà cimpàngaanù abu, mu èkèleeziyà wendè wa cimpàngaanù awu's. Ne wa Laòdikiyà ukaavwa mwele miji ne . . . anyi bwena Nikàlàwù bukaavwa bwele miji ne bujaame mu Loomo ne budileje mu bunène, ne bààbùngì bàà ku bantu bàvwa beena kwitabuuja bàà Kilistò (bàà ku dîna), bàà mmwènekelu wa kwisùkwisù. Kàdi Èkèleeziyà mulelèlè ùvwa wa banyaàbanya; ki muvwaye misangu yònsò ne ki mutùye misangu yònsò! Nèngànji ànu kwindila kakesè, bwà cyòci aci cìbweleku mu ndondo menemene. Nwamònu anyi?

111 Vùlukàayi ne, Èkèleeziyà mulelèlè ùtu misangu yònsò ànu kasùmbù kakesè menemene kàdi kiipata kùdi èkèleeziyà mikwàbò ayi. Èkèleeziyà mulelèlè katu mwanji kudiyenza bulongolodi to, bwalu kèna cisùmbù cyà bulongolodi kampànda to, m'Mubidi musokome wa Yesù Kilistò udi ne mwoyi pa buloba, Nyumà Mwímpè mwikale ùkwàta mudimu mu bidimba ebi. Pa nàнку kwèna mwà kuvwija Kilistò bulongolodi to, kwèna mwà kucyènzakù to. Ndi muswè bwà nwènu kushààla bakwàte ku aci bwà Cikondo cyà Laòdikiyà, mpindyewu. Nènu civùlukaayi ne nucilame, bwalu Dìyi dyònsò dîndi ngàmba didi pa mukàbà wà mèyi ewu. Nènu mpindyewu nwavùlukaayi, nucilame mu meeji: Èkèleeziyà mulelèlè wa Nzambì kàtukù mwanji kudiyenza bulongolodi to.

112 Èkèleeziyà wa Kàtòlikè ki bulongolodi bwà nzànzànzà bwà kacya bùdi bumanyike pa buloba, kacya kumpàla kakùvwakù bulongolodi to, ne bwòbù—bwòbù's ki “èkèleeziyà maamù” mùdi beena Kàtòlikè bàmba ne ki mùdiye amu. Yèyè's ki “èkèleeziyà maamù.” Mamwèndè wa bulongolodi bwà maèkèleeziyà. Bible ùdi wàmba ne ki civwaye, pa nàнку kwèna mwà kwela aci mpatà to pàdibo bàmba ne ki “èkèleeziyà maamù apu,”

awu ki “èkèleeziyà maamù”. Mmuleejìbwe mu cimfwànyì mu Bwàkabuulwibwà 17, netùkafike buludi kùdiye. Èyo.

113 Mpindyewu, pa nàнку Constantin, ne cyôci eci mu meeji èndè bwà kukolesha bukalenge bwèndè (bu mwakenza Loomo misangu yònsò, bwà kwikala mulame nsapì yà bàà pa buloba), byàkakèngela bwà kutwàlaye meeji èndè à cimpàngaanù awu ne kwangata meeji à cyena Kilistò, ne mu mùshindù kampànda kuàswikakaja pàmwè, bwà kubisanga pàmwè bwà kudyzenzela bukalenge bwalàbàle bùvwà kabùyì bufwànyìne kwikala ne mukèènaabo nànsha. Nwamònu anyi? Bwalu yêyè ùvwà. . . Aci’s ncifwànyìne kumuvwija kàbìdì mukòòkeshi mutàmbe bunène pa buloba, Constantin awu’s.

114 Nènku bwà dikudimuna dyà mucimà dyètù edi: yêyè ùvwa—yêyè ùvwa mwena cidìidì, kàdi kàvwa munsantu wa Nzambì to, bu mùdì bàmwè bàà kùdìbo bateeta bwà kumuvwija amu. Kàvwa munsantu to! Kakwèna cintu nànsha cìmwè cidìyeku mwenze cidì mene mwà kumvwika bu bwena Kilistò bwànyì mèmè to. Nànku awu pa umwe wa ku èkèleeziyà yà cyena Nikàlàwù ayi wàkatèeka nkùruse; nènku bwà cingà cintu pààci cidìyekù mwenze cidì cifwànàngane ne bwena Kilistò, ncyènaku mucimòne nànsha; ànu yêyè. . .bwà bufùku bwàkalààbaye mpenci pa ngabu yèndè abu, bu mùdì *kwaka*, bwalu ùvwa mpupete cilòota, beena Kilistò bàvwa bàmusambidila bwà wàmòna mwà kucìmunaye mvità ayi’s.

115 Mpindyewu, dìbà adi ncifwànyìne kukolesha bukalenge bwèndè. Nènku pashiishe bwà kwenza cyôci eci, wàkabwejamu mishingà yà cimpàngaanù, lwà mu èkèleeziyà wa beena Kilistò wa cyena Nikàlàwù awu. Ndi mwà kucibìikila ne ng’èkèleeziyà wa kwìsùkwìsù wa cyena dingumba uvwa munkacì mwà kufwìmbiibwa. Wàkatwàla mishingà yà cimpàngaanù lwà mu èkèleeziyà wa cyena Nikàlàwù ewu, kàdi’s ki cìvwa dilediibwa dyà cyena Kàtòlikè adi’s.

116 Mpindyewu, mwanèètù, ndi ntèela maalu-malonda. Mèmè ndi ne binunu byà balunda beena Kàtòlikè, ne biine abo mbalunda ànu mùdì beena Mishònyì amu. Kàdi beena Mishònyì kabèèna mwà kwela mbila to, indilaayi ànu too ne pààjikà dilòlò edi’s, nwamònu’s. Nwamònu anyi? Nenùmòne ne bààkenza cintu ànu cyôci cìmwècìmwè aci. Bukwancima kabwena mwà kupendangana “mapòkò to.” Nwamònu’s, bwalu’s cidì—cidì ànu cintu cìmwècìmwè aci, nyumà umwèumwè awu ùvwa ànu munkacì mwàbò mene. Nènku dìbà adi nenùmòne ne mbwà cinyì ntu misangu yònsò ànu mpiisha cintu aci. Mbwalu ncyà mafi! Nyumà mene ùdi munda mwànyì awu, mèmè mudidinge muteete, nènku cintu kampànda cidì cyela lubila mu mèmè emu, Ncyèna ànu mwà kukwataku mwoyi to, ànu nànku misangu yònsò. Bàdi bàbìikila. . .

117 Bantu banène, balombodi banène bàà ntèndeelèlu bakaadi

bangambilèmbile ne: “Wèwè’s neúnyangakaje mudimu wèbè wà bwambi. Mwanèètù Branham, bwà múdi wenza maalu” bôbô ne, “aci’s—aci kí mbwalu bwèbè wèwè to. Nzambì mmukubiikile bwà wèwè kusambidila babèèdi.”

¹¹⁸ Nzambì mmumbiikile bwà kwenza bitambidile ne kusambidila babèèdi. Babèèdi cìdi ànu cintu cimwèpelè cìndi mwà kukòkela ntèmà ya bantu, ne kwajiki; babèèdi, kusambidila babèèdi nkantu kakesèè. Nwamònu anyi? *Mukenji* ki utùdi twamba ewu’s. Bintu abi bìdi byàlukila; babèèdi, muntu kampànda, mubèèdi ùdi mwà kwondopiibwa kàdi kufwà cyàkàbìdi. Kàdi muntu udi mulediibwe kùdi Nyumà wa Nzambì ùdi ne Mwoyi wa Cyendèlèlè. Pa nàнку Nzambì kàtu ànu wènda ùnyunguluka òndopa babèèdi mùshindù awu to. Dipà adi didi ànu mu èkèleeziyà bwà mubidi wa pa kaaba; pa ewu, pashiishe pa mukwàbò, ne pashiishe pa mukwàbò, pashiishe pa mukwàbò. Nwamònu anyi? Aci, mapà, àdi ànu anyunguluka mu èkèleeziyà. Kàdi’s nCipite ne aci, ne ndi ntèkemena ne nudi nuCyùmvwà. Eyo.

¹¹⁹ Dilediibwa dyà cyena Kàtòlikè, bwà kwenza ciine eci, bwà kukoka ntè—ntèmà yà beena Kìlistò ne kàbìdi ntèmà yà bampàngaanù, bwà kubàsanga pàmwè kàdi kubavwija èkèleeziyà umwèpelè.

¹²⁰ Kaa, s’mwà kwikala nànsha naaci mpindyewu’s, kapesè kàà dibèji kàvwa muntu kampànda mushiye mwab’ewu dilòlò kampànda. Mvwa muswè kulwa naaci, kàdi mèmè kucipwa mwoyi’s; bu mùvwa bintu byàbúngi bisanganyibwa mu cibambalu amu’s. Bàdi munkaci mwà kwenza cintu ànu cimwècìmwè ànu patùdi twakulangana apa, kàdi’s nudi bacibange panwakasungula muntu wa ndekeelu unùdi basungule ewu’s. Bàdi munkaci mwà kukwata mudimu mpindyewu bwà kupetabò nànsha Bible wíkala kàyì mwà kutapa mwena Kàtòlikè ku mwoyi to, anyi mwena Yuda, anyi mwena Mishòonyi. Nebàbenzelè Bible wíkala mwà kwakanangana ne cintu cyònsò mu kaabujima. Kanwènakù mwà kumòna budimù bwà mukwàbò Constantin anyi? Maalu-malonda àdi munkaci mwà kwenzuluka. Mpindyewu, nudi numòna’s, nènku ndi mupetè. . .Nuvwa bangumvwe ncibala dilòlò adi, kí mmwòmò anyi? Nènku ndi—ndi naaci cishààle kumbelu, kàdi bàdi munkaci mwà kucyènza kukaadi ntàntà mule.

¹²¹ Mpindyewu bàdi bàmba ne: “Mu cidimu cyà 62 nebiikalè. . .” Nènku mònaayi ne Paapà Jean XXII mmulwe mu-. . .wàkalòmba tuèkèleeziyà twà tunsongààkaaji twònsò bwà kwalukilatù kumbelu kùdi èkèleeziyà maamù. Kanùtàcishi meeji to, yèyè neàlukile. Yòyi’s neyàlukile! Yèyè neikalè ne cyà kwalukila, yikaadi mimane kwalukila. Kabyena bìkèngela bwà yòyi kwalukila to, yikaadi mimane kwalukilaku patùdi twakula apa’s.

122 Ànu mûmvwà ngàmbe ne: “Ditùnga edi’s ndyambe ne: ‘Èè, Mukalenge Kennedy yéyè musungùdiibwe, beena Kàtòlikè nebàkòòkeshe’s.” Kukòòkesha? Bòbò’s bàkaavwa bamane kucyènza kukaadi ntàntà mule, kàdi kanùvwa bamanye bwalu nànsha bùmwè to. Nganyì udi ufuta balongeshi bààbò? Mmunyì mutùbo bapeta bintu ebi bwà kuya mu bilongelu byàbò, ne kuyiisha cyena Kàtòlikè ànu mu kàlaasà mene’s? Kàdi’s nnwènu bafuci bàà bitàdi bàdi bàcifuta. Kaa, ànu mwìsù mwènu mene, nwamònu’s, mùshindù awu. Kaa, ekèlekèle, mùshindù mwine wàkenzaye’s wè! Pèndè’s Bible mmwàmbe ne neàcyangacile ku mèyi à lubombo, ne ki cyàkenzaye’s; nwamònu’s, ncyà bushùwà; nwamònu’s, kàyì ufuta bitàdi to. Pa nànkù, kaa, kùdi bintu búngì cyanàànà bìdi bifwànyine kwambiibwa mwab’ewu. Nebikèngele ànu nkose myaba ayi, bwà kwalukila cyàkàbìdi bwà kubyàmbula.

123 Bwà kufikisha cintu eci ku dikwàta dyà mudimu, Constantin wàkajuula manayi à bukwapànu búngì kabùyì kwambangana naabu bwà kukoka ntèmà yà bònsò bampàngaanù ne beena Kìlistò mu èkèleeziyà. Nudi ne meeji à mu nyumà anyi? Nudi nwela meeji anyi? Aci ki m’Mukenji wa Dìbà anyi? Èkèleeziyà nyewu ùkaadi ne manayi à mubèlà, mafesto, byà dyabanyinangana tùshinyì, kàdi ànu bwà kubasambakaja pàmwè, batuutakaja bukolè abu pàmwè too ne mwàfikàbo ku mwaba wà ukoka ntèmà, ànu apa mene.

124 Mpindyewu, aci’s mbwalu-bulonda, kakwèna muntu udi—udi ubùlonda ne meeji à kupeta cintu kampànda to, bàdi ànu batèèla cìdi cyenzèke. Kàdi wàkacyènza, kulamakaja èkèleeziyà pàmwè mu dyenza dyà manayi à pa buloba, bwà kusangisha èkèleeziyà wa beena Nikàlàwù awu. Mpindyewu vùlukaàyi ne, yéyè kàvwa mwà kulenga Èkèleeziyà mulediibwe cyàkàbìdi awu to. To, mukalenge, nànsha umwe wabo. Kàdi èkèleeziyà wa kwisùkwisù wa cyena Nikàlàwù awu kukwàciibwaku’s.

125 Kàdi citùdi naaci mu èkèleeziyà yètù yà cyena Mishòònyì ncinyi’s? Didyà dyà nsupu, manayi, dinyemena mu nìjè ne bisàbaata byà tukàta, (Kaa, ekèlekèle!) disumbisha dyà bèlàmbà byà nkòmbò, ne bikwàbò byònsò, nwamònu’s. Mpindyewu, s’nudi bamanye ne aci mbulelèlè. Èè, mpindyewu, piikalabi ne—piikalabi ne aci n’Dìyi dyà Nzambì, balunda bàanyi, m’Bulelèlè. Ne èkèleeziyà yònsò ya beena Mishòònyì mmipiile! Nwamònu anyi?

126 Mpindyewu, kacya Nzambì katuku mulongolole bwà—bwà kwikala ne didyà dyà nsupu ne maja mu nzùbu yà mwìnshì mwà buloba, ne lukutukutu lwònsò elu, bwà kufutabo mpaasàta ne bikwàbò to. Bu bantu biikalala balongeshiibwe ànu bwà kufuta byàdiikumi byàbò, nùnkù’s ki cyònsò cìvwaku cikengediibwa aci’s. Ki ndongamu wa Nzambì awu’s. Kàdi Nzambì ùtu ne ndongamu kampànda, kàdi muntu yéyè mmuswè kwenza

ndongamu wendè yèyè mwine, disopakaja dyà ndongamu wa Nzambi's. Eyo.

¹²⁷ Mpindyewu, mu kwenza nànkù, bàdi badisanga ne benza cyàmbedi...kwenzabo èkèleeziyà wa Kàtòlikè wa dyàmbedi, ndekeelu wa byònsò. Pashìshe ku Nsangilu munène wa kumpala wa Nicée...Pàngàakabalà cyôci aci, mèmè kupona ànu ku binù. Nsangilu munène wa Nicée wàkenzeka mu cidimu cyà 325 cyà paanyimà pàà lufù lwà Kilistò, bònsò bwàbò bàakadisanga pàmwè, bèèpiskòpò ne baataatù bàà diitabuuja dyà bwena Kilistò bàakadisanga bònsò pàmwè ku Nicée. Ki bwà cinyi cyàkabiikidiibwa ne Nsangilu wa Nicée, mu cidimu cyà 325 cyà paanyimà pàà lufù lwà Kilistò. Minyàmpalà mitwè ku cinunu ne nkàmà yìtaanu yàkalwa ku—ku—ku mpungilu ewu, anyi nsangilu ewu, minyàmpalà mitwè ku cinunu ne nkàmà yìtaanu, ne beena kwitabuuja bàvwa bapite bèèpiskòpò misangu yìtaanu ku búngì (mu mulongo wà minyàmpalà amu); kàdi nànsha nànkù, ku beena Nikàlàwù (bàà mmwènekeli wa mashika ne wa kwisùwkisù) ne ku ndongamu wa cidiiidi wa Constantín, bàakatàmba Èkèleeziyà mulelèlè ku masungulangana ne kubàcimunabo, ne kulwa kuupuka ku bèèpiskòpò ne bulondyanganyi bwà cijila bwà bantu; buumusha Nyu—Nyumà Mwímpè mu disangisha, kàdi baMutèeka pa bèèpiskòpò, baakardinale, ne baapaapà, ne bikwabo.

¹²⁸ Diibila dimwèdimwè dyàkenzàbo kùdi cisumbù cyà baadémocrate mu masungulangana à ndekeelu aa's! Mpindyewu, s'ncyà bushùwà. Mpindyewu, twètù katwèna... Ndi mufwànyine...Ne ba-Républicains mbafwànyine ànu kwikala bashààdile. Kàdi ndi ngàakula bwà cintu cimwèpelè cidìbo bajaadike (Edgar Hoover) mu Californie, ne mu myaba mikwàbò yàbúngì ne: bàvwa ne mashingi à masungulangana awu menza mu mùshindù wà ne paùvwa mufwànyine kwelela Mukalenge Nixon kakàndà apu, uvwa ne cyà kwela kakàndà aku bwà—bwà Kennedy musangu wùm wèwùm wè awu. Kàvwa ne mpungà wa kukwàta to. Èè, mpindyewu aci's ncijaadika ne “ndiibila,” kàadi mbwà cinyi kabàyi benza cintu kampànda pa bwalu abu? Tudi ne mwoyi mu díbà adi, mmwòmò, tukaadi ku cikondo cyà nshìikidilu. Mbacimanye, bàakajaadika ne bàvwa biibilè, kàdi mpindyewu kì mbaswè kwenza cintu nànsha cimwè bwà bwalu abu to.

¹²⁹ Aci's civwa diibila dyàkenzeka kale awu, nènku's ki dyòdi edi kàbidì dilediibwe ne: bwà kubweja muntu kampànda, bwà kutèeka dilongesha kampànda; Dilongesha dyà beena Nikàlàwù, divwà musangu kampànda ànu *byenzedi* kampànda—kampànda, mpindyewu ndilwe “dilongesha.” Mu matukù à Al Smith civwa *ncyenzedi*, kàdi mpindyewu's “ndilongesha.” Uh-huh, uh-huh. Mpindyewu cidi apa, cidi pambidi pèètù. “Kaa, yèyè's neikale mfùmù wa ditunga mulenga wa dipòkò,” mu meeji àanyi ncyénaku ne mpatà nànsha yà kànà pa bwalu abu to; menemene,

bwà cipungu cìdì cilonda aci, too ne mwàdisangishàyemù, kusangisha bampàngaanù ne beena Kilstò bàà kwisukwisù abu pàmwè's.

¹³⁰ Bàdi munkaci mwà kwenza Bibles, bwà kuteeta kubisambakaja pàmwè, baapaapà, ne baakardinale. Mwèpiskòpò mutàmbidile wa mu Angleterre, mwèpiskòpò mutàmbidile wa ku Canterbury, ngàakatwilangana nendè, kulabulangana nendè ku byanza, kuyiikila nendè, mèmè mwine, pàmvwà nsanganyibwa mu Angleterre; bibwikilu byà mikòlò byònsò byàmba kumufikila ne mu cifùka, ne (Kaa!) byenze bu muntu muvwale muwadilu wa lukutukutu's. Kàdi yèyè wàkaya bwà kukùmbula paapà, musangu wà kumpàla wàkakùmbulangabo munda mwà nkàmà yà bidimu. Ncinyi ciine aci? Tukaadi ku dîbà dyà ndekeelu!

¹³¹ Ki bwà cinyi ndi mwimane kaaba aka dilòòlò edi pamutù pàà kupatuka mwab'ewu kuya ku cyambilu mwaba mukwàbò kampànda nteeta kuyiisha ne kusambidila babèèdi. Kàdi ncyèna mwà kutuutakeena naabo bònsò mu byambilu to (kwamba kwambulula mayiisha aa), nènku ki bwà cinyi tudi tuWùkwàta pa mukàbà wa mèyì ne tuWùtuma mu buloba bujimà, mbafwànyine kwikala badimwija bwà kwalukila ku Diitabuuja.

¹³² Nànsha ku ndekeelu kwà cikondo cyà beena Kilstò, Yuda, kumpàla kwà Mukàndà wà Bwàkabuulwibwà kufundiibwawù; Yuda Munsantu, uvwa ne cyà kwikala mwanààbò wa balùme ne (mwanààbò mukolleshila kwàbò) Yesù, kwamba ne: "Ndi muswè bwà nwènù kulwangana kashèndèndè mvità bwà Diitabuuja dyàkafidiibwà musangu ùmwèpelè kùdì bansantu." Bàakabanga kuya naadi kule diine dîbà adi, paanyimà pàà lufù lwà Mukalenge Yesù. Nènku mpindyewu mmunyi mùdîbo naadi kule dilòòlò edi? Nwamònu's.

¹³³ Mpindyewu, Nsangilu wa Kumpàla wa Nicée ewu, nènku ùvwa mu cidimu cyà 330...325 paanyimà lufù lwàà Kilstò. Mínyàmpalà mitwè ku cinunu ne nkàmà yìtaanu ne bèèpiskòpò kuyabò mu disangisha adi, kàdi bàakabàbenga, mu nsangilu wa mikùkuuku, wa cikùmà awu's. Kàdi kubàbengabò, ne kusungulabò mu mùshindù wa ne beena Nikàlàwù kucimunabò, ne ùvwa ne cyà kwangata...èkèleeziyà yònsò, ne kumutèeka ku bukòokeshi bwà baapaapà anyi—anyi bèèpiskòpò, anyi cikampànda; banyenga Èkèleeziyà bukolè bwà kubùfila kùdì bèèpiskòpò, bwà kukèngelabi ne bèèpiskòpò kukòokeshabo Èkèleeziyà ne kwikalabo ànu nkaayabo bàvwa ne cyà kwamba bwà bwalu Bwèndè's.

¹³⁴ Nuvwaku bamòne mu èkèleeziyà wa Kàtòlikè leelù ewu anyi? "Kanwena mwà kubala Bible awu to, aci kî mbwalu bwènù nwènù bwà kuumwija to. Abu's mbutangile mwèpiskòpò." Nudi numòna kùdici cifume anyi? Mpindyewu nudi mwà kumòna

civwa beena Nikalàwù menemene kumpàlà kwà kubangaci kwela nshibà ne kutampakana. Cyàkalediibwa ànu mwab'awu mene. Aci's ncilelèlà. Nènku civwa mmwènekeli wa bwena Kilstò; cicidi ànu nànkus wè!

¹³⁵ Ki beena Mishònyì kucitentulabo. Bible, mu Bwàkabuulwibwà 17, mmwàmbe ne: “Maamù ne bânà bèndè bàà bakàjì.” Netùkafikeku paanyimà pàà katanci, bu Mukalenge mwà kwanyisha. Mpindyewu nudi numòna mbyà mwomùmwe leelù ewu, mbakòòkeshe's. Mpindyewu, Constantin wàkakwàta mudimu ne ngenzelù wa Baalàmà's.

¹³⁶ Mpindyewu, ndi muswè bwà nutèeleje ne ntèmà ne mwènù mwònsò's. Mpindyewu, Yèyè mmwambe mwab'ewu, mu Bible emu ne: “Shààla mukwàte bikolè diitabuuja Dyànyì.” Mpindyewu:

...ndi ne ndambù wa maalu àndi nkupùshila, bwalu wèwè udi ne...wèwè...bwalu wèwè udi naabo muntwamu... (kí mbàdi apa aba to, kàdi bàdi kwaka; bàdi naabo, “ùdi naabo mu—mu èkèleeziyà wa Pègàmò,” wamònu's) ...kacya bààkwata dilongesha dyà—dolongesha dyà Baalàmà, yèyè wàkalongesha Baalàkà bwà kwela dibwe dyà cilendwishi kumpàla kwà bânà bàà Izalèlèlà, bwà kudiyàbo bintu bilàmbula mpingù, ne bwà kwenda masandi.

¹³⁷ Mpindyewu, Constantin wàkangata ngenzelù umweumwe wakenza Baalàmà awu's. Bààkenza cisangilu kampànda paanyimà pàà cisangilu cyà nsangilu ewu mwàkatèekabo bèèpiskòpò kumutù kwà maèkèleeziyà, ne bikwàbò, bwà kuyilombola, ne kunyenga beena kwitabuuja bukolè bwònsò ne: “Nènku kabàvwaku ne ngeelèlu wa meeji wa mu bòbò to, anyì kabàvwaku ne bukenji bwà kuumvwija Mifundu to.” Kàdi ki ne byònsò bìvwa bwà bansacerdòsè, ki bàvwa ne cyà kuumvwija Mifundu.

¹³⁸ Ndekeelu wa byònsò, paanyimà pàà cikondo, kutèekabo nsacerdòsè mfùmù, nènku bòbò...mupinganyi, ùvwa paapà. Kàdi mpindyewu bakaadi bafike mu cipidi cyà bacitèeke ne: “dyumvwa dyònsò—dyònsò ndyà nsacerdòsè, kàdi kabyèna bikèngela bwà disangisha kubaladi Bible to, kabyèna bikèngela bwà kwenzabò cintu nànsha cimwè to;” nènku, bwà kwamba menemene, bòbò...kabèèna mwà kulenga Bible to. Nènku mpindyewu mba—mbacyàngate bòbò nkaayabo ne bààkatùsungwilaci twètù bwalu civwà cimwèka cimpè.

¹³⁹ Civwa cimweka bimpè bwalu bàvwa babanji, ne bikwàbò, ki yèyè kufila...Mu cisangilu cinène eci, pàakakungwijaye bònsò pàmwè, Constantin wàkapa bèèpiskòpò nzùbu milenga yà kacya; kwangataye bukòòkeshi pa mfranga kampànda ne—ne pa myaba yònsò minène yà lumù...bu mùdi nzùbu, wàkafila ebi kùdi èkèleeziyà, bwà bààmòna mwà kukwàta naayi mudimu

bu—bu nzùbu yà èkèleeziyà. Kaa, s'yìvwa nzùbu milenga yà dikèma, yònsò milengeja cileya's, ne bikwàbò, ki kuyifilaye kùdi èkèleeziyà.

¹⁴⁰ Pa kuumusha aci, kulwacikaye bèèpiskòpò ne mizàbì minène, ne mitambu yà mwinshì ne bintu mwinshì mwààyi amu. Kàdi pa kuumusha aci, yèyè wàkabatèèka pa . . . anyi kwibaka mwaba mutùmbùke mùshindù ewu, ne kubatèèkaye kuulu aku bu lupìngù kampànda lwà dikuukwila. Ne lwà mwinshì mwàbò amu kwenzaye byoshelu byà mabwe matòòke mafinùnùke, mwinshì mwàbò amu. Nènku wàkenza dishintuluka dyònsò edi, byangacila ku mmwènenu wa cimpàngaanù, mwab'awu, ke kubwejamu bwenà Kilistò mu dyangata dyà mwèpiskòpò wabò. Nwamònu's, ki kuumushabò ànu lupìngù alu kàdi kwaluja mwèpiskòpò awu's. Nwamònu's, kumwenzela cyoshelu, cintu cìmwècìmwè aci, ne kumuvwija kaanzambì. Kutèèkabò mwèpiskòpò, nènku ke uvwa ne díyi dyà kwamba, kumuvwadika yèyè yònsò ne kumuvwija mufwànàngane ne kanzambì kampànda. Pamutù pàa kumutèèka mufwànàngane ne tunzambì twàbò twà cimpàngaanù atu, kumulwàcìkabò mùzàbì bu mwàkalwàta Yesù amu's. Nwamònu anyi? Kàdi kumuvwijabo ànu bu lupìngù lutèèka mwab'awu.

¹⁴¹ Kaa, udiku mwà kudifwànyìkijila mwàkamba mumpàngaanù awu's: "Èè, mèmè's ndi mwà kwitaba aci, kùdi muntu kampànda udi mwà kutwàndamuna's. Tutu twakula ne lupìngù, kàdi muntu ewu ùdi mwà kutwàndamuna's."

¹⁴² Muvwa beena Kilistò beela meeji ne: "Èè, abi's bìdi ànu bìmpè. Mpindyewu tudi mwà kwenza cyònsò citùdì baswè kwenza aci bwalu's ki nzambì wetù wàwa's. Tudi ànu mwà . . . Tudi mwà kuyiikila nendè, yèyè ùdi mwà kutwàndamuna ùtwàmbila cyà dyanza. Twètù benze mpèkaatù, netùmwbabileyi, tumupèèsha kantu kakesè kampànda, ne kakesè . . . kwenza kaacijila kakesè kàa matùkù citèema anyi cintu kampànda; kàdi katancì aka anyi, byònsò nebyende bìmpè bwètù, nènku twalukila pambelu tudyùmvwà badiikàdile cyàkàbìdì. Katwakuditàcìsha bwà cintu to."

¹⁴³ "Kaa, aci's cìvwa cìmwènèka cìmpè's." Bushùwà's! Cìcìdi ànu cìmpè bwà meeji à musunya, kàdi kwàdyàkucìfìnyìkaku munda mwà mwànà wa Nzambì mulediibwe cyàkàbìdì awu to. Kacya kabàtuku bakumbane mwà kucyènza to. Bwalu yèyè mmumanye ùdi Yè mwitàbùùje ne mutwishìibwe ne Yèyè ùdi ne bukolè bwà kulama cìdì cìMupèèbwe too ne ku ditùkù adi aci. Nènku tupwa mwoyi maalu àkaadi mapite, tudi tukolesha batàngile ku kiipàcìla kàa dibìikila ditùmbùke mu Kilistò. Amen! Kaa, mùshindù mwine wùndì ne kusakidila's wè!

¹⁴⁴ Cyoshelu cyà mabwe matòòke mafinùnùke mwinshì mwabu amu, basòmbè mwab'awu, bavwale cileya, èkèleeziyà mulenga. Kaa, èkèlekèle, bàvwa bònsò balongolola. Èyo. Nènku cyoshelu

cìwwa cibwikidija cyònsò, cyoshelu cyà mabwe matòòke mafinùnùke, cilenga kumòna eci. S'bíwwa bikèngela wèwè kubimòna kàbìdì, ncintu cìmwècìmwè aci's. Cibwikidija cyònsò ne ngòlò, ne cyasa bilengejilu, bilengà's mu cyoshelu aci amu. Bilenga byà kacya's wè! Cìwwa citàmba kukumbanangana ne beena Nikàlàwù ne bampàngaanù. Nwamònu cyàkenzaye anyi? Wàkangata mishìngà yà cimpàngaanù, mmwènenù yà cimpàngaanù; ne kwangata bwena Kìlistò, bàvwà bàà mashika bàà mmwènekèlu wa kwìsùkwìsù bàwva kabàyi ne cìwàbò bamanye abu, kabàyi ne Nyumà Mwìmpè bwà kubàlombola bishìilangane to; kàdì kubènzela nzambì panu pa buloba apa, ne kubènzela cyoshelu, ne kaanzambì bwà kusòmbaku mwab'awu bwà kubàfwila luse ku mpèkaatù yààbò. Nudi bà nyumà anyi? Nudi buúmvwè cìndì muswè kwamba aci anyi? Nwamònu cìdìci anyi? Difwà dyà luse ku mpèkaatù pa buloba.

¹⁴⁵ Ncyèna ntèelela aci mu meeji àanyi to, ki bwalu-bulonda mbwòbù abu. Nnupeku dibèji ne nomba wa maalu-malonda mansantu, ànu mùshìndù ùmwèùmwè wùndì mwà kunwambila bwà George Washington amu, ne Abraham Lincoln, ne Mvità ya ku Gettysburg, ne bikwàbò abi amu. Cyà bushùwà, bintu byònsò abi bìdì ànu maalu-malonda àndì ntèèla mwab'ewu aa.

¹⁴⁶ Mpindyewu, pashìishe bìwva bikùmbanangana menemene bwà...kabìyì bwà Èkèleeziyà mulediibwe cyàkàbìdì ewu to. To, mukalenge! Èè, pàdìbo bàbàndisha muntu kuulu kwaka mpindyewu, bwà kwikalaye mwèpiskòpò mfùmù, bwà kwambulula mishìngà, mu bushùwà bwà bwalu aci's cìdì cipatula Èvànjeeliyò Mukaabujimà pambelu pààci. Cìdìci cyenza kàbìdì nàнку leelù ewu's. Bikondo abi's mbitungunuke ànu, mbangilu wa cìmwè wàmbakana ànu ne ndekeelu wa cikwàbò, nwamònu's; mmwènekèlu mukwàbò, ditùkù dikwàbò. Kaa, pàdìbo batèèka muntu wa mwànzù mutùmbùke kuulu aku bu kaanzambì, nènku neikale ne ndambù wa mishìngà myamba.

¹⁴⁷ Kàdì mònaayi ne bampàngaanù bàwva basambila bankambwa bààbò bafwè abu's. Nènku èkèleeziyà wa Mishònyì uvwa mufwànyine kwimana ne kwamba ne: "Ndi ngiitabuujà Èkèleeziyà wa Cijila wa Kàtòlikè wa cyena Loomo ne bwobùmwe bwà bansantu." Nwènu ba-Méthodistes sokòkaayi mpàla yènu, nwènu ba-Presbytériens, ne ba-Luthériens. Cyònsò cìdì cyàkwilangana ne bafwè nditèndeleele dyà bakìshi! Bushùwà's. Kàdì, mpindyewu, mwena Mishònyì kèna mwà kuseka mwena Kàtòlikè to, yèyè's ùdì wenza cintu cìmwècìmwè aci, wenza ditonda didì dikumbane mu byònsò edì ne yèyè ùdì wìtabuujà cintu cìmwècìmwè aci; mubàtìijìibwe buludì mu èkèleeziyà wa Kàtòlikè ku dibatiiza dyèndè dyà mu màyi, bàbènga ne baseka bantu bàdì bateeta kwikala ne nsòmbelu mujaalame; baya mu èkèleeziyà ne bamòna bantu beela mbila ku bukòlè bwà Nzambì, kàdì biimana pambelu ne bàCiseka. Byònsò abi's.

¹⁴⁸ Nwamònu's, nyumà kayìtu yìfwa to; bantu mbatù bàfwa,

kàdi nyumà to. Nwamònu anyi? Nyumà Mwímpè, Yèyè kèna mwà kufwàku to. Ùvwa pambidi pàa Yesù, mpindyewu Ùdi mu Èkèleeziyà Wendè; nebiikale ànu nàнку misangu yònsò too ne pàalwaYe *bwà* Èkèleeziyà Wendè, bwalu Ùdi citupà cyà ku Yèyè. Nwamònu anyi? Nànsha bakengeshanganyi, bàà—bààkabàseka kale awu mu ditùkù adi, s'jàcidi ne mwoyi too ne leelù ewu's. Nzambì ùtu uumusha muntu Wendè pa buloba kàdi kì n'Nyumà Wendè to. Dyabulu ùtu uumusha muntu wendè pa buloba kàdi kì n'nyumà to.

¹⁴⁹ Baakwidi bààkiitaba lufù lwà Yesù abu, bààkamba ne Yèyè ùvwa “mwena lubuku,” anyi “démon,” balùmyànà abu's bàvwa batèndeledi ànu mùdi batèndeledi bwònsò emu's. Ncyà bushùwà. Bàvwa bamanye Mufùndu awu ku dileeta ne ku dileeta, kàdi kabàvwa bamanye dyumvwija dyàWù dilelèlè to. Bàvwa ne wabò mmwènenenu wa sungasunga, ne kabàvwaku mwà kutèèleja cingà cintu to. Ne pashìishe bààkaMumòna ne kumanya . . . Mmunyi mùvwàbo mwà kupanga kumòna ne Yesù ùvwa ukumbaja kantu ne kantu kònsò kàvwa mupròfetà yònsò mwambe bwà bwalu Bwendè? Kàdi bàvwa bampofu. Ne Nzambì wàkamba ne Yèyè ngwàkafofomija mèsù àbo bwà kiipàcila kampànda, bwà twamòna mwà kupeta mpùngà wa lupàndu.

¹⁵⁰ Mpindyewu Bible's mmudyànjlile kwamba kàbidì ne Yèyè neikalè . . . ne twètù tudi mu Cíkondo cyà Mpenta eci, mùdìbu “butaka, beena dikenga, mpofu, kàdi kabàyi bacimanyè to.” Kì ngiikadilu wa èkèleeziyà nyèyè awu, Filàdèlèfiyà. Kaa, nwènù ba-Baptistes bàà kwìsùkwìsù, ba-Presbytériens, ne beena Mpenta's! Nwamònu's, s'ki nwènù abu. Misangu mikwàbò ncyèna nnwamba nwènù bàdi basòmbe kaaba aka aba to; Bìndì ngàmbe ebi bìdi pa mukàbà wa mèyi, nudi numòna's, ne ndi mumanye kuyaayàbi. Nwamònu anyi? Nyingalalaayi! Alukilaayi ku Bible! Alukilaayi kùdi Kìlistò!

¹⁵¹ Èyo, kàdi aci's ki cyàkenzeka, Èvànjeeliyò Mukaabujima wakabengiibwa. Bimanyinu ne maalù à kukèma byàkuumushiibwa mu èkèleeziyà, ne pàvwà cisumbù cyà Nyumà Mwímpè ciipàcìbwe munkaci mwà bakwàbò, ki kuvilabo ne ditùkù dyà byà nàнку kadicìvwakù to. Nènku cìvwa nku cyòci aci . . . Nènku bàdi benza cintu cimwècimwè aci leelù ewu! Mmwòmò menemene. Kanwènakù mwà kumòna nyumà wa cyòci aci anyi? Ànu mùmvwà munwambile; ku ntwadijilu, vwalaayi ngeelèlù wenù wa meeji wa nyumà, lekelaayi Nzambì akangule mwoyi wènù. Kanùdyànjidì kucibenga to, sòmbaayi ne nutèèleje; nwambe ne: “Nyumà Mwímpè, ùmbuulwileku. Ndi ncimòna, ki cyòci aci.”

¹⁵² Mìshingà pa yòyi. Penyi apu's? Ba-Baptistes, ba-Presbitériens, ne beena Mpeta mene, cishààle ànu musingà wà butèndeledi. Cintu cimwèpelè cyenzenzabo nkutuuta pa pyano, *cintu kampànda bu aci*, batumpika muulu bapingana panshì katanci; kàdi pàdi pyano awu wimana anyi: *Fuuuuuu!*

Bàpàtuka baya, bakiibila, bakiiba, bakashima, bikwàbò byònsò. Kàdi cyà bushùwà . . . Ne cijji cikumbane mwà kulwangana ne scie wa ùnyùnguluka, wàkula bwà bantu bwònsò ne bikwàbò byònsò. Nwamònu anyi? S'ki bwalu mbwòbù abu. Kí ng'ánu ba-Méthodistes, ba-Baptistes, ba-Presbytériens, beena Kàtòlikè to, kàdi ng'èkèleeziyà wa beena Mpenta mu Cikondo cyà Laòdikiyà emu.

¹⁵³ Kaa, bwà cinyi kanwèna nwalukila ku cyòci civwa naaci bankambwa bèènu aci? Bwà cinyi katwèna twalukila ku mpenta mulelèlè udi ujidila ne uuja ne Nyumà Mwimpè, udi utùtwàdila Kilistò awu? Ki cidi citùkèngela aci's. Èyo. Mpindyewu, byà mwomùmwe leelù's!

¹⁵⁴ Mpindyewu, mwàkù ewu *Peegàmò* ùdi umvwija ne “musediibwe.” Mwàkù mene *Peegàmò* ùdi umvwija ne “musediibwe.” Bwena Kilistò, aci nduseke lwà beena Nikàlàwù, luseke lwà maalu à kwísùkwísù, musèlangane ne mbulamatadi, ne mishingà yà cimpàngaanù. Mishingà yà cimpàngaanù! Nènku's civwa ndilediibwa dyà èkèleeziyà wa Kàtòlikè mu ditùkù adi.

¹⁵⁵ Mpindyewu, muntu kanà yònsò ewu mmumanye ne èkèleeziyà wa Kàtòlikè wàkafikishiibwa ku diikalaku ku Nsangilu wa Nicée. Kumpàla aku, Nzambi ùvwa ùcibiikila ne *beena Nikàlàwù*, cidi cyùmvwija ne “nikaò,” *nikaò*, “kukòòkesha,” kucimuna, anyi kumwèna beena kwitabuuja. Nènku pààkenzàbo nànkù, kabàakaswa bwà Nyumà ikale munkaci mwà bantu to, ne *bampaasàtà*, cidi cyùmvwija ne “balami bàà mikòòkò,” bwà kulekela Nyumà Mwimpè. . .

¹⁵⁶ Wèwè udi wamba ne: “Mòna's, nsaserdòse kèna mwà kwikala mulami wa mikòòkò anyi?” Ncyàkudyà cyà mùshindù kaayi cidiye ùnùdiisha? Nudi nupeta bipeta bimwèbimwè byàkapetàbo, Ditùkù dyà Mpenta abi anyi? Ncyà bushùwà ne kí mmwòmò to! “Mwoyi Màriyà,” nganyi wakamònaku aci ku Mpenta? Bijila byà byàkudyà byà matùkù citèèmà, dimyaminangana dyà màyi dyònsò edi, dipongolwelangana dyà màyi, dikwàta dyà mudimu ne Nzambi pasatu (“Taàtù, Mwàna, Nyumà Mwimpè”), mpenyi panùdiku nupeta aci ku Mpenta? Yesù wàkamba ne: “Nzùbu yònsò wa Izalèlèlè amanye ne ditwishiibwa dyònsò ne, Nzambi mmwenze Yesù umwèumwè ewu, unwàkapoopela pa nkùruse ewu, byònsò bibidi Mukalenge ne Kilistò.” Ncyà bushùwà. Tudi tupetela bintu abi penyi? Mbwenà Nikàlàwù ànu kwine kwònsò aku, kàdi kulwa kubwenza mu cyena Kàtòlikè.

¹⁵⁷ Mpindyewu wèwè udi wamba ne: “Èè, s'ncyà bushùwà ne ndi ne disànka mùndi ncayi munkaci mwàbo.” Mpindyewu kwikadi mutwishiibwe bikolè menemene to. Nwamònu anyi? Mpindyewu vùlukaayi ne: Bwena Kilistò, bwena Nikàlàwù. Mpindyewu nùmvù bwalu abu anyi? Tèelejàayaaku ne ntèmà kumpàla kwà

twètù kutàmba kuya kule. Ndi muswè bwà nwènú kucyùmva bu twètù mwà kushààla mwab'ewu too ne mundankulu. Pa nàнку, uh-hum . . . pa nàнку . . . bwalu, mwanèètù, mmusùùkà wèbè ùdi ne bwalu's! Udi mwà kwamba ne: "Èè, mèmè's ndi wa mu . . ." Aci kî—aci kî ncyôci to. Wèwè kuyi ne Nyumà Mwímpè to, mwanèètù, nànsha wèwè mwikàle wa mu èkèleeziyà búngi kaayi, udi mujimine. Pawíkala kuyi mulediibwe cyàkàbìdi ku Nyumà wa Nzambì, ku dibatiiza dyà Nyumà Mwímpè to, udi mujimine; bwalu kwèna ne Mwoyi wà Cyendèlèlè to, ne Mwoyi wà Cyendèlèlè ki cintu cìmwèpelè cyàbìishà Nzambì, bwalu Cidi mmwoyi ùmwèpelè ùdi mushààle.

¹⁵⁸ Piikala ditungù dyà ditala . . . bu múngàtèèdi kaaba aka, Dìbà dyà Dikuna dyà mamiinu. Mbanganyi bàdi bavùluke Mwanèètù Spurgeon mununu, muiyiishi wa ba-Méthodistes wa ku Henryville kwaka awu? Muntu mununu mulenga wa dikèma. Dìngà ditùkù, tuvwa basòmbe ku nzùbu wa dyabanyina mabèle makwàtàkane ku Red Furnish kwaka, munkaci mwà kudya mabèle makwàtàkane; ne tuvwa munkaci mwà kwakula bwà disangisha dímvwa mwenze lwà kuntwaku, ne Dìbà dyà Dikuna dyà mamiinu dívwa munkaci mwà kwenzeka. Nèngu Red úvwa ne—ne cikolokolo cikesè cikangula, ne cyà . . . cyà cisanji cyèndè citèèka lwà pambelu apu. Ne mwaba kampànda bàvwa bàakula . . . mu bushùwà bwà bwalu mukenji úvwa úfùmina ku Louisville. Kàdi Kasumbù kàà 4-H kàvwa—kàvwa kapete màshinyi àvwa mwà kupatula ditungù dyà ditala dívwaò mwà kwelamu kàlisiyumù, ne mpiitùloolù, ne bintu bikwàbò byònsò abi mu ditala adi, ne kudivwija dyenzà ànu menemene bu dyà ku . . .

¹⁵⁹ Beena 4-H bàvwa naadi, maalu à mamanya àvwa macisheemeje mu mùshindù wà ne ditala adi dívwa dimweka dilelèlè menemene byà wèwè mufwànyine kubooya dyanza mu mufuku wà àdi makolèle mu budimi, ne dyanza mu mufuku wà àdi menzela ku màshinyi awu, ne edi dyà aa (àdi màshinyi menze awu) mmawànyine kwenze mùshindù wà bukula ùmwèùmwe bwà matala, ne dyàmpà dyà matala. Nèngu bulelèlè udi mwà kuya naawù ku cilambidi cyà manga ne kuàpandulula, matungù awu's, kàdi kuyi mufwànyine kutapulula edi ne dikwàbò nànsha. Àdi ne búngi bwà mpiitùloolù bwà dyàcìmwè, búngi bwà kàlisiyumù bwà dyàcìmwè—bwà dyàcìmwè, ne—ne mutaleela; byònsò bitù bibwela mu ditungù dímwèpelè abi, bitù mu dikwàbò adi.

¹⁶⁰ Kwambaye ne: "Mùshindù ùmwèpelè musunguluke wà kumanya dívwa ditòlòkèle mu budimi, ne dívwa dyenzela ku màshinyi: kuna wèwè manza ónsò àbìdi awu's. Nèngu ónsò neàbolè, kàdi edi dívwa dyenzela ku màshinyi adi kadyàdyà kutoloka kàbìdi to; kàdi edi dívwa Nzambì mutolwèshe adi, nedyàlukile cyàkàbìdi ku mwoyi." Bwà cinyi? Bwalu kadivwa ditòlwesha to.

¹⁶¹ Nènku udi mufwànyine kwikala ne mmwènekeli wa mwena Kilistò, kwenza maalu bu mwena Kilistò, ne kwenza cyenzedi cimpè cyònsò cyùdì mufwànyine kwenza aci, ne kwikala ne nsòmbelu wa lulamatu kùdì èkèleeziyà webè; kàdi paùdì kùyì mutòlwèshiiibwe ne Nyumà Mwímpè to, Mwoyi wà Nzambi, Mwoyi wà Cyendèlèlè ubwela munda mwèbè; kí nku ditonda to, kàdi nku *dipà* dyà Nyumà Mwímpè. Nudi nuMupeta bìshi? Ngàngàbukà wakafunda kabeji kàà bwanga aku, wákamba, mu Ditùkù dyà Mpenta, ne: “Nyingalalaaayi, ne nubatiijiiibwe muntu ne muntu wa kunùdì mu Dinà dyà Yesù Kilistò, nènku nenùpete kupà kwà Nyumà Mwímpè.” Kupà kwà Nyumà Mwímpè, cidì Mwoyi wà Cyendèlèlè. Ki cintu cimwèpelè cyàbiiishà Nzambi ncyòci aci. Ncintu cimwèpelè cidì ne Mwoyi cidìYè mwà kubiiishà. Nwamònu anyi? Ki cintu cimwèpelè cidì mwà kuya ncyòci aci. Ndi ntèkemena ne aci nci tòòke. Nzambi ènzèku ne ciikalè citòòke.

¹⁶² Mpindyewu, beena Nikàlàwù musangu awu bàvwa ne luseke lwà bintu byà kwisùkwisù, ne bàakasèlangana ne èkèleeziyà wa bampàngaanù; babweja byoshelu byà cimpàngaanù, bàbyenza byoshelu byà cyena Kilistò; kubwejabo kaanzambi kàà cimpàngaanù, kukafikisha ku dyakula ne kuyiikila, mu mmwènekeli wa mwèpiskòpò. Kushikama mwab’awu, kumulwacika muzàbì ne kumwenza mufwanangane ne nzambi. Nudi numòna anyi? Bwalu kí mbwà cidì pambelu to, mbwà cidì munda. Matungù àbìdì à ditala aa àvwa mafwànangane; kacivwa bwà civwa pambelu to, mbwà civwa munda. Nwamònu’s, munda, Mwoyi. Èè, cyàkenjiibwa mwab’awu, nènku’s ki mwaba wà kalediibwa èkèleeziyà wa Kàtòlikè wa nzànzànzà, ùvwa mamwèndè wa èkèleeziyà yònsò yà màngumba.

¹⁶³ Mpindyewu wèwè udi wamba ne: “Èè, mèmè. . . Mwanèètù Branham, díbà adi’s bu mùndì nciyi mwena Kàtòlikè’s.”

¹⁶⁴ Mpindyewu, ànu kansunsa kàmwè, twánjìbì kwimana apa bwà katanci kakesè, byòbì mene. Nènku twánjì—twánjì kubuulula mpindyewu mu Bwàkabuulwibwà, nshapità wa 17, katanci kakesè cyanààna. Ndi mubuululè ànupù buludi’s. Mpindyewu, eci ndibuulula dyà cinyi? Yesù Kilistò, kùdì èkèleeziyà Yèndè. Pàndì mbala apa, tèelejèeyi ne ntèmà:

Nènku kwàkalwa umwe wa ku banjèlò mwandamutekète bàvwa ne mpànzà mwandamutekète, ne kuyiikilaye naanyi, wamba ne. . . Lwila apa; nènku nènku lejè. . . dilumbulwisha dyà ndumba munène udi musòmbè pamutù pàà màyi àbúngì:

¹⁶⁵ Mpindyewu, bwà ngaamòna mwà kwikala ne ntemu, mbanganyi bàdì bamanye ne mukàjì mu Bible, musangu wònsò ùdici cifiidiibwe mu cimfwànyì, cidì cyùmvwija ne “èkèleeziyà”? Eyo. Mbanganyi bàdì bamanye ne mukàjì munène “wa masandi

awu” ànu mwab’ewu mu nshapità umwèumwè ewu, ki “cimenga cidi cisòmbè pa tukùnà mwandamutekète”? Èyo.

¹⁶⁶ Nènku mpindyewu mbanganyì bàdi bamanye ne Bible mmwàmbe ne “mâyi”? Ke yêyè ewu musòmbè pa “mâyi àbùngi”; kî *mmâyi* kampànda to, kàdi “mâyi.” Nènku *mâyi* àdi ùmvwija “bantu.” Mòna’s, angàtaayi nshapità wa 15, nudi mwà kumòna apa, nwamònu’s, mvensa wa 15, nwamònu’s:

Ki yêyè kungambila ne: Mâyi àudi umòna awu, pàdi ndumba awu musòmbè, àdi mbantu, . . . misùmbà, . . . matùnga, ne myakulu. (Nwamònu anyi? Nwamònu anyi?)

¹⁶⁷ Mpindyewu, mukàji ewu ùvwa muvile diitabuuja. Kî mmwòmò anyi? Mpindyewu eci ndilongesha, pa nàнку udi ne cyà kutèeka kondo kèèbè kàà mwoyi ku luseke mpindyewu. Nwamònu anyi? Ncinyi cidìbo bàbìikidila mukàji mukooyike awu ne “mmukàji wa masandi”? Mmukàji udi kàyi ne lulamatu ku mucipù wèndè wà dibàkà. Mpindyewu èkèleeziyà, èkèleeziyà wa Kàtòlikè, ùdi wàmba mùdiye Mukàji-musela ne Mukàji wa Kilistò. Too ne badyambike bakàji bàdi bakosa nsuki yàbo, ne kabeena ne majinga to, “àbo majinga ònsò àdi kùdi Kilistò.” Ncyà bushùwà anyi? Bushùwà. Anyi muntu kanà yònsò . . .

¹⁶⁸ Ndi mufùmine mu dikù dyà beena Kàtòlikè, nwamònu’s. Ndi ne *Malelèlè À Diitabuuja Dyetu*, ne mikànda yàbo; ne beena Mishònyì bèènù, ne ba-Baptistes, ne cyònsò cinùdi nwitabuuja aci; mu birò byànyì mwàmwa. Pa nàнку, ndi ncilonga mu mùshindù wà ne muntu kampànda yêyè mudìdinge mwambe cintu kampànda. “Kaah!” Ndi mwà kukwaluja buludi ku mèyi èbè wèwè awu’s. Nwamònu anyi? Pa nàнку, dìbà dyaalu bwà Cyòci eci kupatuka.

¹⁶⁹ Mpindyewu, cintu cyà kumpàla, bìvwa bikèngela bwà Nzambì kupicilaye mu ditùnga dijimà emu, wènda ùleeja bimanyinu, maalu à kukema, ne bishimà, bwà bantu bààmònaku mwà kumanya. Mikòòkò yà Nzambì mmimanye Dìyi Dyèndè, mmimanye, mmimanye menemene. Bìdi bikèngela bwà wèwè kwanji kupeta. . . Udi upatuka kùyi mumanyike to, dìbà adi udi ànu. . . Cyùdi wenza ncinyi? Udi ubenzela bibì kutàmba byà kacya kwònsò eku. Lekèlaayi. . . Nzambì àtàngile bwalu abu. Nwamònu anyi?

¹⁷⁰ “Nènkuleejè dilumbulwisha dyà ndumba munène awu.” Mpindyewu, bu ne yêyè ùvwa cyòci aci, dìbà adi’s ùvwa mukàji wa ùlaka mukana wàmba mùdiye cintu kampànda cìvwa. . . Ùvwa wènda masandi! Ncyà bushùwà anyi? Èè, dìbà adi, piikalabi ne cìvwa ng’èkèleeziyà, ùvwa wènda masandi kùdi Nzambì. Ncyà bushùwà anyi? Dìbà adi masandi, mbifwànyìne kwikala masandi à mu bujike, masandi à mu bujike à *mu nyumà*: ùdi ùlongesha bantu cintu kampànda cidi kaciyi Dìyi dyà Nzambì to. Mmwòmò anyi? Yêyè ùdi ùlongesha cintu

kampànda cìdì kacìyi cilelèlè to. Ki beena Nikàlàwù abu's. Nudì numòna mùdici cìlwa kaaba aka anyi? Wamba kuya too ne kuditéèka baapaapà, ne bansaserdòsè, ne wìpata Nyumà Mwìmpè ne: "Matùkù à bishimà àkaadi mamane kupita"; pèndè Bible mmwàmbe ne: "Yesù Kilistò ng'umwèumwè awu makèlèlè too ne kashidi." Bible mmwambe ne: "Nyingalalaayi, ne nubatiiibwe muntu ne muntu wa kunùdì mu Dìna dyà Yesù Kilistò bwà dilekelediibwa dyà mpèkaatù yènu"; ùdì wamba ne: "Taatù, Mwànà, ne Nyumà Mwìmpè," ùmyamina màyi, ùpongolola eku ne eku. Kaa, ekèlekèle! Nwamònu anyi?

171 Èyo, tàngilàayi numòne cìvwà mukàjì ewu wenza's:

*. . . udi bamfùmù bàà pa buloba bende nendè masandi,
ne bantu bàà . . . pa buloba mbakwàcìke ne mvinyò wa
masandi èndè.*

172 "Mukwàcìke!" Ukushipa, ukushipa ufwà, ukwasa ku cingoma, anyi nì ncinyi cikwàbò cyònsò, mwanèètù. Kakùyi mpatà to mbakwàcìke ànu ne cintàkanyi aci. Nwamònu anyi?

173 "Mvinyò." Ki cìdiye upatula ncyòcì aci, nwamònu's, mvinyò wendè wa masandi èndè. "Lekelaayi nnwàmbilèku cintu kampànda! Wanyì maamù ùvwa mwena Kàtòlikè, nèku mèmè. . ." Èyo.

174 Mpindyewu wèwè udi wamba ne: "Aci's ncibi be." Mpindyewu anji indilaayibi kakesè, nwènu beena Mishònyì. Huh! (Ndi ngambila bàdì balonda pa mikàbà yà mèyi aba, nwamònu's.)

*Ki kuyaye naanyi kule mu nyumà too ne mu cipèèlà:
nèku mèmè kumòna — mèmè kumòna mukàjì musòmbè
pa nyama wa diikala dikunze, . . .*

175 Mpindyewu, mwàkù mukùnze ewu ùdì uleeja cinyi? Ùdì uleeja ne "bumfùmù." Ùdì ùmvwija. . . Ndi muswè kwamba, mbwena kwamba ne, "wa bumfùmù, wa lulamatu, wa bumfùmù," nwamònu's, bu mùdì bamfùmù ne bikwàbò.

*. . . mùle tètè ne mènà a kupenda naawu Nzambi,
mwikàle ne mitù mwandamutekète ne nsèngu dikumi.*

176 Mpindyewu, mitù mwandamutekète ki "mikùnà" mwandamutekete yìdì cimenga aci cishikàmine. Ne mukàjì ewu ki cimenga aci, tudi bamanye.

*Ne mukàjì awu ùvwa muvwale bivwalu byà
bikùnzùbile. . .*

177 "Mukàjì awu." Nyama ùvwa mukùnze, kàdì mukàjì ùvwa muvwale bivwàlù byà bikùnzùbile. Mpindyewu, ncìvwaku munudimwije ditùkù adi, ne kùdì ridò yìsatù anyi? Ncyèna mumanye ne nêngìkale ne mwoyi too ne ku dîbà kaayi to, kàdì vùlukàayi eci. Ànu mungànwàmbìdì kukaadi bidimu byàbùngì ne: "tàngilàayi Russie." Kùdì ridò yìsatù, nwavùlukaayi eci. Kùdì ridò wa *cyamù cìfùke*. Kùdì ridò wa *nshìbà* (Chine

Mukünze ne *bikwàbò*). Nènku kùdì ridò mukünzùbile, tàngilàayi ridò *awu*, *awu's* ki museeswishanganyi. Menemene . . .

. . . mukàjì awu ùvwa mulwate bivwalu bikünzùbile . . . meekala makünze, . . . bilengeja ne ngòlò . . . mabwe à mushinga mukolè ne masàngà, (Nudi bavùluke ne mèmè mvwa ngàakula mwab'ewu civwà cyoshelu cyà kumpàla cyà beena Nikàlàwù anyi? Nwamònu anyi? Mukàjì mwikàle "èkèleeziyà.") mwikàle ne dikopo dyà ngòlò mu cyanza cyèndè (Nudi bavùluke anyi? Ngòlò mubwikidije cyoshelu aci, dikopo divwaye munkaci mwà kupa bantu.) dyùle tètè ne cinyangu cyà bukooya bwà masandi èndè:

178 Ki cidiye ùpèèsha bantu ncyòci aci; bàvwa bacimina. Bushùwà's. Bakwàcike naaci! Ànu bakwàcike! Musùmbà wònsò wa beena Irlande awu, ne beena France, ne bikwàbò, bàdi bakukosa muminu wèwè mudidìnge mwakule bwalu bubì bwà èkèleeziyà awu. Bushùwà, mbafwànyine kwenza nàнку. Nwamònu anyi?

Ne pa mpalà pèndè pavwa dìnà difùnda ne, BWALU BUSOKOKA, BAABÙLÒNÀ . . .

179 Mpindyewu, Baabùlònà ewu mmufùmine penyi? Mmufùmine mu Baabùlònà mubande ne mu Peggàmò, ne mushàale . . . Sàtaanà utentemuna nkwasà wèndè. Kaa, mvwà kujinga twayaku mu Bwàkabuulwibwà bwònsò nkòng, bwà nwafika ku dicimòna's.

. . . BAABÙLÒNÀ MUNÈNE, MAMWÈNDÈ WA BANDUMBA . . . MAMWÈNDÈ WA BANDUMBA NE BINYANGU BYÀ PA BULOBA.

180 Yèyè uvwa cinyi? Mamwèndè wa bandumba. Abu kabàvwa bânà bàà balùme to. Mmwòmò anyi?

181 [Katùpà kàà mukàbà wà mèyi munda mutupù—Muf.] . . . èkèleeziyà wabò. Èyowà's, mukalenge. Yèyè ne: "Èkèleeziyà kî mmubiikidiibwe, mu Bible ne: 'Baabùlònà' anyi?" Nwamònu's, mu mukàndà wabò bingasunga. Èyo.

182 Mpindyewu, bu ne yèyè ùvwa ndumba, mukàjì wa masandi, ne ùvwa mamwèndè wa bandumba, bivwa bikèngela ikale ne bânà bàà bakàjì. Nènku pùikalabi ne bàvwa bânà bàà bakàjì, bàvwa bânà bàà bakàjì, bàvwa maèkèleeziyà. Mpindyewu èkèleeziyà wa Mishònyì mmufùmine penyi? Ncyà bushùwà anyi? Ndishiilangana kaayi didi pankaci pàà—pàà mukàjì wa masandi ne ndumba? Ncintu cimwècimwè aci.

183 Martin Luther kupatukaye, bwà kushintululaye, bwà kupèèshaye Èkèleeziyà mulelèlè mpùngà; Wesley; ànu nàнку too ne ku Mpenta; ne yònsò wa kùdìbò wàkalukila buludi ku mmwènenu wa beena Nikàlàwù wa bulongolodi, ne batàngidi bàà bwònsò, ne bikwàbò byònsò, ne kwalukilabo buludi

ne dibatiiza òmwèdimwè dyàkabàtijiibwabo naadi adi, mmwènekèlu umweumwe, mishingà yimwèyimwè, mene ne bààbùngì baabo biikàle ne tutèshismù ne ‘*mwoyi Mariyà.*’ Kì nne *Mwoyi Mariyà* to, kàdi...Ncinyi eci cidì cyàmba kufwànàngana naaci aci’s? *Twitabàayi wa Bapostòlò* awu. Ndeajaaku *Twitabàayi wa Bapostòlò* mu Bible, mwanètù. Pìikalabi ne—pìikalabi ne bàvwa ne *twitabàayi* kampànda, m’Byenzedi 2:38, ki cyàkatùminabo bantu bwònsò dìyì bwà kwenzà’s. Mpenyi pàùkaadiku muumvwe mupostòlò mwenze *twitabàayi* kampànda, wàmba ne: “Mèmè ndi ngiitabuujà Èkèleeziyà Munsantu wa Kàtòlikè wa cyena Loomo. Ndi ngiitabuujà bwobùmwe bwà bansantu?”

¹⁸⁴ Pàvwa . . . Peetèlo, mwine uvwa ne nsapì ayi awu, kwambaye ne: “Kakwèna mutwangaji mukwàbò pankaci pàà Nzambi ne bantu to, ànu Kìlistò Yesù.”

¹⁸⁵ Kàdi tàngilàayi èkèleeziyà ya Mishòònyi. Bààkenza cinyi? Kabàvwa mwà kusankishiibwa to. Yònsò wa kudibo wàkapatuka awu, wàkapatuka ne Dibèneshà dyà Mpenta. Ncyà bushùwà menemene. Nànshà Martin Luther mwine wàkaakula mu myakulu. Ncyà bushùwà menemene. Wàkadilòmbela luse, wàmba ne: “Nzambi, mèyi à enza ne bwòwà àndi munungane aa, kàdi ncyèna mumanye cìndì munkaci mwà kwamba to.” Nwamònu anyi? Cyà bushùwà, yèyè ùvwa muCiitàbùùje. Ncyà bushùwà ne, ki cyàkenzaye.

¹⁸⁶ Mpindyewu, munda mwà bikondo byònsò bàvwa—bàvwa ne Nyumà, kàdi bàdi misangu yònsò baya kule ne benza malongolodi paanyimà pàà bajuudi ba ntwadijilu abo bamane kufwà. Bu nwènu mwà kwikala balekele èkèleeziyà wa ba-Luthériens mutùngùnukè, ne kanùyì bamuvwija bulongolodi to, nunku’s ùvwa kwikala wa Mpenta. Èkèleeziyà wa beena mpenta ncinyi’s? Ndi nswa kwamba wa mpenta mulelèlè. Kì ndingumba to, mpindyewu, aci’s cidì ànu bu “bukwa ncimà” cyàkàbìdì. Nwamònu anyi? Kàdi mbenze cintu cìmwècìmwè aci, ne cyòci aci kubààluja buludi ku beena Nikàlàwù ànu mwàkenzàbo ku cibangidilu amu. Mbanganyì bàdi bamòna aci? ambaayi ne “Amen.” [Disangisha dìdì dyàmba ne: “Amen!”—Muf.] Ncyà bushùwà. Mpindyewu, ànu bwà mpete dìyì dyèbè dyùdì . . .

¹⁸⁷ Nwamònu’s, mamwèndè wa “bandumba.” Pìikalàbo bandumba, mmunyi mwàkashààlabo bandumba? Mu kwenda kwà masandi ku Dìyì dyà Nzambi. Pìikalà Dìyì dyà Nzambi dyambe ne: “Nyingalalaayi nubatiijiibwe mu Dìnà dyà Yesù Kìlistò,” ne muntu yònsò muntwamu ùvwa mubatiijiibwe mu Dìnà dyà Yesù, ne pashiishe nwangata “Taatù, Mwànà, ne Nyumà Mwimpè.” Aci’s mbundumba’s! Ncyà bushùwà anyi? Ne pìikalabi ne dibatiiza dyà Bible nku diinyijangana dyà mu màyi (*baptizo*, ku mwaku wa cyena Ngelika), dìbà adi mmunyi munùdì nwangata dimyaminangana dyà màyi ne dipongolwelangana dyà màyi pa mutu’s? Aci cidì cibwelela penyi? Panwikala

baaluje dilabulangana dyà ku byanza, anyi dyangata dyà cyostiyà pa mushikù wèbè ne kucìmina, anyi cintu cikwàbò cyà mùshindù awu, pamutù pàà Nyumà Mwímpè, pèndè Nyumà Mwímpè wàkafùmina mu Dyulu byenze bu cipeepèlè cikolè cyà civuma ne kuuja bantu, ne kubààkwisha mu myakulu, ne kwela mbila, ne kwenza maalu bu bantu bakwàcike, kàdi nwènù nwaluja dilabulangana dyà ku byanza, anyi kufùndila èkèleeziyà mukàndà wèbè, anyi cintu cyà mùshindù awu, mmunyi munwikalaku mwà kupeta mpùngà wa kupàtuka mu njila wa dyenda dyà masandi à mu nyumà?

¹⁸⁸ Mpindyewu, anji dyebejaayi nwènù biine aci tǔng. Salàkàjaayi meeji ènù, nukangule mwoyi wènù ne nwikale ne meeji matòòke, bânà bèètù. Tukaadi ku ndekeelu wa njila. Masangisha aa kí mmenza mwab'ewu bwà cyanààna nànsha, mmatumina díyì kùdi Nzambì bwà kuènza. Ndi ncìitabuuja ànu mùdìbi bushùwà ne ndi. . . nudi nwitabuuja ne mémè ndi musadidi Wendè. Ndi ncyàmba mu Dìna dyà Yesù ne, Nzambì ngudi mutèèke pa mwoyi wànyì bwà kulwa mwab'ewu. Ncyèna mpeta dyeyà nànsha òmwè bwà kucyènza to. Ndi—ndi—ndi—ndi—ndi mufwànyine kwikala pambelu apa nsambidila babèèdi mu mwaba kampànda, anyi cintu bu nànkù awu. Anyi mwaba mwà kwikala muye pambelu ngenda ndoba, ne mpeta mfranga yànyì ànu mùshindù wùmwèwùmwè awu, ndi mpeta difutu ku èkèleeziyà. Kàdi Nzambì ngudi muCìtèèke pa mwoyi wànyì; ncìvwa mwà kuumukaKù to, mutungunuke ànu ne kungeela mbila bwà bwalu bwàCì, ne ndi ngenza cyònsò cìndì pàànyì mwà kwenza aci. Ndi mwaba ewu mu Dìna dyà Mukalenge, ngenza cyònsò cìndì pàànyì mumanye mwà kwenza aci. KanùCilekèdi cìnùpita to.

¹⁸⁹ Mpindyewu, beena Mishòònyì, nudi numòna cìndì njinga kwamba pa bìdi bitàngila èkèleeziyà wa Kàtòlikè ne wa Mishòònyì anyi? Ànu. . . Umwe ùdi ànu mùshindù ùmwèùmwe ne mukwàbò. Ncyà bushùwà menemene.

¹⁹⁰ Mpindyewu, mbwena kwamba ne musèdìibwe, *Peegàmò* mbwena kwamba “musèdìibwe.”

¹⁹¹ Mpindyewu twàngatàayi. . . Yèyè wàkamba ne: “Wèwè udi naabo munkaci mwènù bàdi ne dilongesha dyà Baalàmà.” Twàngatàayi ànu aci.

¹⁹² Tudi ne díbà anyi? Nèndwijakajè nye lubilu ne mwànyì mwònsò. Anyi nudi baswè ànu kwindila cyanààna bwà kumòna ní tudi mwà kwalukila mu dìndà anyi? Mbanganyì bàdi mene baswè ànu bwà tütungunuke, bwà katanci kakesè cyanààna? Lekèlaayi. . . Èyo, mpindyewu ndi—ndi mumanye ne kùdi luuya lukolè munda emu. Kàdi panwikala basòmbe bapuwe ne luuya lukolè, nudi nwela meeji bishi bwà apa nùnkù? Nudi numòna anyi? Kàdi, kaa, ekèlekèle, tudi tuteeta bwà kushààla kule ne

mwaba *udi* wà luuya awu. Nwamònu's, ki—ki cìdiku ncyòcì aci, bwalu, tudi bàà Cyendèlèlè.

¹⁹³ Mpindyewu, mpindyewu mu bushùwà bwà bwalu pààkajuulabo èkèleeziyà wa mùshindù awu, cyàkenzekà ncinyi? Mpindyewu tèèlejàayi ne ntèmà yònsò, bàna bàanyi. Cyàkenzekà ncinyi? Mòna's, mu bushùwà bwà bwalu, aci ki cyàkiipatà Nyumà Mwìmpè mu èkèleeziyà. Kabyèna bikèmesha to bwà pàdì nànsha umwe wa ku bèèpiskòpò bààbò kàyi mujuule bafwè anyi mwenze bishimà. Nènku bòbò bàakula bwà bàmwè bàà ku bansantu bàdì mu èkèleeziyà wabo's! Bààkatontolola cintu aci, kàdì bàdì bàmba mùdìbo bààbo's wè!

¹⁹⁴ Tàngilàayi Jeanne d'Arc, mwànà wa bakàjì wa citende awu's. Ndi nnukonka nwènù beena Kàtòlikè, anyi nwènù beena Mishònyì, yònsò wa kunùdì. Jeanne d'Arc, mu ditùkù dyèndè, kakuvwa cintu nànsha cimwè mu France mwàmwa to, ànu èkèleeziyà wa Kàtòlikè uvwa mubàmbidikile bansantu pànshi. Kàdì Nzambì ùvwa ùkwacila mudimu ku mwànà wa bakàjì awu ne ùvwa ne Nyumà Mwìmpè. Kàdì wàkenza cinyi? Ùvwa mwà kudyanjila kwamba maalu, Mukalenge ùvwa mwà kumupèèsha bikèèna-kumòna ne kudyanjila kumwambilabi. Wàkasambidila babèèdì. Kusambidilaye mwànà mutekète mufwè, kàdì kwalukilaye cyàkàbidì ku mwoyi. S'ki bwena mpenta mbwàbù's. Nwamònu anyi? Kàdì ncinyi cyàkamwenzela èkèleeziyà wa Kàtòlikè bwalu wàkatontola èkèleeziyà wa Kàtòlikè? Bààkamuswikila cilumbu, kàdì kumwoshilabo ku dikunji bu “muloji.”

¹⁹⁵ Kàdì mpindyexwu nudi nwamba ne: “*Munsantu* Jeanne d'Arc.” Paanyimà pàà bidimu nkàmà yìbìdì, bu nàнку awu, pààkajandula èkèleeziyà civwàbo benze, bwà ne ùvwa Munsantu, kaa, mu bushùwà bwà bwalu, bààkanyingalala bwà bwalu abu; kujuulabo mibidi yà bansaserdòsè bààkamukòselà cibawu cyà lufù abo, ne kuyiimanshabo mu musùlu. Nudi nwela meeji ne aci ncyùmushè mashi pa byanza byèndè anyi? Bible mmwambe ne: “Mashi à—à muntu yònsò wàkafwila diitabuuja awu àkasanganyiibwa munda mwèndè.” Ki cyàkamba Mwanjèlò wa Mukalenge ne ncyàkasanganyiibwa mu Baabùlonà ne: “Dishipangana dyà cikisu dyònsò, anyi muntu mufwile diitabuuja, ne bansantu bònsò bàà Kilistò bààkafwilà diitabuuja abu, bààkasanganyiibwa mwab'ewu mene kuumukila ku Cikondo cyà beena Nikàlàwù too ne leelù, muntu yònsò wàkafwila diitabuuja awu.” Anji elàayiibì meeji ku aci. (Twasàkidila, Mwanèètù Ben.) Mpindyewu, elànganaayi meeji pa bwalu abu's.

¹⁹⁶ Mpindyewu, twànjàayi ànu kuya kumpàla ndambù mpindyewu. Èkèleeziyà wa beena Kilistò mmukasèlangane ne—ne . . . ne Baabùlonà. *Peegàmò* mbwena kwamba ne “dibaka.”

197 Mpindyewu: “Dilongesha dyà Baalàmà. Nwênù nudi naabò munkaci mwênù bàdi ne dilongesha dyà Baalàmà.”

198 Kaa, mêmè’s ndi munange bintu ebi be. Kaa, bu nwênù mwà kushààlaku ndambù mukesè pa címwè, nwamònu’s, kàdi nudi ànu. . . Tudi baswè bwà ne nucimòne ne pashiishe tuye ku cikwàbò cintu, bwalu cìdi ànu—ànu cyule ntèntè ne bimpòkòtò byà ngòlò’s. Mêmè’s ntu mwenji wa bukebikebi; ntu munange kupweka ne kumbula bimpòkòtò ebi kàdi kubyengeleja’s, ne kubyengeleja pambidi mùshindù ewu, kàdi kubitangila. Nènku cyònsò ne cyònsò cyà ku byòbì necìleejè Yesù Kilistò! Cyònsò cyà ku byòbì, nwamònu’s. Cyònsò cyà ku byòbì cìdi cìleeja Yesù Kilistò. Yèyè ùdi Alpha ne Omega, dîna Bujitu bwònsò—bwònsò bwà ngòlò bùdi mu cimpòkòtò cyà ngòlò aci’s. Ncyà bushuwà. Yèyè ùdi kantu ne kantu kàà ku Cyòcì aci. Ki bwà cinyì, Yèyè ùdi Bunzambi buvwijiibwe mubidi munkaci mwètù.

199 Mpindyewu, bwà kupeta. . . Ncyà—ncyàkupicisha dîbà bwà cyòcì eci to, bwalu ndi ne. . . Ndi mmòna ne tukaadi dîbà citèemà. Nènku ndi—ndi ne cikwàbò cintu cìndi njinga kubwelamu dilòòlò edi, bu Nzambi mwà kwanyisha. Nènku ndi muswè bwà nwênù kufùnda eci nùnkù bwà nùcìbalàayi mààlàbà, nènku fùndaayi Nomba 22 too ne ku 25. Ndi muswè bwà nwênù kubala aci mpindyewu, nènku nudi mwà kundonda. Nènku mpindyewu—nènku mpindyewu Nomba 22 too ne ku 25.

200 Tudi bamanye ne Izàlèlèlè—Izàlèlèlè ùvwa cisàmbà cisungula cyà Nzambi. Ncyà bushuwà anyi? Bàvwa. . . Bàvwa beena Mpenta. Bàvwa ne Nyumà munkaci mwàbò. Nudi bavùluke diyiiisha dyà makeèlèlè dilòòlò anyi? Mùshindù mwine wà pàakasabukà Mòsà Mbù Mukùnze, anyi Mbù Mufwè, ne kusanganaye paanyimà pèndè apu mu Mbù Mukùnze, wa mashi awu, uleeja mashi. . . babàmbidikyanganyi bònsò bàà ku midimu mikolè bàvwa bamutuuta yèyè ne bàna bònsò bàà Izàlèlèlè abu. Mòsà kwelaye cyanza cyèndè muulu ne kwimba mu Nyumà. Kaa, muntu ne muntu wa kutùdi ùdi mwà kwikala Mòsà patùdi twela mèsù paanyimà mu Mashi makùnze à Mukalenge Yesù ne tumòna muntu yònsò mukulakaji mukwacike maala, mùlàngì wònsò wà kale, mukàji mukulakaji wa nsòmbelu wa cipanshi, cintu cyònsò cyà bukooya cyà kale citùtùku kacya benze mu lwendu lwètù, bifwè byònsò mu Mashi à Mukalenge Yesù. Bidi bitwimbisha mu Nyumà’s wè! Mici yà mfwankà, mfwankà yà bipàtu, ne biibidilu bibì, ne bikwàbò byònsò, bifwè, mu Mashi à Mukalenge Yesù; dîbà adi tudi mwà kwela byanza byètù muulu ne kwimba mu Nyumà. Nwamònu anyi?

201 Tàngilàayi cyàkenzà Miliyàma, mupròfetà mukàji awu. Mpindyewu, vùlukàayi ne, yèyè ùvwa mupròfetà mukàji. Wàkangata ngoma wa mutumbi ne kubangaye kutuuta ngoma wa mutumbi awu ne kuja maja mu Nyumà, ne bàna bàà bakàji bàà Izàlèlèlè kumulondabo ku mwelelu wa màyi aku, bimba

ngoma yà mitumbi ayi, ne baja maja mu Nyumà. Mpenta mulelèlà's wè!

²⁰² Ne pashiishe bu nwênù mwà kumòna pàakafikabo ku Moàbà. Mpindyewu tudi twalukila...Tudi mu Mifundu, mpindyewu, “diloggesha dyà Baalàmà.” Nènku Moàbà, Moàbà's ùvwa mwanaàbò ne Izàlèlèlà. Mbanganyi bàdi bamanye kwàkafùma Moàbà? Èyo. Moàbà's ki citùdi bafwányine kubìikila ne cisopakaja, bwalu bwà Moàbà wàkabangila ku bânà bàà bakàjì bàà Lotà. Lotà wàkalela mwànà ne mwandèndè wa bakàjì mulela, ùvwa ne bânà bàbìdi abu. Ne Moàbà ùvwa umwe wabo, nènku's ke wakenza ditùnga dyà Moàbà, cisàmbà aci's. Nènku, mu bushùwà bwà bwalu, Lotà ùvwa mwànà wa balùme wa mwanaàbò ne Abraham, uvwa bulelèlà wa mu mudibu ùmwèùmwe awu. Bwà aci's tudi bamanye. Mpindyewu ndi muswè bwà numòne ne kabàvwa bampàngaanù nànsha, mùdì àmwè à ku manayi ètù à matukù àdì panshì aa mafwányine kunufikisha ku...Vùlukàayi ne, bàvwa beena kwitabuuja. Mpindyewu, pàakabandà Izàlèlèlà ne njila batàngile ku buloba bulaya, balonda njila wabo buludi biikale mu kaaba kààbò kàà mudimu, nènku's ke Moàbà ewu mudyadije mu njila's. Kutùmabò mìsànjeela kùdì Moàbà, bamba ne: “Lekela tupìcileku mu buloba bwèbè. Twètù tudi bânà bèènù.”

²⁰³ Mpindyewu, Moàbà ùvwa ùleeja beena Nikàlàwù. Mpindyewu nudi numòna ànu mu kasunsa kàmwe cyanàànà. Izàlèlèlà ùvwa ùleeja Èkèleeziyà mulelèlà. Nènku Baalàmà ùvwa umwe wa ku bèepiskòpò, baapaapà. Tàngilàayi numòne mpindyewu; bwena Kilistò bwà musunya. Mpindyewu netùmonè ne ùvwa ne mapà, kakwèna mpatà pa bwalu abu to. Bààbùngì bàà kùdìbò mbaakudi bàà dipòkò, ba-docteurs bàà nkindi, ne—ne bantu banène. Kwèna mwà kuvila aci to. Kàdi: “Biikale ne cimwenekelu cyà difwànà dyà Nzambì, kàdi biikale bavila Bukolè bwàdì.”

²⁰⁴ Alukilaayi ku Mpenta wa ku cibangidilu awu! Kanùpàmbukiku to. Nwênù benze nànkù, nwajiminyi. Shààlaayi ne dibènesha adi. Ke Dyòdì adi, Mubèneshi wa dibènesha.

²⁰⁵ Mpindyewu, mònaayi pàvwàbò mu lwendu apu. Kulwabo ku èkèleeziyà wa maalu à kwisùkwisù ewu, ki kwambabo ne: “Tudi tupìcila mwab'ewu batàngila ku ditabuluja kampànda. Tuyààya ku buloba bulaya. Nudiku mwà kutwanyishila bwà tupite anyi? Ngombe yètù yòyi midye nànsha mashinde, yòyi minwe nànsha màyi, netùbifute.”

²⁰⁶ Pashiishe ncinyi civwaye...? Mfùmù Baalàkà, wàkasaluka bikolè, nènku kàvwa muswè disangisha dyà mùshindù awu mu èkèleeziyà wendè anyi mu buloba bwèndè to. Pa nànkù wàkenza cinyi? Wàkatùma bantu kùdì paapà, anyi kùdì mwèpiskòpò, Baalàmà, mupròfètà wa difutu, ewu uvwa munange mfranga kutàmba muvwaye munange Nzambì. Ki Mfùmù Baalàkà

kumwambila ne: “Bu wêwè mwà kupàtuka mwab’ewu kàdi kwela cisàmbà eci mulawu, mèmè nènkuvwijè muntu munène.” Nènku Nzambì kwakula ne Baalàkà. Kàdi ndi ndikonka ní bìvwa mwà kwenzeka kwikala bu- . . . Ndi muswè kwamba Baalàmà. Ndi ndikonka ne mbúngi kaayi bwà baa Baalàmà bàdì pa buloba ebu dilòlò edi? Bambi bàà ba-Méthodistes, bambi bàà ba-Baptistes, bansaserdòsè bàà beena Kàtòlikè, (Luse’s wè!) bàdì bamanye ne Nzambì. . . bu nwènù mwà kubala bwalu-bulonda bùmwebùmwe ebu ne Mukàndà wùmwebùmwe wùndi mèmè mbala ewu. “Baalama!”

²⁰⁷ Mpindyewu, mònaayi. Pashìishe kwambaye ne: “Pweka ùkeele cisàmbà eci mulawu.”

Ki Baalàmà kwamba ne: “Nènkonkèbi Nzambì.”

Nzambì kwamba ne: “Kùyi to!”

²⁰⁸ Kàdi pààkacyabu mu dindà, yèyè kwamba. . . wàkaya kambila mwakwidi, anyi m—mfùmù awu.

Ki kwalukilaye, kwambaye ne: “Kaa, mèmè—mèmè nènkuvwijè muntu munène.”

Ki Baalàmà kutùngùnukaye; Nzambì kwamba ne: “Tungunukààku’s, tungùnuka.”

²⁰⁹ Nwamònu’s, nwènù kanùyì baswè kulonda Bulelèlà to. . . Nudi nwela meeji ne, beena Nikàlàwù, bwalu Nzambì ùdi munkaci mwà kunwenzela cinùdì nwenza mùshindù awu. . . Kùdi Bulelèlà bwà ku cibangidilu! Udi ànu munkaci mwà kulonda diswa dyà Nzambì dyà cimfùlààmwòyì. Wèwè udi wamba ne: “Nzambì ngudi utupa Nyumà Mwìmpè,” anyi ne “Yèyè ùdi ùtùbènesha, ne twètù tudi babàtùjìbwe mu dìnà dyà ‘Taatu, Mwànà, ne Nyumà Mwìmpè.’” Nwènù beena Baalàmà nwè! Nwamònu’s, dilongesha dyà Baalàmà. Nzambì wàkamwambila, paanyimà pàà yèyè mumane kwikala ne dyambu, Yèyè kumulekela wùtungunuka ànu ne diya, bwà àkadyowe yèyè mwine. Bidi bikèngela bwà nwènù kwalukila ku Bulelèlà, ku Bulelèlà bwà ku muji. Kwalukila ku Bible. “Kaa, èè, Yèyè’s mmutùbèneshe! Ne mutupè- . . .” Kaa, mèmè’s ndi mumanye aci. Yèyè wàkenza nànkù, kwambila Baalàmà, ne: “Tùngùnuka wèwè. Pawikala muswè kuya, pìikalabi ne cidi. . . Udi ne cyà kulonda njila awu, ne udi muswè kulonda njila wa bulongolodi; ndaaku, tungunuka.”

²¹⁰ Pashìishe Baalàmà kutàkukaye, kwela cibelu pa kampundu kèndè, anyi, kí nkampundu kèndè to, mpundà wèndè, s’ki yèyè udi upweka awu’s. Nènku katanci aka, nudi bamanye’s, Mwanjèlò wa Mukalenge kwimana mu njila. Nènku, nudi bamanye’s, mupròfetà awu, paapà awu, mwèpiskòpò awu, kardinale, cyònsò civwaye aci, wàkafofomijiibwa ku bintu byà nyumà, meeji à ne ùvwa ne cyà kumubandisha myanzu, bwalu ùvwa musòmbèle ku Musùlù wà Euphrates. Ngeela meeji ne yèyè wàkadyambidila ne aci civwa mbumpyànyì kampànda, bu mùdi

“Pa lubwebwe elu Nèngiibakilèpu Èkèleeziyà Wanyì,’ Peetèlo,” anyi pa lubwebwe kampànda lùvwà mu Loomo, anyi cintu kampànda. Kàdi pàakafikaye pa kaaba aku, ki Mwanjèlò ewu mwimane ne mwelè wa mvità mupàtula mu bimàngà, kàdi ùvwa mufofomijùbwe mu mùshindù wa kàyi mwà kucimònaku to. Ki kampundu kuvinyakù dikàsà dyèndè ku cimanu. Ki pashiishe kutùngùnukaye ne lwendu mubandepù, kàdi’s ki—ki Mwanjèlò ewu mwimane kàbìdì mu njila. Nzambì neàkange biibi byònsò’s! Nènku ki kampundu aku kucyùngulukaku. Ki yèyè kutùùluka, ne kwambula dikombo dyèndè kubanga kukàpyàndadi. Mpundà mukesè ewu, mulààle mwab’awu, bàmutuuta ku mutù.

²¹¹ Nènku mèmè, cyàkamushintululà bushùwà, cyàkamupèèsha lungenyi, anyi cyàkamwambila pàvwaye mutùpàkèene, Wàkalekela kampundu aku kàakula mu myakulu. Kacivwa kampundu to, kòkò kàvwa mpundà’s! Ncyambi ne kàvwa “kampundu” to; nùnkù kí nkacyumvwa to, kàvwa kàà kasopakaja. Nudi numòna anyi? Aku kàvwa kàà dimiinu dyà ku muji.

²¹² Moàbà ùvwa ne: “Bimanyinu bikaadi bipite, bintu byònsò bikaadi bimane kupita.” Izalèèlà ùvwa ne bimanyinu byenda bilonda.

²¹³ Kàdi mpundà mukesè ewu kucyùngulukayè kwamba ne: “Ncyènakù mpundà webè anyi? Kacya nkààtukù...” Ki mwèpiskòpò mufofomija awu—awu musòmbe mwaba awu, mutùngùnuke ànu ne kutuuta kampundu aku; eku kampundu munkacì mwà kumwakwila, mu myakulu myenyi kùdì kampundu.

Ki yèyè ne: “Èyo, udi—udi mpundà wanyì.”

“Kàdi nkaatukù—nkaatukù kacya mubenge kukwambula, anyi nkaatukù kacya mukushikùkile anyi?”

“To, kutùkù mwanji kunshikukila to. Kàdi bu ne mvwa ne mwelè wà mvità, nùnkù ndi mukushipe, nùnkù ndi mwimanyike ne disangisha edi. Mèmè ndi mu njila mutangile kuntu kwàka bwà kwimanyika musùmbà wa bansantu babùnguluki bàà mu malaba abu bwà kabàpìcidi mu buloba ebu to. Nùnkù’s—nùnkù’s cilema ncyèbè’s.” Nwamònu anyi?

²¹⁴ Kàdi katancì aka anyi, kwenzekabi ne àkènzakane, kudyàmbidilaye ne: “Èè, ebu’s mbwalu bwà pabwàbù. Ndi mwà kuumvwa kampundu aku kàakula.”

²¹⁵ Kaa, Baalàmà! Hmm! Nwamònu’s, Nzambì ùtu misangu yònsò ànu wakula ne bantu mu myakulu myenyi. Wàkenza mu matùkù à. . . Wèwè udi wamba ne: “Aci’s cìvwa ànu ku Mpenta.” Kaa, to. To, to. Ku difestò dyà Belèshààsà Yèyè’s wàkaakula mu myakulu, kuCifùnda ku cimanu. Bàvwa ne muntu mwaba awu uvwa ne dipà dyà dyandamuna, ki kubandamwinaye,

kubambilaye ne cívwa ncinyì. Cintu cìmwècìmwè aci cìdiku leelù ewu's.

216 Pa nàнку, bu mùvwàbí ne kakùvwá mwandamunyi nànsha umwe bwà Cyòcì aci to, Nzambì wàkalekela ànu mukulumpe Baalàmà ewu ùkàtamuka (kardinale ewu) ne kumanya ne Cívwa ncinyì. Kàdi nuvwaku bamanye ne mulùmýànà mpofo ewu wàkatùngùnuka nànsha nàнку anyì? Bushùwà's. Mùshindù awu ki ùdìbo benza leelù ewu, cintu cìmwècìmwè aci; beena Moàbà, beena Nikàlàwù, mbatùngùnuka ànu nàнку. Nènku kutùngùnukabo ànu ne kuya kuntwaku, ne kuyaye. . . Mpindyewu tàngilàayi, bu byòbí bikèngela ne Nzambì àtàngile ku byà maalu ànu mùdiwu mafùndiibwa, Úvwá mwenzejìibwe bwà kubènesha Moàbà; bwalu, mònaayi ne, Baalàmà wàkiibaka byoshelu mwandamutekète. Aci's mmwòmò menemene.

217 Nomba wa mwandamutekète: bikondo mwandamutekète byà èkèleeziyà. Nudi numòna mùdì ngangàcìlù wa nyumà anyì? Mpindyewu, shààlaayi balame aci mpindyewu: ngangàcìlù wa mu nyumà. Nèmfikèku mu katanci kakesé emu, mu mwaba wa bwalu bukolè. Nwamònu's, ngangàcìlù wa mu nyumà. Byoshelu mwandamutekète, bimpanga byà ngombe mwandamutekète (nyama mikezùke), ne bimpanga byà mìkòòkò mwandamutekète; byàkula bwà dilwa dyà Kilistò, nkàmà yà bidimu kumpàla kwà kulwaYè.

218 Kàdi, bàvwa biitàbùùje. Bàvwa biitàbùùje cinyì? Bàvwa biitàbùùje Yèhowàh Nzambì. Cìkwàbò cyàkiitabuujabo ncinyì? Bàvwa biitàbùùje ne mulambu mukezùke ùvwá ne cyà kulambudiibwa. Ncyà bushùwà. Nènku bàvwa bàmba mùvwàbo biitàbùùje ne Maasiyà ùvwá ne cyà kulwa, bwalu bààkalambula mù—mùkòòkò mulùme, ùvwá cimpàngà cyà mùkòòkò. Ncyà bushùwà anyì?

219 Mpindyewu, swìkakanàayi ànu ne Baptiste musangu ùmwè; ùmònebi ní kabeena bènza cintu cìmwècìmwè aci. Ncyà bushùwà menemene.

220 Èè, mpindyewu dishiilangana dyepi? Izàlèlèlà nyèyè ewu kwìnshì kwà kakùnà, ùlambula milambu yìmwèyìmwè yìvwàbo balambula kuulu kwàka ayi, ùsambila Nzambì umwèumwè awu's. Kanwenaku mwà kumòna beena Nikàlàwù anyì? Basopakaja abu's! Nwacimònu anyì? Kanwenaku numòna bàvwà bulelèlà bàà nyumà anyì? Ndishiilangana kaayi kùdìbo? Umwe wa kùdìbo ùvwá ne bimanyinu byènda bìlonda! Mukwàbò yèyè ùvwá ne *mmwènekèlu*, mukwàbò ùvwá ne *bimanyinu byènda bìlonda*.

221 Ncintu cìmwècìmwè aci cyàkenzekà mwab'ewu, ku Nsangilu wa Nicée; beena Nikàlàwù, bwena Kilistò bwà kwìsùkwìsù. Ki Nyumà Mwìmpè kwalukila e kwamba ne: "Nudi ne dilongesha dyà Baalàmà munkaci mwènù." Nwamònu anyì? "Nènku nwènù. . . Ntu mukine byenzi byà beena Nikàlàwù

abi, malongesha àvwàbo naawù awu, bwalu ndilongesha dyà Baalàmà wàkalongesha bàna bàà Izalèlèlà bwà bôbò kulenduka.” Wàkacyènza bìshi?

222 Pashìishe mmwenze ànu ùpàtuka bwà kwela cisàmbà aci mulawu, Nzambì kwamba ne: “Mémè nènswikè ludimi lwèbè; kwèna mwà kwamba cintu nànsha cìmwè to ànu cìndi nkwabwila. Kwèna mwà kwela mulawu cìndi mubènèshe to.” Ki yèyè kutangija mèsù panshì.

223 Kàdi tàngilàayi mwena lubombo ewu’s! Kaa, twètù’s tudi bafwànyine ànu kushàalapù naaci, nwamònu’s. Tàngilàayi Mfùmù wa kale Baalàkà ewu, mu—mu—mu—mutù mupùngilàmakunyi wà byònsò abi, wàmbila mupròfetà wa mashimi ewu, yèyè ne: “Pweka kuntwaku ùtàngile ànu citùpà cyà paanyimà pààbo aci.”

224 Mùshindù awu ki ùtu èkèleeziyà mi—minène minange bwà kwambila banyaàbanya bàà Nzambì. “Nudi bamanye mùdì bwalu anyi? Mvwa mumanye umwe wabò. Balùmyànà wa yàayà! Nudi bamanye cyàkenzaye anyi? Yèyè—yèyè wàkenza *cikampànda*, ne wàkenza *cikansanga*. Mbeena Mpenta abu. Bushùwà’s.” Kaa, kàdi bu wèwè mumanye bulelèlà *byàbò* bôbò, kàdi bikàndàkàndà ne bikwàbò kabyàkubyàkulaku nànsha. Kàdi mwena Mpenta mukesè adìdingè enzebi kantu kabì musangu ànu ùmwè, kàdi tàngilàayi numòne mùdì ditùnga dijimà mwàcikobolabo’s. Bushùwà’s. Eyowà’s, mukalenge.

225 Kàdi, mònaayi mpindyewu, kwambaye ne: “Tàngilà ànu citùpà cyà paanyimà aci, paanyimà apu, s’ki citùpà cyàcì cibyacibyàle.” Baalàmà ne: “Eyowà, nèntàngile ànu citùpà cyà paanyimà aci, byà bibì bìdìbo benza abi’s. S’ki cìngìkàla mwà kwenza, nèntàngile ànu ku bukooyike bwàbo—bwàbo abu, bintu byàbò bibì abi.” Bwalu bu ne wèwè ùvwa utàngila ku bintu bibì, kabàvwa bimpè to. Ncyà bushùwà. Bàvwa benze mpèkaatù yònsò utuku ewu. Kàdi cyàkapangaye kumòna, wàkapangila kumòna Lubwebwe lutuuta alu, Nyoka wa Cyamu cyà kabanda awu, disànkà dyà Mfùmù divwà munkacì mwàbo adì, dyondopa, bimanyinu, maalu à kukema, ne Dikunji dyà Kapyà adi dilembèlele pamutù pààbo.

226 Mupròfetà mufofomija awu kàvwa mwà kuCimòna to. To, mukalenge. Kàdi ùvwa uleeja citùpà cyàbò cyà manyaanu, “Èè, ndi mumanye muntu ùtu munyeme ne mukàjì wa bendè. Ndi—ndi mumanye eci, wàkiiba mfranga yà bendè.” Mmwòmò’s. Ncyà bushùwà. Bwà aci kaayi nèngìtabè; kàdi’s bàdi ne cintu cìmwècìmwè aci kuntwaku, kàdi kí mbabwakuleku to. Nwamònu anyi? Pa nàнку yèyè ùvwa ànu uleeja citùpà cyà citàmbe bubì.

227 Kàdi Yèyè kwamba, Nzambì kwamba ne: “Wàmbè wèwè ànu cìndi Mémè ngàmba aci.” Ki Baalàmà kubwela mu Nyumà,

kubwelaye mu matutu; kàdi pamutù pàà kwela Izàlèèlà mulawu, yèyè kumubènesha. Amen! Ki yèyè awu.

²²⁸ Mpindyewu, bu Nzambì ne cyà kufuta...anyi kutwà muntu mushinga ànu bwalu mmwitabi wa maalu mùdiwu mafùùndùbwa, bilongelu bitùmbùke ebi, ne sèminèrè minène ne tùlaasà tutùmbùke, ne Ph.D. ne D.L.D. ne, kaa, ne D.D. yà mìshindù yònsò...Èè, kàdi bu ne Yèyè ùvwa ùtwa byònsò abi mushinga, èè, dîbà adi, s'udi mufwànyine...Nunku's bivwa bìkèngela kutwaye byònsò abi mushinga's. Nwamònu anyi? Kàdi Yèyè ùvwa ùtwa mushinga ne ukaavwa mumane kubènesha bantu aba ne dibènesha, bwalu Nyumà, Mfùmù awu... Bòbò ne: "Kuvwa lubila lwà Mfùmù mu citùùdilu." Cinyi? Cinyi? "*Mfùmù wa bansantu.*" Mikunda ne disànkà's! Dyà cinyi? Bukalenge bukwàbò.

²²⁹ Nènnùjaadikilè ne kabàvwa dīgumba to. Nudi baswè bwà ngenze nàнку anyi? Ngeela meeji ne ndi ne Mufùndu mufùnda kaaba aka bwà bwalu abu. Eyowà's, mukalenge. Lekelaayi nnujaadikilè ne Izàlèèlà kàvwa...Twànji twàlukilaayibi ku Nomba, ànu bwà nwènu kumòna ne kabàvwa beena màngumba nànsha. Bòbò...Mpindyewu, Moàbà ùvwa dīgumba dinène. Netwangate Nomba 23:9, nèngàngatè mvensa wa—wa 8 pàmwè nendè:

Nènku...*Mmunyi mungùikalà—Mmunyi mungùikalà mwà kwela mulawu, (mwàkamba Baalàmà), udi Nzambì kàyì mwele mulawu? anyi mmunyi mungùikalà mwà kukandameena, ewu udi MUKALENGE kàyì mukandamèène to?* (Uh-huh.)

²³⁰ Mpindyewu tèèlejàayi cidi...cyàkambaYè:

Bwalu—Bwalu kwangacila ànu ku lusongo lwà mabwe mèmè kumumòna... (Ki Nzambì nyàwù. Kì nkwangacila mu cibandabanda mwàmwa to, kàdi nkwangacila ku lusongo lwà mabwe. Kaa! "Disù Dyèndè nditàngile mushààmushà, ne ndi mumanye ne Yèyè ùdi untàbaleela.")...*kwangacila ku lusongo lwà mabwe mèmè kumumòna...* (Amen! Ki nkwangacila ku yimwè...paanyimà lwà mu ndekeelu mwà cibandabanda kampànda bwà nufike ku dimòna citùpà cyàbo cyà paanyimà aci to; "Mèmè kumòna cintu cyònsò mu kaabujimà," mwàkamba Nzambì.)...*kwangacila ànu ku lusongo lwà mabwe mèmè kumumòna, ne kwangacila ànu ku tukùnà mèmè kumumòna: mònaayi, bantu nebàsòmbe nkaayabò, ne kabààkubadiibwa munkaci mwà matùnga nànsha.*

²³¹ Aci ke cidi cìkosa bwalu anyi? Bòbò kabàvwa dīgumba to, "matùnga." Kaa, bàvwa balalakanyi, mu ntentà, mu mìsèèsù, lwà kwìnshì mu disangu dyà mùsèèsù, kaacitanda kakesè aku. Pàvwàbo bashààdila paanyimà, ne difuta dyà nzùbu, bàvwa

babèèla pambelu; Nzambi ùvwa ujinga bwà kuyabò mukwàbò mwaba. Nwamònu anyi? Balalakanyi's! Èyo!

²³² Mu Jamaïque mwàmwa, àbìdì àdì panshi aa, kuvwa docteur mu bunzambi mulenga wa dikèma wa beena Mpenta mwimane mwaba awu. Ki mèmè ne: “Kaa, mùshindù mwine wàkabèneshà Mukalenge Èkèleeziyà wa mpenta wa ku cibangidilu's wè: kabàvwaku ne kantu nànsha kàmwè to.” Mèmè ne: “Bàvwa ànu balalakanyi, bàya eku bàya eku.”

Yèyè ne: “Uh, Mwanèètù Branham?”

Mèmè ne: “Èyowà's, mwanèètù.” Ntu mumunange; mwanèètù mulenga be.

ki yèyè ne: “Mvwa—mvwa njinga ànu kukuleeja mwaba wùdì mu ntupàkanyi.”

Mèmè ne: “Kaa, mèmè's ndi ne disànkà dyàbùngi be bwà bwalu abu. Ntu—ntu muswè misangu yònsò kumanya mwaba wùndì mutupakèene, bwalu Nzambi mmumanye aci; ncìtu—ncìtu muswè kwikala mu ntupakanyi to.” Mèmè ne: “Èè, pùkalabi ne ndi mutupakane, ncya bushùwà ne ndi muswè kucimanya, mwanèètù. Twasàkidila.”

Yèyè ne: “Udi mutungùnuke wèwè ànu ne kutumbisha bantu bàà beena mpenta bàba's.”

Mèmè ne: “Èyo!”

Yèyè ne: “Mbenze cilema cyà cibì citàmbe ne bubì cyà kacya pààbo benza, dìbà dyàkasumbishàbo bintu byàbò.” Yèyè ne: “Pààkajuuka dikengeshiibwa, kabàvwa nànsha mene ne ku nzùbu kwà kuya to. Kabàvwa ne mwaba wà kuya to, nènku bàvwa bàlalakana.”

Mèmè ne: “S'ki cìvwà ànu menemene diswa dyà Nzambi.”

Yèyè ne: “Bwà cinyi?”

²³³ Mèmè ne: “Bu ne bàvwa ne nzùbu kwà diya nùnkù's bàvwa kwikala baalùukileku, kàdi bàvwa ne cyà kuumuka eku kuya kwàka, benda batangalaja luumù, myaba yònsò, ne Nyumà Mwimpè ùvwa mulwè. Kanùngambìdiku ne Nzambi mmwenze cilema to. Yèyè kàtu wenza cilema nànsha. Yèyè mmumanye mwà kupita naaci's. Bààkapàanyisha bintu byàbò ne kuvwijiibwa balalakanyi, benda batangalaja luumù myaba yònsò.” Ki mèmè ne: “Luumù lùvwa lùtangalajiibwe pa buloba bujimà bumanya bwà cikondo aci, kùdì balalakanyi bààkalekelelà bintu byònsò bwà kupeta Nyumà Mwimpè abu.” Bantu kabàvwa bàà mu dinguumba kampànda to. Nwamònu anyi?

²³⁴ Mpindyewu, vùlukàayi ne, dinguumba ki dìdì Nzambi ubiikila ne: “Cibweja mu dilongesha dyà Baalàm.” Èè, dìbà adi, pàvwàye kàyì mwà kubabweja mu dinguumba edi to, nudi bamanye cyàkenzà Baalàmà anyi? Mpindyewu, tèelejàayi ne ntèmà mpindyewu, tukaadi twenda tuseemena pabwipi ne

kujikija. Mpindyewu cyàkenzà Baalàmà aci, wàkenza cintu cyôci cimwècimwè cyàkenzabo mwaba ewu ku Nsangilu wa Nicée. Ki bwà cinyi Yèyè wàkamba ne: “Udi ne dilongesha dyà Baalàmà ne beena Nikàlàwù abu.”

²³⁵ Mpindyewu, beena Nikàlàwù bàvwa mbantu bààkadikoka ne baswè kwenza malongolodi ne—ne bikwàbò. Byôbi biine, ndekeelu wa byônsò. . . Mbanganyi bàdi bamanye ne m’Bulelèlèlà pândi ngamba ne: “bulongolodi”? Aci’s m’Bulelèlèlà bwà Nzambi ànu bwà menemene ebu. Ki ndekeelu wa byônsò kwenzabo bulongolodi butàmbe bunène pa buloba. Kàdi bààkabwènza cinyi? Bwà Kàtòlikè. Nènku mwaku ewu *kàtòlikè* ùdi ùmvwija cinyi? “Wa buloba bujima.” Bulongolodi, bwà buloba bujima, kubùvwija bulongolodi: “Tuntu tukesè twônsò etu tùdi ne cyà kubwela mu èkèleeziyà umwepelè.” Mpindyewu, bu nwnènù mwà kumòna. Kaa, ndi. . . tũngùnuka wèwè ànu ne kuya.

²³⁶ Tàngilàayi! Baabùlònà ùvwa cinyi? Nganyi wàkaasa Baabùlònà? Nimelòòdè. Wàkenza cinyi? Wàkenza kaleyi kamwèpelè kanène mu cimenga cinène, ne kwenza ne bimenga bikwàbò byônsò biikale bifuta citàdi kùdi cimenga eci. Bulongolodi’s! Ki nshindameenu waci nyèyè awu. Bushùwà. Kulwa buludi lwà mu cikondo cyà èkèleeziyà emu ne kwenza bulongolodi cyàkàbìdi, ne kubwejamu matunga ônsò. Kàdi apa mene Cyôci kwamba ne: “Mukàji wa masandi wàkenza ne matunga ônsò ànwe mvinyò wa masandi èndè awu.” Masandi èndè àvwaye wenda, wàmba mùvwaye “mwena Kilistò” kàdi ùpatula cintakanyi bu cyà ne: tutèshismu, mikàndà yà masambila, ne bikwàbò byônsò. Ne beena Mishònyì pààbo benda ànu balonda, cintu cimwècimwè aci, biikale ànu benda balonda mipwa yèndè ayi.

²³⁷ Èyo, tuyaayi ànu kumpàla kakesè ndambù mpindyewu. Èyo. Èyo. Kwambaye mpindyewu, ne: “Aa àvwa malongesha à Baalàmà.”

²³⁸ Mpindyewu, Baalàmà wàkenza cinyi pààkajandulaye ne kàvwa mwà—ne kàvwa mwà kwela Izàlèlèlà mulawu? Kwambilaye Baalàkà ne cívwa cifwànyine kwikala meeji mimpè, díbà adi, bwà yèyè kubiiikilaye cisàmbà aci ku difesto dyà kaanzambì. Bàvwa ne—bàvwa ne—difesto dinène kuntwaku, bàvwa. . . kùvwàbo ne cyà kupeta. Nènku bôbò. . . Difesto dívwa dibiiikidiibwe ne “Difesto dyà Baala-pe-ò-l-à, Baalà-peòlà.” Ndi ncinka ne p-. . . peòlà, Baalà-peòlà. Cívwa ndi—ndifesto, bwà kukuukwila.

²³⁹ Ki Baalàmà kwambaye ne: “Mpindyewu, nènkwambilè, Baalàkà, nènkupèeshè meeji mimpè. Bu wèwè ànu mwà. . . bu wèwè. . . Nzambi kààkubèèlaku mulawu to, ki cyônsò cidiku aci, pa nànu mèmè nènkwambilè citwènza. Katwèna mwà kubiiipata to; kàdi bu wèwè ànu mwà kubàbiiikidisha kwàka, newenze ne maalu ônsò nkòng akumbane mùdi muswè.”

240 Nwamònu's, menemene, ànu cyàkenzà Constantin menemene's. Patapata's! Ki bwà cinyi “ndilongesha dyà Baalàmà.”

241 Bààkenza cinyi? Dìbà adi bôbò...dilongesha dyà Baalàkà kubweladi munkaci mwà Izalèèlà. E kubìikidishabo beena Izalèèlà bônso ku difesto dinène èdi, dinène dyà mikùkuuku dyàkenzabo's. Kaa, difesto kampànda dinène, mamwèndè wa fètè uvwabo benze kuntwaku's. Nènku pààkafikabo kuntwaku, mòna's, bantu bàà beena Izalèèlà aba kubangabo kumòna bakàji balenga kwìsù, bavwale mvwadilu wa usalulangana masandi bàà beena Moàbà aba. Èyowà, kabàvwa mumwè ne nsongààkàji yàabo yà ciibidilu yivwàbo naayi kwabò aku to. “Kaa, s'bvwa balenga kumòna bàà dikèma's. Ekèlekèle! Mùshindù ùvwabo benjiibwe, kaa, mùshindù mwine ùvwabo mwà kudimwanga's.” Nènku bôbò kudishinda bwà ciine aci, ne kubanga kwenda masandi. Nènku Baalàmà ùvwa mumanye ne piikala Nzambi kàyi mwà kubeela mulawu to, ùvwa mwà kuya naabo ku luseke lwà cyena màngumba elu kàdi kwenza ne ciiji cyà Nzambi cibashipè nànsha bishi's; bwà Nzambi àDishipèèlebu, bu yèyè ànu mwà kubàpàmbwisha mu njila wa Bulelèlà.

242 Kàdi paùdi ànu upàtuka ukashàala wa mu èkèleeziyà kampànda pamutù pàà kupeta dibatiiza dyà Nyumà Mwìmpè, udi mufwè! (Kì mbwèbè wèwè to, kàdi bwà bàdi *apa* nunku, ndi ndekela aci cibwele bwà katanci kakesè.) Mufwè's! “Udi ne dìnà,” mwambile Luther mwab'ewu, bwà Cikondo cyà Sàadi. Mwaku ewu *Sàadi* ùdi wumvwija ne “mufwè.” “Udi ne dìnà dyà ne udi ne mwoyi, kàdi pèèbè mufwè!” Kì cyàkamba Nzambi ncyôci aci. Èyowà. Nwamònu anyi?

243 Nènku pààkendabo masandi à mu nyumà kuntwaku, èkèleeziyà kuumuka ku dibatiiza dyà Nyumà Mwìmpè kukasèdiibwa kùdi dingumba, kuvwijiibwabo bafwè. S'ki bwalu mbwòbù abu. Aci's ncidi Bible mwambe, ki cidi Nzambi mwambe, wàmbila maèkèleeziyà.

244 Mpindyewu ndi muswè ànu kunubadilaku cintu kampànda kaaba aka, cindi . . .

245 Nènku Nzambi, cyàkenzaYè ncinyi? Nènku mpindyewu pààkenzabo cintu cibi eci, nènku bàvwa mu masandi, Nzambi kubàshipa binunu makumi anaayi ne bìbìdi musangu ùmwè; binunu makumi anaayi ne bìbìdi, bwà dyenda dyà masandi. Kàdi mbambe cinyi bwà bwalu ebu mu èkèleeziyà emu? Masandi à mu nyumà, à mùdi udyamba “mwena Kilistò” kàdi mwikale ànu ne nsòmbelu bu wa bàà pa buloba. Kaa, mwanèètù, peta wèwè Nyumà Mwìmpè! Umuka ku twitabàayi ya kale eyi ne bikwàbò ebi. . .s'mbifwè; kwambulula ku mwoyi Twitabàayi wa Bapostolò, anyi twitabàayi wa mùshindù kampànda, ne kwamba ndambù wa masambila mafùnda mu mukànda wa masambila, anyi cintu kampànda cyà mùshindù awu. Kacya

Yesù kààkambilaku bantu Bèndè bwà kwambabo disambila kampànda to, Wákamba ne: “Sambilaayi!” Sambilaayi! Èyo.

²⁴⁶ Mpindyewu, difesto dyà Constantin, ànu bu Baalàmà menemene. Mpindyewu tààngilàyi. Bu mùdì difesto dyà cimpàngaanù dyà Baalàmà, Constantin wàkenza difesto dyà cimpàngaanù. Èyo. Peegàmò wàkabiikidiibwa. Nènku mònaayi mpindyewu eci. . .

²⁴⁷ Ndi ne cintu kampànda cifùnda kaaba aka, nèncilekèlè bwà mpindyewu. Èyo. Èyo. Mvwa nteeta ànu bwà kwangata kabeji aka kaa. . . cintu kampànda címvwà mufùnde.

²⁴⁸ Peegàmò wàkabiikidiibwa. Èyo, bàvwa babiikidiibwe ku difesto paanyimà pàà Nsangilu wa Nicée. Bàvwa babiikidiibwe ku difesto dyà *Cikondo Cipi Cidi Dìbà Kule Cyà Muvù wà Mashika*; mbwena kwamba ne, “dìbà, dikuukwila dyà dìbà,” cìvwa ciikàle kaanzambi kàà cimpàngaanù; cìvwa cyenzeka mu matùkù 21 à ngondo wa ciswà-munène, ditùkù dyà ditàmbe kwìpidika mu cidimu. Nènku bidimu. . . Cikondo cimwècimwè aci kacýena cishintuluka nànsha too ne ku matùkù 25 à ngondo wa ciswà-munène awu. Bampàngaanù bônso bàvwa bàbùtwila cyanga, mufikilu wà dilediibwa dyà nzambi-dìbà. Mufikilu wà dilediibwa dyà nzambi-dìbà ùvwa nditùkù dyà ditàmbe kwìpidika mu cidimu amu, mu dyà 21 dyà ngondo wa ciswà-munène. Nènku dìbà adi muntu kanà yónsò ukààdikù mubale bwalu-bulonda bwà maèkèleeziyà mmumanye ne bampàngaanù bàvwa bakuukwila mu ditùkù adi. Cìvwa nditwà dyà cyanga.

²⁴⁹ Èè, beena Loomo bàvwa ne. . . bàvwa ne manayi manène, cipalu cyà manayi cyà beena Loomo. Mbanganyi bàkaadiku bamòne cyòci eci mwab’ewu, nànsha ciikàle cinyi, mwab’ewu ànu matùkù mashààle aa, cìvwàbo bapàtule? Ben Hur! Nwamònu anyi? Mpindyewu, cipalu cyà manayi cyà beena Loomo; ki cìvwà beena Loomo benza mu ditùkù dyà dìbà adi aci’s, bu cìvùlukilu cyà mufikilu wà dilediibwa dyà nzambi-dìbà. Nwamònu anyi?

²⁵⁰ Nènku mpindyewu. . . nènku kwenzabo difesto dinène kuntwaku ne kubìkilabo beena Nikàlàwù bwà kulwabo. Kaa! Ki mbipwangane anyi? “Dilongesha dyà Baalàmà dyùdì naadi mu wèwè amu.” Nwamònu’s, wàmbila Peegàmò cìvwàbo naaci, manayi manène à mbilu. Ki bóbò kudyàmbidila kuntwaku ne. . . Beena Nikàlàwù aba kudyàmbidila ne: “Èè, mpindyewu, abi’s mbilenga. Difesto dinène edi bàdi bàditwila cyanga ku cidimu ku cidimu anyi? Èyowà.” Nànku dìbà adi ne dibìikila dyà—dyà—dyà uvwa udyamba ne mwèpiskòpò mutàmbedile kampànda, anyi cyónsò cìvwàye musangu awu aci, ne bikwàbò byónsò, ki bóbò kucyàngata bwà kucyènza cintu cyà ku musangu ne ku musangu: bwà kubweja masandi, kubweja masandi mene, babanga èkèleeziyà wa Kàtòlikè; wa bwena udi dingumba dyónsò dyà beena Mishòonyi cidimba cyèndè awu, bulongolodi’s.

Nzambì katu ne bulongolodi nànsha bùmwè to, ne ùdi ùkina dìnà mene dyà cyôci aci. Bible ngudi mwambe nànkù.

²⁵¹ Nènku pààkenzabo nànkù, cyàkenzekà ncinyi? Bàà—bàakamba mpindyewu. . . Byàkakèngela bwà kwikalabo ne ngangàcilù wa mu nyumà, pa nànkù kushintululabo (Mukalenge Yesù) mufikilu wà dilediibwa dyà M-w-â-n-à wa Nzambì kudyùmusha ku ngondo wa cisanga-nkàsù (Udi bamanyi bàà mabàla bîmpè bônso aba bamanye, ne muntu kanà yônso udi ne mabuulula à mu nyumà ewu, ne Yèyè wàkalediibwa bilondeshile ngiikàdilu wa bufuki bu mu cikondo mùtù bânà bàà mìkòòkò ne bikwàbò byônso bileidiibwa: mu ngondo wa cisanga-nkàsù.) kwalujabo ku ditùkù dyà 25 dyà ngondo wa ciswà-munène. Nènku batùngunuke ne kukuukwila Noël, mpindyewu's n'Taatù Noël. Nènku ncinyi. . . Kaa, luse wè. Nwamònu anyi? Kàbìdì makwàbò mafesto à cimpàngaanù masakidilaku. Kwajiki's. S'ki nwènù abu, babiikidiibwe's, Baalàmà. "Nudi ne dilongesha dyà Baalàmà munkaci mwènù." S'ki cyôci aci. (Éyi Nzambì, ucibuulule ànu cyanàànà, Taatù.) Nwamònu anyi? Mufikilu wà dilediibwa kuumusha ku ngondo wa cisanga-nkàsù too ne. . .

²⁵² Mpindyewu, mufùndi wa maalu-malonda ùdi wàmba ne "Cileejì cyônso cìwva ne Yesù wàkalediibwa mu ngondo wa cisanga-nkàsù pàdì mwoyi mukwàbò wônso wùpatuka." Kàdì bóbò mbacishintulule bacyaluje ku ditùkù dyà 25 dyà ngondo wa ciswà-munène, matùkù ataanu paanyimà pàà (nwamònu anyi?) paanyimà pàà kaanzambì kàà cimpàngaanù aku, bwà bààmòna mwà kuteeka ditwa dyà cyanga dyàbò dyônso adi pàmwè: bumpàngaanù ne bwena Kilistò. Nènku bwena Kàtòlikè kî cingà cintu pa buloba apa to ng'ànu mushiki wà majimbu à cimpàngaanù ne divila dyà diitaba dyà bwena Kilistò bisanga pàmwè. Ncyà bushùwà. Aci's ncilelèlè. Nènku beena Mishòonyi bàdì bàtòkòla dikoshi ku cyôci eci bàdì ànu mwànà wa bakàjì wa maamù ndumba awu's. Mmwômò menemene.

²⁵³ Mpindyewu, Nzambì atukwacisheku bwà twètù kwikala batontolodi balelèlè ku cyônso cidì kaciyi cyà difwànà dyà Nzambì. Nwamònu anyi? Kaa!

²⁵⁴ Nènku bwà kwangata ngangàcilù waci wa mu nyumà ewu, nudi bamanye cyàkamba mwèpiskòpò anyi? Mwèpiskòpò wàkamba ne: "Tudi ne bukenji bwà kwenza cikampànda bwalu yèyè ùdi 'Dìbà dyà bwakane.'" Hmm! Kaa, bàdì bakeba pàà kulambakeena, ànu mùdìbo benza pa "Taatù, Mwànà, ne Nyumà Mwîmpè;" Maataàyi 28:19, byà mwomùmwè, menemene. Bushùwà, mbapete pàà kulambakeena, bìvwa bikèngela kwikalabo ne mùshindù kampànda wà ngangàcilù wa nyumà, nudi numòna's. Kàdì kabyèna. . .

²⁵⁵ Bible mmwambe ne: "Bwalu bwônso bujaadikiibwe mukana mwà bantèmù bàbìdì tàà bàsàtu." Nzambì wàkacyàmba, Yèyè ùdi ùcyàmba misangu yisàtu. Piikalabi ne Nzambì mmuswè

bwà kujaadika cintu kampànda cikwàbò, Wàkangata Peetèlo, Yakòbò, ne Yone; byònsò byàkenzàYe abi, Yèye ùvwa ne bantèmù bàbìdì anyì bàsàtu bwà kujaadikaye byònsò byàkenzàYè, munda mwà Mifùndu yònsò amu. Ncyà bushùwà.

²⁵⁶ Kàdi, nudi numòna's, bìvwa bìkèngela bwà tuntu tukesè atu tulwe mwab'awu bwà bààmòna mwà kutwambula ne ki twòtù's. Nzambì ùvwa mucimanye kumpàla kwà difùkà dyà dyulu ne buloba. S'ki bòbò abu naaci, ngangàcilù wa mu nyumà awu ne: "Bwalu yèye ùdi M-w-â-n-â wa Nzambì, netwàngate ànu mufikilu wà dilediibwa dyà d-î-b-à dyà cimpàngaanù edi kàdi kudìwija mufikilu wà dilediibwa dyà M-w-â-n-â awu's [Mwàkù sun ùdi ùmvwija *dìbà* ne mwàkù *Son* ùdi ùmvwija *Mwàna* kàdi yònsò ibìdì yìdi yìshindumunyiibwa mùshindù ùmwè mu Anglais—Trad.] nènku mbwalu yèye ùdi 'Dìbà dyà bwakane.'" Hmm! Hmm! Nudi bamanye's, beena Mishòonyì bàcìdì ànu bàkwaciibwa ku cyòcì aci, cintu bu nàнку awu. Bushùwà, mbafwànyine kwenza nàнку, kucyàngacila buludi mu Mifùndu bwà kucitèeka mwaba kampànda mukwàbò. Kaa, ekèlekèlè! Ndi. . . Twànji—twànji twìmanaayi ànu kakesè. Èyo.

²⁵⁷ Cintu cimwèpelè cikesè cìndì njinga kufikaku ncyòcì eci. Twàngatàayi ndekeelu wa mvensa ewu lukasàlukasà. Tudi mwà kucyènza anyì? Èyo. Èè, nèndwìjakajè bikolè menemene, ne lukasa lwònsò mpindyewu, nènku nenwikalè. . . netùkatuutè myaba minène yààCì. Èyo. Tudi penyì mpindyewu?

Kàdi. . . tuntu tukesè. . . tùndì ne. . . nkupùsha naatu, . . . Baalàmà, . . .

Ncyà bushùwà, ndi mwangate aci.

Ki mùdì kàbìdì ne. . . dilongesha dyà beena Nikàlàwù. . .

Nyingalala; . . . cyanàànà ndi. . . ndwa. . . ne lukasà lwònsò, ne. . . kukulwisha ne mwele wà mvità wà mukana mwànyì.

Ewu udi ne macì, ùmwè cìdì Nyumà wàmbila maèkèleeziyà; . . .

²⁵⁸ Ekèlekèlè! Mwab'ewu pààkenzà Constantin cyòcì eci, cìvwa. . . Pààkalongololabo difesto dinène edi. Ndi—ndi ànu. . . Ndi mubange kuya kule ne aci; Nèngìndilè kumpàla kwà mémè kubala aci bwalu Nyumà Mwìmpè mmutungunuke ànu ne kwenda kungaaluja, ki bwà cinyì ndi mwenze cìndì mwenze dìbà adi aci; mwambe ne: "Kùlamikù aci to." Nwamònu anyì? S'ki cyòcì cilwalwà eci's! Uh-huh, uh-huh. Èyo. Kabingila kàdi kènza ne. . .

²⁵⁹ Pààkalongololabo cintu cinène eci, (ndi njinga kunwambila cyàkenzekà bwà nwamòna mwà kuumvwa.) s'ki mwaba wàkalediibwa beena paanyimà pàà bukalenge bwà bidimu cinunu. Bwalu èkèleeziyà ukaavwa mubanjì; ùvwa mubanjike

ne mwèndè pèndè mwònsò. Nènku cìvwa ncinyi? Wa bukòlè. Ùvwa ùkòòkesha mu ditùnga; mbulamataadi ne èkèleeziyà bivwa bidìsangè.

²⁶⁰ Mpindyewu, Nzambi ne bukalenge anyi? Ne Yesù kàakambaku ne bóbò...Dyònsò dyà ku matùnga aa dìvwa dyèndè, kwambila Yesù nànkù, kuMuleejaye makalenge à pa buloba, kwamba ne: “Ówò nngàanyi mémè ónsò. Ndi ngenza naawu cintu kanà cyònsò cìndi muswè kwenza aci.” Nènku pashiishe kusangisha Nzambi ne dyabùlù pàmwè amba’s? Kaa, kwèna mwà kucyènzakù to! Cyà bushùwà’s, kanwèna mwà kucyènzà to. Ki bwà cinyi ditùnga ndidyenza bulongolodi. Nzambi kàtuku mutwè ku cyà, malongolodi aa to. Ncyà bushùwà ne ki mmwòmò to, kwèna mwà kucyènzakù to.

²⁶¹ Kàdi’s bàvwa naaci díbà adi, bàvwa ne èkèleeziyà wabo uvwabò babiikila ne mbwena Kilistò; bàvwa bamusange pàmwè ne ditùnga, mfùmù mujimà wa bukalenge bwalàbale bwà Loomo, byònsò abi. Mwèpiskòpò munène kuntwaku kumutu kwà byònsò abi, uvwa mwikale Boni- . . . Paanyimà pàà cikondo kampànda bàakamubiikila ne paapà, kàdi’s ùvwa— ùvwa mwèpiskòpò mwine musangu awu. Nènku Boniface III yèyè’s ki wakashàala paapà wa dyàmbedi.

²⁶² Pashiishe tudi tusangana ne ki yèyè mushikame kuntwaku ànu menemene bu paapà kumutù...Kanzambi kàvwabo naaku, mu mmwènekeli wa buntu. Bàvwa ne cyosheli cinène. Bàvwa ne mabanji malenga be. Bàvwa ne byosheli binène, byà makàndà, byà mabwe matòòke mafinunùke, ne bilengeja ne mabwe à mushinga mukolè, ne bikwàbò, pamutù pààbi pònsò apu. Nènku bàvwa ne èkèleeziyà minène. Bàvwa bakontonona ditùnga. Kàdi nudi bamanye mùdi bwalu anyi? Dìyì dyàkapatuka ne “aci cìvwa Bukalenge bwà bidimu cinunu,” bwà ne milayi yònsò yìvwà myenzela beena Yuda bakwàte ne byà luse abu, ne: “Nzambi ukaavwa mubàlekele” (cyàkambaYe ne Yèyè kàvwa mwà kucyènzà nànsha), ne kuteeta bwà kubweja Bukalenge bwà bidimu cinunu kumpàla kwà dilwa dyà Mukalenge Yesù. Pàdi Yesù ulwa s’ki pàdi Bukalenge bwà bidimu cinunu bubanga.

²⁶³ Ki mwaba wàkalediibwa byà paanyimà pàà bukalenge bwà bidimu cinunu ngwòwò awu. Nènku ki bwà cinyi Kàtòlikè kàtu ùlongesha dilwa dyà Yesù to, too ne leelù ewu. “Byònsò bidi mu èkèleeziyà. Eci’s ki Bukalenge bwà bidimu cinunu. Èkèleeziyà’s mmudyangacile bintu byònsò. Ki cyòcì eci’s.” Nwamònu’s, paanyimà pàà bukalenge bwà bidimu cinunu (Kaa, ekèlekèle!) kakùyì dyalukila dyà Yesù Kilistò to. Eci cyàkashàala too ne kudishiipiibwa dyà Constantin dyàkenzeka pankaci pàà cidimu cyà 312 ne—ne . . . paanyimà pàà lufù lwà Kilistò, cidimu cyà 312 ne 606. Pashiishe Boniface III ewu wàkavwijiibwa mwèpiskòpò wa buloba bujimà anyi paapà kumutù kwà èkèleeziyà mujimà wa buloba bujimà.

264 Ngeela meeji ne netùjikije mvensa ewu, nènku pashiishe nèmmupetè. Nzambi àtumble. Nwamònu anyi? Mpindyewu, mvwa ànu kacya ngààkwata bwà kasunsa kàmwè cyanààna. Mvensa wa 17:

Ewu udi ne maci, ùmvwè cidi Nyumà—Nyumà wàmbila maèkèleeziyà; Kùdi ewu wacimuna nèmmupèèshe bwà kudyàye...manà masokoka, ne nèmmupèèshe dibwe ditòòke, ne mu dibwe adi dìnà dipyadìpyà difùnda, didi muntu nànsha umwe kàyì mumanye to pakuumusha ewu udi udipeta.

265 Nudiku baswè bwà kwindila too ne mààlabà dilòòlò, anyi kudipeta mpindyewu anyi? [Disangisha didi dyàmba ne: “Mpindyewu!”—Muf.] Èyo.

266 Taatù wa mu Dyulu, ndi ndomba bwà Wèwè kwenza bwà bantu kuumvwabò mpindyewu, mu Dìnà dyà Mukalenge Yesù, bwà kumònabò mwà kuumvwa mu myaba yònsò (ne kwayà mikàbà yà mèyi aku's), bwà bààmòna mwà kumanya ne ndi—ndi ngamba nùnkù bwalu Cidi—Cidi n'Dyandamuna dyà kùdi Nzambi dyùdi Wèwè mumpèèshe. Amen.

... ewu wacimuna...

267 Cintu cyà kumpàla cìndi njinga bwà nwènù kuvùluka ncyà ne: yònsò yà ku mikenji eyi kí mmyambila èkèleeziyà nànsha, kàdi mmyambila mwanjèlò wa èkèleeziyà. Tàngilàayi paanyimà apa, wa kumpàla awu, èkèleeziyà wa Efè-... Kùdi èkèleeziyà... Kùdi...

Kùdi mwanjèlò wa èkèleeziyà wa Efèso... (Mmwômò anyi?)

268 Èyo, cikondo cyà èkèleeziyà cìdi cìlondà, mvensa wa 8:

...kùdi mwanjèlò wa èkèleeziyà wa Seemùnà...

269 Èyo, ku mvensa wa 12:

...kùdi mwanjèlò wa èkèleeziyà wa Peegàmò... (Ncyà bushùwà anyi?)

270 Mukenji mmwambila mulombodi wa èkèleeziyà. Nzambi akwacisheku mwabilaayi awu wikala mwà kudikoka kule ne Mukenji awu! Kàdi Cyàkafidiibwa kùdi mwanjèlò, ne mwanjèlò ùvwa mu cyanza Cyèndè mu bukòntononyi Bwèndè Yèyè mwine, mwikale umupa bukòlè butancishi bwà kùdiYè, bwà ku cyanza Cyèndè cyà dyàbalùme. Bàdi mu cyanza Cyèndè cyà dyàbalùme, mbwena kwamba ne, bàdi mu bukòlè bwà kumutù kwà ònsò pàcidìbo pa buloba apa; bwalu bòbò ki Makènkè à kùdiYè, àfila Bukènkè mu cikondo cyà èkèleeziyà aci. Nwamònu anyi? “Kùdi mwanjèlò wa èkèleeziyà.” Bàmabila *mùtootò* (wà cikondo aci) ùdi mwomekela bujitu awu. Mwanjèlò wa èkèleeziyà ngudi mwambule bujitu piikalaye kàyì uyiisha Dìyi. Ncyà bushùwà. Ne bìvwa bikèngela bwà mwanjèlò awu kwandamunaye ku cilumbulwidi.

271 Mbanganyi bàdi bavùluke cikèènà-kumòna aci mwab'ewu ànu àbìdì àdì panshì aa pa. . . Tàngilàayi kuneeku. Pâmvwà—pâmvwà mulààle pa bulaalu apu, ki Nyumà Mwîmpè kulwa; nènku mèmè kwela mèsù paanyimà, mukàjàanyi mwab'awu. Nènku mwab'awu mèmè mudyòlòlepù, ke mèmè kubwela mu Bwikadi amu, ki mèmè kumòna bantu bônso abu. Nènku nudi bavùluke ne ngákamba nànkù anyi? Nwènù bônso nudi bavùluke's. Nwamònu anyi?

Ki mèmè ne: “Èè, bôbò ki. . .?”

Yèyè ne: “Mbèèbè wèwè's.”

Ki mèmè ne: “Bônso mba Branham anyi?”

Yèyè ne: “To.” Bàvwa mìliyò ya bantu. Yèyè ne: “Aba mbawàkakùdimwisha mucìma.”

Ki mèmè ne: “Bakùdimwisha mucìma?”

272 “Udi umòna mukàjì ùdì ukaakala nànkù wàwa, mwaba awu, mwànà wa citende ne mulenga kwìsù,” mwàkambayè, “ùkaavwa ne bidimu bipite pa makumi citèèmà pawàkamulombolà kùdì Kilistò.”

Ki mèmè ne: “Kaa!” Mèmè ne: “Wa bwalu's ke cìmvwà nciìnà eci?”

Ki yèyè ne: “Tudi bindile kaaba aka bwà dilwa dyà Mukalenge.”

Mèmè ne: “Ndi muswè kuMumòna.”

273 Yèyè ne: “Kwèna mwà kuMumòna mpindyewu to, kàdì” yèyè ne, “àbìdì aa Yèyè neàlwè. Tudi baMwindile, kàdì pààlwàYe, Yèyè neàlwe dyàmbedi kùdì. Nènku wèwè neùlumbulwishiibwe bilondeshile Èvànjeeliyò uwàkayiisha, ne twètù netwìkale bantu bèèbè.”

“Èè,” mèmè ne, “udi uswa kwamba ne mèmè ngudi mwambule bujitu bwà bônso aba anyi?”

“Bwètù bônso!”

Mèmè ne: “Èè, bantu bônso. . .?”

Yèyè ne: “Udi mulediibwe mulombodi.”

Ki mèmè ne: “Èè, muntu yônso neikalè mwambule bujitu anyi?”

Yèyè ne: “Mulombodi yônso.”

Mèmè ne: “Kàdì nebìikale bìshi bwà Pòlò Munsantu?”

Yèyè ne: “Neàmbole bujitu bwà cikondo *cyèndè*.”

“Èè,” mèmè ne, “mèmè's ndi muyiishe Èvànjeeliyò anu umwèumwè wàkayiishayè awu.”

Ki mìliyò yà mèyì kujuukayi, yàmbe ne: “Tudi biikishile pa cyòcì aci!” [Disangisha dìdì dyàmbe ne: “Amen!”—Muf.] Nwamònu anyi? S'ki bwalu abu, “biikishe.”

274 Pa nàнку *mwanjèlò* wa Nzambì, musànjeela mutumina èkèleeziyà, ngudi mwambule bujitu piikalaye kàyi uyiisha Dìyi to. Èyo.

275 “Manà masokoka.” Lekelaayi tufile dyumvwija ne mwètù pèètù mwònsò. “Manà masokoka” adi cimfwànyì cyà cinyì? Manà masokoka àvwà mmanà àvwà malamiibwe mu mwaba . . . anyì mampà à baakwidi, mu Bible, àvwà ànu bwà mwakwidi nkàayendè. Mbanganyi bàdi bamanye aci mwab'ewu? Nwamònu anyì? Mpindyewu, kacivwa bwà . . . Bàvwà ne dyàmpà bwà disangisha to, kàdi kuvwa dyàmpà dyà pabwàdi bwà mwakwidi. Ncyà bushùwà anyì?

276 Eci ki dyàmpà dyà pabwàdi, dyàmpà dyà pabwàdi, manà *masokoka*. Ncinyì ciine aci? Ètù Manà nnganyi? Kilistò. Èyo, Yone Munsantu, nshapità mwi6, mvensa wa 48 too ne ku wa 50, panwikalà nucifùnda. Yesù wàkamba ne Yéyè ùvwà “Dyàmpà dyà Mwoyi didi difùme kùdi Nzambì mu Dyulu,” Manà awu's.

277 Èè, ncinyì's “manà masokoka”? Mmanà àdi kàyi mapèèsha disangisha dijimà nànsha. Dibuulula ndipongololwela pambidi pàà mwanjèlò wa èkèleeziyà, dibuulula dyà Dìyi. Nwamònu anyì? Dibuulula dyà Dìyi ditu difidiibwa kùdi mwanjèlò wa cikondo aci, bwalu mmasokoka myaba yònsò, kàdi mabuulùdiibwè (manà masokoka) kùdi . . . Mbambila *mwanjèlò* wa èkèleeziyà. Nwamònu anyì? Nudi nucyùmvwa anyì? Ndibuulula dyà ditàmbe bunène dyà cidi Kilistò, pàmwàpa dibiiikila dyà ditàmbidile ndambù.

278 Ndi ndikonka Luther ní wàkajingulula cyòci aci? Ndi ndikonka Wesley ní wàkenza nàнку mu ditùkù dyèndè? Kaa! Ndi ndikonka nì Martin Munsantu wàkacìjingulula anyì? Irénée anyì? Mpindyewu, nudi bamanye's, èkèleeziyà kàakavwija nànsha bantu abu bansantu to, bòbò kabàvwà bansantu kùdibo to; kàdi bòbò's ki bàvwà bimanyinu bilonda. Bàakadyàngacila bààbò—bààbò bèpiiskòpò, ne bikwàbò, bwà kubavwija bansantu.

279 Mòna's, mwab'ewu ànu àbidi àdi panshi aa, mukàji mukwàbò wàkaya bwà kapeta *Lwendu lwà Mwoyi wa Martin Munsantu* mu nzùbu wa dilamina mikàndà wa Anglais. Nèнку pàvwà . . . Kwambayè ne: “Martin Munsantu.”

280 Ke muntu awu kuwùpatula mu ètàgèèlè amu, kwamba ne: “Yéyè kì mmutàmbe kumanyika mu maalu-malonda to, kàvwà muvwijiiibwè munsantu to.” Nwamònu anyì? Too ne leelù ewu; kàdi Nzambì ùdi ne dìnà dyèndè, Nzambì mmumanye ne yéyè udi nganyì.

281 Nwamònu's, ki dishiilangana adi's. Muntu kampànda mmuswè dìnà dyèndè diikale mu cintu kampànda cyà cinène, kàdi bantu bàà Nzambì mbaswè kwepela cintàkanyì cyà mùshindù awu aci. Kabàtu baswè bintu bipitèpìte bunène, ne cikampànda cyà cipitèpìte bunène aci to; mbaswè kwikala

bapwekele, didipwekesha adi's. Njila wa—njila wa dibànda nkupweka. “Ewu wàdipwekesha neàbàndishiibwe; ewu wàdibàndisha neàpwekeshiibwe.” Mudipwekeshe. Kuteeci bwà kwikala cintu kampànda cyà cinène to; teetà bwà kwikala kaacintu kampànda kàà kakesè, kàdi ikala cyùdi aci. Nwamònu anyi? Ikàlaayi bakesè ku mèsu kwà Nzambi, ikàlaayi bakesè ku mèsu kwènù nwènù biine, muntu mukwàbò yònsò ewu ikale kumutù kwènù. “Ewu udi mutàmbe bunène munkaci mwènù ikale musadidi wa bònsò.”

²⁸² Nganyi udi mufwànyine kwikala mutàmbe Yesù Kilistò ku bunène wàkaDisenya ditwàya ne kwòwesha bayiidi màyi ku makàsà? Mwoweshanganyi wa màyi ku makàsà, ke cyàkalwàYe. Nzambi wa mu Dyulu, Mufùki wa mauu ne buloba, mwikale wòwesha makàsà à balobi bàà mishipa (Kaa!) ne tuumvì twà nyama ne bintakanyi, ne lupwishi lwà mu njila, mùvwà bivwàlù byàbò bibooyangane naalù, kàdi ubisukula ne màyi; Mwoweshanganyi wa màyi ku makàsà, s'ki cìvwaYe aci. Ne pashiishe twètù tudi tudyambidila ne: “Tudi baa kampànda. Bidi bikèngela bwà twètù kwikala Docteur, Ph.D., *Kampànda*.” Kaa, ekèlekèle! Awu kí n'Kilistò to. Aci kacýena cileeya dinanga nànsha. . . Yesù Kilistò munanga ewu. Yèyè wàkalwa Musadidi wa bònsò. Ncyà bushùwà. Mutùlongèshe cileejilu cyà ne bivwa bikèngela bwà twètù kwenzelangana muntu ne mukwèndè mùdiYe mutwènzèle amu. Kaa, awu's—awu's ki Mukalenge wanyi awu. Cìdi ciMuvwija munène, mbwalu Yèyè wàkaDyènza mukèsè. Nwamònu's, ki cyàkaMuvwija munène ncyòci aci's.

²⁸³ Nkaadiku mupete dyèsè dyà kutwilangana ne bantu banène kampànda mu nsòmbelu wanyi, ne nkaatuku mupete dyèsè dyà kutwilangana ne bantu bàvwa *beela meeji* ne mbanène. Muntu munène wa bushùwà ewu ùdi uteeta kukufikisha ku dyela meeji ne wèwè ngudi munène ne yèyè mmuntu cyanàànà. Nwamònu anyi? Mutwilangane ne bamfùmù, ne bakwàbò, ne bantu biine bàdi bulelèlè bantu banène. Nènku ukatwilangana ne beena Kilistò bàà lulamatu lwà menemene, bavwale bilàmbà bitwà biteetela, ne bintu byà mùshindù awu. Ne bamwè bàà kùdìbo bàlwa ku cyambilu byenze bu kashèete kalamakaja ne tubùdìmbù ne pashiishe. . . Nwamònu anyi? Kaa, ekèlekèle! Èè, kàdi katàmbe kwikala kule menemene. . . Èyo.

²⁸⁴ “Manà masokoka,” kaacintu kampànda kakesè kàà *pabwàkù*. Cyà *pabwàcì* ncinyi? Kí ncintu kampànda bwà. . . Mabènesha à Nyumà Mwímpè anyi? Kaa, to, aci mbwà disangisha dijimà. Kàdi “manà masokoka” cìvwa ndibuulula dyà pabwàdi bwalu bivwa bikèngela bwà yèyè kulongesha bakwàbò. Nwamònu anyi? Cìvwa dimanya ditàmbidilaku ndambu dyà Mifùndu, bwà wàmòna mwà kulongesha bakwàbò. Yèyè ke udi ne cyà kulongesha bakwàbò. Mmwòmò anyi? Kwàkwikalaku ne nsòmbelu mutàmbidile mpaasàtà webè nànsha. Nuvùlukàayi ànu bwalu ebu, nwamònu's. Ne pa

nàнку. . . Bwalu yèyè ki mulami wa mikòòkò udi ukudiisha. Piikalayè mulami wa mikòòkò, bìdi bikèngela ikale mumanye mwaba ùdi manà awu asanganyibwa, bwà kudiisha mi—mikòòkò. Ncyà bushùwà anyi? Mpindyewu, kantu kakesè kàà pabwàkù. Nènku tàngilààyaaku eci mu katanci kakesè emu, dibuulula adi, manà masokoka awu.

²⁸⁵ Mpindyewu: “Lusoka lutòòke, yèyè neikalè ne lusoka lutòòke.” Mwanjèlò ewu neikalè ne dibwe ditòòke. Ki lusoka ndwòlò alu’s, kî mmwòmò anyi? [Mwanèètù wa balùme kampànda ùdi wàmba ne: “Bukezùke.”—Muf.] Ne. . . Yèyè mmubingè ne: “bukezùke.”

²⁸⁶ Yèyè—Yèyè wàkatuutakeena ne muntu musangu kampànda ne dìnà dyèndè ùwà n’Simona, ne Wàkashintulula dìnà dyèndè mu Dibwe ne: “Peetèlo.” Bwà cinyi? Úwà ne nsapì. Ncyà bushùwà anyi? Wàkashintulula dìnà dyèndè ne kumuvwija dibwe. Ncyà bushùwà anyi? Peetèlo nguvwa ne nsapì bwalu yèyè ke uvwa ne nsapì yà Bukalenge.

²⁸⁷ “Dìnà dipyadìpyà, dìnà dipyadìpyà difùnda mu dibwe edi didì muntu nànsha umwe kàyì mumanye to pa kuumusha yèyè mwine.” Yèyè mmumanye cidiye, kàdi kèna mwà kwambilaku bakwàbò to. Nwamònu anyi? Nwamònu anyi? Muntu nànsha umwe kî mmumanye to ànu yèyè mwine. Nwamònu anyi? Peetèlo mmumanye ne yèyè ki uvwa ne nsapì ayi, kàdi kanwàkamumvwa wela mbila yà ciine aci to. Nwamònu anyi? Balùmyànà bàdi bàditwa makùmbù bwà cìdibo abu pa ciibidilu kabàtù nànsha cintu to. Uh-huh, uh-huh. “Dibwe ditòòke, ne mwòmò amu mwikale dìnà dipyadìpyà.” Kî ndìnà dyèndè yèyè to, kàdi’s mmuntu mukwàbò (Nwamònu anyi?) ànu yèyè nkààyende ngudi mumanye; ewu udi ne dibwe adi, dìnà adi. Nwamònu’s, manà à pabwàwù bwà kudiisha èkèleeziyà, nwàvùlukaayi’s.

²⁸⁸ Vùlukàayi ne pààkenzeka Cyôci eci mu èkèleeziyà ewu, cìwà nciikondo cimwècimwè aci (cikondo cimwècimwè cyàkabuuludibwa Cyôci eci) cyàkaditèekela beena Nikàlàwù mulombodi wa èkèleeziyà *wabò*, paapà kampànda, ne kumupàbo cyoshelu cyà dibwe ditòòke mwinshì, mwinshì mwèndè amu, cyoshelu cyà marbre. Mmwòmò anyi? Ne cilengeja ne bilengà, ne bintu byà mùshindù awu, cìwà ciikale cyà mushinga mukolè *kùdiye*.

²⁸⁹ Kàdi mwanjèlò wa Mukalenge ewu ùwà mumanye ne *yèyè* uvwa nganyi, mwànà wa balùme wa Nzambi, ku—ku dibuulula dyà Yesù Kilstò.

²⁹⁰ Nènku beena Nikàlàwù pàà—pààkatèèkàbo mulombodi *wabò* ne kushikika dibwe ditòòke difinùnùke ku makàsà èndè (Nwamònu anyi?), Nzambi wàkatèèka mulombodi Wendè mùle tente ne Nyumà bwà kasùmbù Kèndè kùle tètè ne Nyumà; mwanjèlò Wendè; ne Wàkamutwà citampi cyà dìnà pambidi

pèndè, kàdi kèna ne cyà kudìbuulula to. Ùdi ne cyà kudìlama bwèndè nkàâyende, nwamònu's. "Muntu nànsha umwe kí mmumanye to ànu yéyè mwine."

²⁹¹ "Manà masokoka, dibwe, dínà dipyadiya dídì muntu nànsha umwe kàyi mumanye to ànu yéyè nkàâyendè," ne bavwa bàmbila mwanjèlò wa èkèleeziyà. Ndi ndikonka ne Luther ní ùvwa mumanye aci anyi? Ndi ndikonka Wesley ní ùvwa mucimanye? Ndi ndikonka ní—ní banjèlò banène bakwàbò aba?

²⁹² Nènkù ndi ndikonka leelù ewu, ní mu. . . Àbìdì aa ùlwalwa pa buloba, mwanjèlò munène wa Bukènkè wíkala mwà kulwa kutùdì, wíkala mwà kutulombola bwà kupatuka awu, Nyumà Mwimpè munène, ùlwa mu bukolè, ne neàtùlombòlè kùdì Mukalenge Yesù Kilistò. Pàmwàpa yéyè kàakucimanya to, kàdi neikale mwab'ewu òmwè dyà ku matùkù àdì panshì aa. Yéyè neenze. . . Nzambì neàmumanyishe. Kabyàkukèngela bwa yéyè mwine kudìmanyisha to, Nzambì neàmumanyishe. Nzambì neàjaadike Wendè Yéyè. Ki cyàkambaYe pàvwa Yesù pànwàpa kàdi kabàakaMumanya to, nwamònu's. Yéyè ne: "Mémè nciyi ngenza byenzedi byà Taatù Wanyi to, apu kaayi kanùNgiitabùùjì to; kàdi Mémè ngenza byenzedi byà Taatù Wanyi, kàdi kanùyì mwà kuNgiitabuuja to, dîbà adi itàbùùjaayi byenzedi." Ncyà bushùwà anyi?

²⁹³ Kaa, Yéyè kí mmulenga wa dikèma anyi! Mukàndà wà Bwàkabuulwibwà. Mpindyewu, nudi numòna mwaba ùdi èkèleeziyà yisanganyiiibwa anyi? Nudi numòna mùdibo bapàtuke bisumbù anyi? Nudi numòna mùdì èkèleeziyà mupàtuke mwab'ewu anyi? Mpindyewu, *eci* ki cikondo citùdì tukafika màalaba dilòòlò, bu Mukalenge mwà kwanyisha.

²⁹⁴ Mpindyewu, mfwilaayikù luse bwà mùndì munulamè ntàntà mule be, kàdi ndi—ndi—ndi ntèkemena ne nenù—nenùyileku cintu kampànda. Ne nwenda nufùnda tubeji, ne pàdì. . . Ndi ne ndambù mukwàbò kaaba aka, pa mabeji bu àsatu anyi ànaayi nànkù awu, kàdi ncyèna ànu ne dîbà dyà kubilenga to, nènku, bwalu dîbà dikaadi dyènda diya bikolè be, ne dikaadi dyàmba kufika ku tusuna dikumi ne mwandamutekète mpindyewu too ne. . . Kàdi netùbifundè mu mukàndà, mu mishindù yònsò, nènku netù—netù—netùbipetè.

²⁹⁵ Mpindyewu, mbanganyì bàdi baMunange ne mwoyi wàbò wònsò? Mbanganyì bàdi baMwitàbùùje ne mwoyi wàbò wònsò? Kaa! Mpindyewu, nudi nwela meeji ne mémè ndi mufwànyine kwimana kaaba aka ànu ne bwalu katwèna mu malongolodi—ne katwèna mu malongolodi ne bafwànyine kwamba bintu abi anyi? Nudi bumvwe mpindyewu, bânà bèètù, ne mbwà cinyì mémè—mémè (ne mwoyi wànyì wònsò) ngaakalwangesha cintu aci anyi? Nwamònu's, Civwa n'Nyumà Mwimpè. Nciwva mwà kucyumvwa mémè mwine to, nciwva mucimanye ànu to too ne mu matùkù makesè emu. Nwamònu anyi? Nciwva mumanye ne

ncinyi cívwa cingenzèje nàнку to; Ncívwa mumanye ne mbwà cinyi búmvwà misangu yònsò ànu ngeela mbila mpiisha bakàji bàvwà ne nsòmbelu mubì, ne bikwàbò; ncívwa mucìmanye to, bwà mpindyewu kaayi ngàmanyi. Nwamònu anyi?

²⁹⁶ Mpindyewu, Mukalenge mmumanye ne bintu ebi mbìbì. S'ki byòbì ebi byangàcìbwe ànu mu maalu-malonda, ne bilwè...Bible mmwambe ne...Mpindyewu tàngilàayi apa, Bible mmwambe (kumpàlampala) ne bintu ebi nebyènzeke. Mpindyewu, tudì bamanye nàнку, kí mmwòmò anyi? Dìbà adi tudì twangata maalu-malonda à cikondo aci, ne tumòna ne ncyenzeke menemene ànu mùdì Bible mwambe. Ncyà bushùwà anyi? Èè, dìbà adi, patùdì tupweka ku cikondo *cyètù* cyà èkèleeziyà apa, ne cidìYe ùdyanjila kwamba bwà cikondo *cyètù* cyà èkèleeziyà, nebyènzekè ànu menemene muvwà Nzambi mwambe ne nebyènzekè. Nudi nwitabuuja nàнку anyi? Kaa! Kanwènaayiku baswè... .

Kaa, ndi muswe kuMumòna, ntàngila mpàla
Wendè,
Mwaba awu bwà kwimba kashidi bwà ngàsà
Wendè udi usungila;
Mu mìsèèsù ya Butùmbi mbandisha díyì
dyànyì;
Ntátu yònsò yàjiki, ndekeelu wa byònsò mèmè
kumbelu, bwà kusàнка kashidi.

Kaa, ndi muswè kuMumòna, ntàngila...
(Mbanganyi bàdi baswè?)
Mwaba awu bwà kwimba kashidi bwà ngàsà
Wendè udi usungila;
Mu mìsèèsù yà Butùmbi mbandisha díyì
dyànyì;
Ntátu yònsò yàjiki, ndekeelu wa byònsò mèmè
kumbelu, bwà kusàнка kashidi.

Mpindyewu panùdì nulabulangana ku byanza muntu ne mukwèndè apu, udi kumpàla, paanyimà, ne eku ne eku, ne ba-Méthodistes bwònsò, ba-Baptistes, ba-Presbytériens, nànsha biikale banganyi:

Mùndì ngendela mu ditùnga edi emu, ngenda
ngimba pàndì nya apu,
Kaa, mfunkwina mìsùukà ku Kàlvariyo (Kí
ng'èkèleeziyà to, Kàlvariyo.), ku nkwaka
mukunze,
Mikete yàbùngì mmitubule mìsùukà wànyì,
munda, ne pambelu;
Kàdi Mukalenge wanyì ùdi undombolamu,
kùdìYe nkùndì ne cyà kukùlama.

Tùjuukilàayi kuulu mpindyewu:

Kaa, ndi muswè kuMumòna, ntàngila mpàla
Wendè,
Mwaba awu bwà kwimba kashidi. . .

Twèlàayi byanza byètù muulu.

. . .ngàsà udi usùngila;
Mu mìsèèsù yà Butùmbi mbandishà dīyì
dyànyì;
Ntātu yònsò yàjiki, ndekeelu wa byònsò mèmè
kumbelu, bwà kusànka kashidi.

²⁹⁷ Kaa, mùshindù mwine wùndì muMunange's wè! Mùshindù
mwine wùndì muMunange's wè! Bilenga be! Bilenga be!

Mukèmeshanganyi, mukèmeshanganyi, ki cìdì
Yesù bwànyì,
Mubedyanganyi, Mfùmù wa Ditalala, Nzambì
wa Bukolè n'Yèyè;
Kaa, ùnsùngila, ùndama ku mpèkaatù yònsò ne
ku bundù,
Mukèmeshanganyi mMupikudi wanyì, Dìna
Dyèndè ditumbè!

Kale mwya mujimine, mpindyewu ngaapetèki,
musùlùdiibwe ku dipiila,
Yesù ùdi ùfila budìshikaminyi ne
disùngidiibwa mu kaabujimà;
Ùnsùngila ne ùndama kaa, ku mpèkaatù yònsò
ne ku bundù,
Mukèmeshanganyi mMupikudi wanyì, Dyèndè
ditumbè. . .

Bantu bònsò, ne dīyì dikolè menemene:

Mukèmeshanganyi, mukèmeshanganyi, ki cìdì
Yesù bwànyì,
Mubedyanganyi, Mfùmù wa Ditalala, Nzambì
wa Bukolè n'Yèyè;
Kaa, ùnsùngila, ùndama ku mpèkaatù yònsò ne
ku bundù,
Mukèmeshanganyi mMupikudi wanyì, Dìna
Dyèndè ditumbè!

Kaa, bilenga kaayipu's wè!


Kaa, mukèmeshanganyi, mukèmeshanganyi, ki
cìdì Yesù bwànyì,
Yèyè m'Mubedyanganyi, Mfùmù wa Ditalala,
Nzambì wa Bukolè n'Yèyè;
Ùdi ùnsùngila, ùndama ku mpèkaatù yònsò ne
ku bundù,
Mukèmeshanganyi mMupikudi wanyì, Dìna
Dyèndè ditumbè!

²⁹⁸ Bónsò cyàpàmwè twǎmbààyi ne: “Dìna Dyèndè dítumbè!” [Mwanèètù Branham ne disangisha bàdi bààkwila pàmwè—Muf.]: “Dìna Dyèndè dítumbè!” Mupikudi wanyì! Nwavùlukaayi mààlaba dilòòlò, pa dîbà mwandamutekète jaaaja. Too ne ku diine dîbà adi, too ne panwàlukila cyàkàbìdì, enza nunku ewu:

Angata Dìna dyà Yesù wèndè naadi,
Wèwè mwànà wa tunyinyingya ne dikènga;
Nedìkupe disànka, busàmbi... (Ndi ne
disànka dyà kunùmòna mwab'ewu bàna
bèètù, Mukalenge ànùbènèshè.)
...kwónsò kûyaaya.

Dìna dyà mushinga (Dìna dyà mushinga!), Éyì
dyà bupolè be! (Éyì dyà bupolè be!)
Ditèkemena dyà buloba ne disànka dyà Dyulu;
Dìna dyà mushinga (Dìna dyà mushinga!), Éyì
dyà bupolè be!
Ditèkemena dyà buloba ne disànka dyà Dyulu.

²⁹⁹ Patùdì twinyika mitù yètù mpindyewu mu disambila apa,
bwà musambu wà ndekeelu, anyi, citùminu cyà ndekeelu:

Twinamina mu Dìna dyà Yesù,
Tupòna mikookwela ku... (Mukalenge
Nzambi, ondopaku aba, Mukalenge,
patùdì...)...netùMwase cifulu cyà
butùmbi,
Pààjika lwendu lwètù. 

60-1207 Cikondo cyà Èkèleeziyà Wa Peegàmò
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org